

APOSEL

Wiyawi ape Lu Aposel ape mo Iroteye ape

Aposel Peri Tutawe

One towe eite lo iyape Aposel. Peri ape Aposel lo sitewi apou a'i ne. Meni ta Jisas lo peri au te'e fiyariyei ne eimawesawi. Serai one towe eite lu taune lu tamo lo wiwayi werese ne au te'esiya. Meni ape Luk one towe eite leseye. Nowe ape se Jisas omo hire ma'e wiye su, le lu disaipel lo ma'e apou te'eye, "Fene omo Jerusalem sahe ninawere. Ane Owane Sitewi lo omo hire ma'e wiyei su, ane Owane Sitewi lo Hepene Wara'i a'i fene ma'e eimawe arosawirowa." Le lowe ma'e te'eye, "Fene peri ano lu taune ma'e omo Jerusalem sahe au te'e fiyarite. Sosu omo pani Judia peri ano au te'e fiyarite. Sosu omo pani Samaria, sosu omo omo werese a'i eyeri ma'e lu taune ma'e peri ano au te'e fiyarinamite." Serai meni ape Luk lai lu ape mo lowe wiwayi au te'e atuatuteye.

Jisas Owane Sitewi lo Hepene Wara'i a'i hi awei ma'e eimawesairowa.

1 ¹Kaiyemo ano, Tiofilus, tu naifa ane one towe tere'e sahe ne ma'e leseye su, ane Jisas lo peri werese, wiwayi werese, le iroteye ape, ane tu apou leseteye.^a ²⁻⁵Jisas awei sahe iroteye su, le Owane Sitewi lo Hepene Wara'i a'i se lu disaipel lo ma'e apou te'eye, "Fene omo omo werese ire! Lu taune werese ma'e peri ano au te'e atuatute." Lu feni, Jisas lai ariariyeye ape, peri ape Owane Sitewi lo Hepene Wara'i a'i se wanuwe. Sosu Jisas temeniye. Mo'o Owane Sitewi lai si tame ta'an norohuwe hene ankiye su, lu disaipel lo ma'e saro henerai. Poweiye lu hesi werese (40) Jisas lu disaipel lo ma'e nowe poweiye tomu ne'ese saro henerai. Lowe Jisas siyeye su, lowe le ne marepi tote tawesiteye. Nowe poweiye saro henerai su, Jisas lu feni ma'e Owane Sitewi lo marepi

^a 1:1 Lu 1:3

werese au te'e atuatuwe. Sosu a'i pe nowe ta'i se Jisas lu feni ma'e saro henerai ape, le apou eiye, "Fene omo Jerusalem ma'e owe ape arunatire. Ahowa, weiya! Owane Sitewi lo peri te'e naneiyei, le fene ma'e au te'e naneiye ape, henerairowa. Ane lai fene ma'e tu au te'eye. Tu naifa Jon lai lu taune werese sa'i au huwe. Nowe oso a'i su, Owane Sitewi lai fene ma'e Hepene Wara'i a'i lo au hurowa." Sosu Owane Sitewi lai Jisas hire ni'arawe ma'e wiye. Ane etiri werese ape mo one tote sahe lese tepa'asiye.^b

⁶Sosu a'i pe lu feni, Jisas aiwawe, ta'uwerai su, lowe apou ei toweriye, "Eiwerou su, ne Israel lo lu taune werese ma'e kairefiyeyei se lowe ta'u au noweinoweiyei ne si tame aurowa aware? Nowe me'iye su aurowa aware? Nowe pereye eite se lowe ma'e aurowa aware?"^c ⁷Sosu le itiya'u eiye, "Etiri ape mo ne, fene owe ape totere. Ane etiri ape ne fene ma'e au te'erowata. Tai ano lai kairefiyeyei lo se poweiyе eite, sosu nowe tewi a'i ariariyeye.^d ⁸Ahowa, Owane Sitewi lo Hepene Wara'i a'i fene papu wirai su, fene Owane Sitewi lo kairefiyeyei ape anirowa. Fene kairefiyeyei ape anirowa su, fene lu taune werese ma'e peri ano au te'e fiyarite. Fene lu taune werese ma'e omo Jerusalem sahe au te'e fiyarite. Sosu lu taune werese omo pani Judia au te'e fiyarite. Sosu lu taune werese omo pani Samaria au te'e fiyarite. Sosu lu taune ma'e omo omo werese eyeri ma'e au te'e fiyarite."^e

Owane Sitewi lai Jisas ni'arawe ma'e hene wiye.

(Mak 16:19-20; Luk 24:50-53)

⁹Sosu a'i pe Jisas peri lo tepa'asiye su, Owane Sitewi lai le ni'arawe ma'e hene wiye. Lowe siye aroweye su, Jisas aitu papu wiye. ¹⁰Lowe ni'arawe ma'e siye etiteye su, lu hesi, Owane Sitewi lo ipari wisere a'i, ipari tahe wapo a'i ani asiye ape, saro teiteye. ¹¹Lowesi apou eiye, "Fene, Galili lo lu, fene piyene ni'arawe hire ma'e siye arowesiya aware? Meni eite Jisas, Owane Sitewi lai le ni'arawe ma'e hene wiye ape, le aiwawe a'i si tame itorairowa."^f

Lu feni meni he'i a'i au te'e ariariyeye.

¹²Sosu a'i pe Jisas lo lu disaipel Omo Oliv arunatiyewe, Jerusalem ma'e si tame fi. Omo Oliv ataha a'i ne. Lowe yo mai sahe kilomita hesi heta iteye.^g ^h ¹³Lowe omo Jerusalem ma'e henerai su, lowe wesi ape, lowe howeiteye ape, si tame fi. Sosu lowe wesi tewi tutu hire sahe ta'uwerai.

^b 1:2-5 Mk 16:19; Jo 14:16-17 ^c 1:6 Lu 24:21 ^d 1:7 Mk 13:32 ^e 1:8 Mt 28:19; Lu 24:48

^f 1:11 Mt 26:64; Lu 21:27 ^g 1:12 Juda lo lu werese lowe nowe Sabat sahe fara'u kilomita hesi heta irowa. Lowe hesiyo hesiyo kilomita irowata. Yo peri lowe lo amouweye.

^h 1:12 Lu 24:50-53

Lu tomu ne'ese wesi tutu ape ma'e ta'uwerai. Lu ape mo iyape tere'e tere'e apou eiye, Pita, Jon, Jems, Andru, Filip, Tomas, Bartolomyu, Matyu, Jems tere'e, Alfius lo meni eime, Judas, Jems tere'e lo meni eime, Saimon. Meni eite Israel lo marepi werese tote tawesinamiteye.ⁱ ¹⁴Lowe taune tamo mase Maria, Jisas lo mai, Jisas lo pa'ise ape mo aiawae ta'uwerai. Lowe marepi ta'i a'i Owane Sitewi ma'e peri te'e tiyatiteyei ne fai.

Lowe meni Matias, Judas lo yaru sahe ariariyeye.

¹⁵Lowe werese poweiyen tomu ne'ese wesi tutu sahe Owane Sitewi ma'e peri te'eyei ne fai. Sosu a'i pe Pita lai lu taune ponei sahe sineyewe, peri ta au te'eye. Lu taune tomu ne'ese wesi sahe ta'uwerai (120 aiawae a'i). ¹⁶Sosu Pita apou te'eye, "Lu feni ano fene Jisas lo peri wanu tote tawesisiya ape, wanure. Tu naifa, Owane Sitewi lo Hepene Wara'i a'i meni Devit ma'e peri wiyeme te'eteye. Sosu Devit meni Judas ne leseye, 'Kaiyemo ano ai atu siye lu tamo Jisas ma'e heneti.'^j ¹⁷Judas Jisas lo lu disaipel ta'i wiyeme a'i. Le nomo aiawae iroteye. Le nomo aiawae wiywai lo pati ta'aneteye."

¹⁸Sosu le Jisas ma'e au luwaruweteye su, le ma'aru aniyen su, Judas awei tewi ete aniyen. Sosu awei tewi siyenari su, le awei sahe winetaiye su, lire lo aine erauwiye. Saiwe lo werese nowe henerai.^k ¹⁹Lu taune werese Jerusalem sahe etiri eite wanuwe su, lowe awei tewi iyape au te'e eiye, "Akeldama." Peri ape lo sitewi apou a'i, "Awei Tewi Fisa'i Fiyari Eresiya."

²⁰Pita apou eiye, "Tu naifa meni Devit ya'ariyei nomo lo one tote Buk Song apou leseye,

Meni ape lo wesi mi mi pasi pasi yahowa'i fa iroteye. Owe lu taune werese wesi eite wi ironamite. Wesi eite lo meni owane ne, meni tere'e ta wiywai lo ape ta'anerowa.'"
Sng 69:25; 109:8

²¹Sosu Pita tame te'eye, "Meni ape Judas temeniye. Serai nomo meni he'i ariariyerowa. Meni he'i ape Judas lo wiywai ta'anerowa. Meni he'i ape Owane Jisas mase nomo aiawae weriyei iroteye. Sosu le Jisas lo peri werese wanuteye. ²²Meni he'i eite lai Jon Jisas ma'e sa'i au huwe ape, siyeye. Sosu etiri werese, Jisas ta'aneye ape, siyeteye. Sosu le, Owane Sitewi lai Jisas ni'arawe hire ma'e hene wiye ape, siyeteye. Meni eite lai, Jisas si tame sine norohuweye ape, le lu taune werese ma'e au te'e fiyariteye."^l

²³Sosu lowe lu hesi ei aniyen. Lowesi lo iyape Josep, iyape hesi tere'e Barsabas, sosu Jastus. Sosu meni tere'e ape iyape Matias. ²⁴Sosu lowe Owane Sitewi ma'e peri ta te'e toweriye, lowe apou te'e toweriye, "Meni

ⁱ 1:13 Mt 10:2-4 ^j 1:16 Sng 41:9 ^k 1:18 Mt 27:3-8 ^l 1:22 Mt 16:19; Mk 1:9; Jo 15:27

Owane Pefine a'i, ne lai meni he'i ape ariariye tepa'asiye. Ne lu werese lo marepi hepene siye so'oruwe tepa'asiye. Ne a'i lai meni he'i ape nomo ma'e au atuatu areiyere. ²⁵ Meni he'i ape, le Judas lo yaru ta'anerowa. Meni Judas, Krais lo wiwayi ape atati arunatiyewe, le yaru topo lo ma'e fi." Yaru ape ne, Owane Sitewi lai lu taune yo seni luwaru a'i iroteye ape ne, au ta'aneye. ²⁶ Sosu lowe tapiye oso a'i ani fu arosawi su, tapiye ape lai meni Matias ariariyeye. Serai Matias lai Judas lo yaru ape aniyeye. Sosu Matias lai Jisas lo lu disaipel henerai.

Owane Sitewi lo Hepene Wara'i a'i itorai.

2 ¹Ta'uwe hereiyei lo ayei erasi ape, iyape Pentikos, henerai su, lu taune, Jisas lo peri tote tawesiye ape, lowe wesi ta papu ta'uwerai.^m ²Pereye a'i fiyaru no'u erasi ni'arawe ma'e itorai. No'u erasi a'i ape fiyaru erasi wou fateye. No'u erasi ape hire ma'e itorai su, le wesi papu, lu taune werese onuwe ape, teme'eriye. ³Sosu lowe werese etiri yehe sorowe wou a'i itorai siyeye. Yehe sorowe itorai su, yehe sorowe tere'e tere'e erauwi fiyariyewe, sosu lu taune ape mo sahe ta'l'i ta'l'i a'i onuwe.ⁿ ⁴Sosu Owane Sitewi lo Hepene Wara'i a'i lu taune werese papu wiywewe, le lowe werese ma'e kairefiyeyei lo auwe. Papu wiye su, lowe werese peri tere'e tere'e au te'eteye.^o

⁵Juda lo lu taune tomu ne'ese, omo omo werese ma'e fai ape, omo Jerusalem sahe ta'uwerai. Lowe werese Owane Sitewi lo peri tote tawesi umasiteye. ⁶Lowe no'u ape wanuwe su, lu taune werese wesi ma'e ta'uwerai. Lowe werese hepene se su'ariye erasi a'i iroteye. Lowe lu feni ape, peri tere'e tere'e towafi lowe lo te'eye ape, wanuwe. ⁷Lowe marepi erasi a'i hepene se su'ariye. Serai lowe apou te'e toweriye, "Sawi amou! Lu werese eite mo, lowe omo pani Galili lo lu ma'e fai. ⁸Lowe peri lo au te'e fiyariye su, nomo peri sitewi towafi nomo lo se wanusiya. Peri ape, lowe au te'eye ape, mai towafi nomo lo nomo auteiye su, lowe peri ape au te'eteye. ⁹Nomo werese pani tere'e tere'e ma'e fai. Nomo tamo omo pani Partia, tamo omo pani Midia, tamo omo pani Elam, nomo tamo omo pani Mesopotemia ma'e fai. Lu tamo omo pani Judia, lu tamo omo pani Kapadosia ma'e fai. Lu tamo omo pani Pontus, lu tamo omo pani Esia ma'e fai. ¹⁰Nomo tamo omo pani Frigia, nomo tamo omo Pamfilia, nomo tamo omo pani Isip ma'e fai. Lu tamo omo pani Libia lo omo pani Sairini atah a'i ape ma'e fai. Sosu lu taune omo Rom ma'e fai. Nomo werese omo Jerusalem sahe ta'uwerai. ¹¹Lu taune werese eite mo Juda lo lu taune wiyeme a'i ne. Sosu lu taune tamo Juda lo lu taune he'i a'i henerai. Lu taune tamo kemere Krit ma'e fai. Sosu Arebia lo pani ma'e fai. Nomo

^m 2:1 Wkp 23:15-21; Lo 16:9-11 ⁿ 2:3 Mt 3:11 ^o 2:4 Ap 4:31; 10:44-46; Ap 19:6;
Mk 16:17

wiyawi erasi pefine a'i, Owane Sitewi ta'aneteye ape, peri towafi nomo lo se wanuwe." ¹² Lowe marepi erasi a'i tote luwaruweye. Sosu lowe hepene erasi se su'ariye. Sosu lowe ta'u apou te'e toweri tiyatiteye, "Etiri eite ne piye peri sitewi te'esiya awere?"

¹³ Sosu lu tamo lowe ne te'e naru luwaruweye. Lowe apou eiye, "Lowe a'lai sa'i meremereye a'l anamiteye. Lowe meremereye a'l henerai."

Pita au te'e fiyariye.

¹⁴ Sosu a'i pe Pita lu feni ponei sahe teiteye su, le lowe ma'e au te'e fiyariye, lu taune werese ma'e peri erasi apou te'e fiyariye, "Juda lo lu feni ano, fene werese omo Jerusalem irosiya ape, ane peri wiyeme a'i fene ma'e au te'esiya. Fene peri ano wanu eti umasire. ¹⁵ Fene, nomo ne meremereyesiya ape, totesiya awere? Ahowa, lu feni ano, nomo sa'i meremereye a'i a ta'ame. Nomo meremereye ta'ame. Nowe esi ponei a'i irosiya. Ahowa, lu taune tamo, sa'i meremereyeyei ape, esi ponei a ta'ame. ¹⁶ Ahowa, tu naifa meni ta iyape Joel, Owane Sitewi lo peri au te'e fiyariye, le etiri ape ne, fene siyesiya ape, apou leseye,

¹⁷ Owane Sitewi apou eiye, 'Nowe ye'ewi se ane Hepene Wara'i a'i ano lu taune tere'e tere'e werese ma'e hi awei ma'e eimawe arosawirowa. Sosu eimane werese fene lo, sosu eime taune werese peri wiyeme a'i ano au te'e fiyarirowa. Sosu yo'orei lu fene lo hamehameyeyi siyerowa. Sosu ya'ariyei lu owane fene lo suwou peri siyerowa.

¹⁸ Wiyeme a'i poweiye eite se, ane Hepene Wara'i a'i ano wiyawi yahowa'i a'i lu taune ano ma'e eimawe arosawirowa. Serai Hepene Wara'i a'i ano hi awei ma'e eimawe arosairowa su, lowe etiri werese, nowe me'iye su henerairowa ape, au te'e areiyerowa.

¹⁹ Ane etiri kairefi erasi pefine a'i ni'arawe hire ma'e au iro ta'anerowa. Sosu ane wiyawi erasi pefine a'i hi awei sahe au iro ta'anerowa. Lu taune werese kairefi ano siyerowa. Nowe ape se meni fisai'i tomu ne'ese hi awei ma'e ani teroso itorairowa. Yehe erasi, sosu yehe itomu ne'ese a'i hi awei ma'e itorairowa.

²⁰ Poweiye lai hire sahe pasi wou henerairowa. Yame, ni'arawe hire sahe irosiya ape, lo'u a'i fisai'i wou henerairowa. Fene etiri werese ape mo siyerowa su, ane, Meni Owane Pefine a'i siye so'oruwerowa, nowe ano aiyeyei ataheyewa.

²¹ Serai lu taune werese Meni Owane Pefine a'i ne ei anisiya ape, le lai lowe werese hire hene ta'ane wirowa. Lowe mi mi pasi pasi weriyei Owane Sitewi mase ironamitorowwa.' Jol 2:28-32

Owane Sitewi lo au te'e siye meni Joel apou te'eteeye."

²² Sosu Pita peri tere'e apou eiye, "Fene Israel lo lu taune peri ano wanure! Owane Sitewi lai meni ape Jisas Nasaret ma'e fai ape,

ariariyeye. Le Jisas ma'e kairefi tamo lo auwe. Kairefi lo se Jisas lai wiyawi erasi pefine a'i ta'aneye. Le wiyawi erasi pefine a'i ta'aneye. Fene etiri werese ape mo siyeteye. ²³Owane Sitewi lai marepi lo se meni ape fene ma'e eimawe arosai. Tu naifa Owane Sitewi lai etiri werese siye so'oruwekeye. Lu luwaru a'i tamo Jisas ma'e au luwaruweye su, Owane Sitewi lai siye so'oruwekeye! Sosu lowe Jisas me tape'i sahe aine tawere tera'eye su, Owane Sitewi lai siye so'oruwekeye! Tu naifa weriyei le lai etiri werese ape mo siye so'oruwekeye. ²⁴Jisas temeniyei su, Owane Sitewi lai si tame ta'anee norohuwe sineye. Si ta'anee norohuwe sineye su, Jisas lai temeniyei ape awera'iyeye. Fofowei erasi arunati. Le fisiye yo sahe irorowata. Temeniyei ape lai Jisas ani ti tawesirowata. ²⁵Tu naifa meni Devit le ne te'eye. Le apou eiye,

'Ane Meni Owane Pefine nowe weriyei weriyei siyesiya. Le ane ataahe a'i irosiya. Le eyate feni ano sahe irosiya. Serai ane kairefi lo mase teirowa.

²⁶Serai marepi ano wisere a'i teriteyei. Sosu ane peri werese ano le ne erasi a'i au te'e wisereye irorowa. Ane temeniyei su, Owane Sitewi lai ane si tame ta'anee norohuwe sinerowa. Owane Sitewi lai ane ma'e peri wiyeme a'i au te'e naneiye.

²⁷Owane Sitewi, ne hepene ano fisiye yo sahe owe ape arunati. Aiawae a'i ne a'i lai meni wara'i no uwaseyei ne au irorowata.

²⁸Ne ane marepi hepene lo yo seni wisere werese a'i au te'e atuuatuwe. Ne ane mase ironamiyei su, ne a'i lai marepi ano erasi wisereye nine'irowa.' " Sng 16:8-11

²⁹Sosu Pita apou tame eiye, "Kaiyemo mo, ane fene peri wiyeme ta au te'esiya. Meni ape Devit, ya'ariyei aite nomo lo temeniyekeye, lowe fisiye yo papu fuwe. Sosu nowe pereye eite se fisiye yo lo sato irosiya.^p ³⁰Meni ape Devit, le etiri ta so'oruwekeye. Owane Sitewi lai le peri lo au te'e siye meni ta heneraiyei ne ariariyeye. Owane Sitewi lai le ma'e eiye,

'Ane ne ma'e peri te'e naneiyei ta au te'esiya. Nowe me'iyе su, lu feni ta no Meni Owane Pefine a'i tutawe ta henerairowa.'

Sng 89:3-4; 132:11

³¹Devit peri ape leseye su, etiri ape henerai ta'ame. Le meni ape ne, Owane Sitewi ariariyeye ape, temeniyerowawe, si ta'anee norohuwe sinerowawe, le meni ape ne te'eteye. Sosu Owane Sitewi lai meni ape fisiye yo papu irotorowata. Ahowa, tahe pa'are lo uwaserowata.^q

³²Owane Sitewi lai meni ape Jisas si tame ta'anee norohuwe hene ani sineye. Nomo werese lai etiri ape siyeteye. Serai nomo peri wiyeme a'i ape fene ma'e au te'e areiyesiya. ³³Owane Sitewi lai Jisas ereti eyate feni lo se hene wi onuwe. Nowe pereye eite se Owane Sitewi lai le ma'e peri

^p 2:29 1 Kin 2:10 ^q 2:31 Sng 16:10

pefine a'i au te'e naneiye. Peri pefine a'i ape, Owane Sitewi lai au te'e naneiyei ape, Owane Sitewi lai Hepene Wara'i a'i lo hi awei ma'e eimawe arose. Pereye fene lai Owane Sitewi lo Hepene Wara'i a'i siyeye. Fene lai ahi peri lo ape wanuwe.^r ³⁴Nowe ape se Owane Sitewi lai omo hire ma'e meni Devit si ta'ané norohuwe hene wi ta'amé. Ahowa, le apou eiye,

'Meni Owane Pefine a'i lai meni owane ano ma'e eiye. Ne ereti eyate feni ano ma'e onura.

³⁵Sosu ane airame werese a'i no kairefi no unahi ani fu ararorowa.' "

Sng 110:1

³⁶Sosu Pita apou tame eiteye, "Serai Israel lo lu taune werese wanure! Owane Sitewi lai Jisas, fene me tape'i sahe aine tera'eye ape, Le Meni Owane Pefine a'i au iro henerai. Serai fene etiri ape mo siye so'oruweysi."^s

Lu taune ne'ese marepi atati aresaiyeye.

³⁷Sosu a'i pe lu taune werese peri lo ape wanuwe su, lowe marepi kororu a'i irowe. Lowe Pita, lu feni tere'e werese ma'e, Jisas lai ariariyeye ape, aiwawe apou eiye, "Kaiyemo mo, nomo piye eiwerou irowei aware?"

³⁸Sosu Pita itiya'u apou eiye, "Fene marepi fene lo yo seni luwaru a'i atati tote awetore. Yo seni luwaru a'i atati arunatiyei su, fene ta'i ta'i a'i sa'i au ani hure. Fene Jisas lo iyape se ei aniyei su, Owane Sitewi yo seni luwaru a'i fene lo ani sasari pamowerowa. Yo seni luwaru a'i au sasari pamoweye su, Owane Sitewi lai Hepene Wara'i a'i lo marepi hepene fene lo papu neri a'i se eimawe arosairowa. ³⁹Owane Sitewi lo peri te'e naneiyei ape, le fene, eimane werese no aiwawe, sosu lu taune werese werese ma'e Owane Sitewi lo peri te'e naneiyei ape auwe. Lu taune werese, Owane Sitewi lai, Meni Owane Pefine a'i nomo lo, topo le ma'e ei aniyeye ape, le Hepene Wara'i a'i lo lowe ma'e eimawe arosairowa."^t

⁴⁰Pita peri tere'e tomu ne'ese lowe ma'e au te'eye, "Fene werese weiyai! Owane Sitewi lai lu taune, yo seni luwaru a'i ironamisiya ape, au hese etirowa. Serai fene yo seni luwaru a'i fene lo fa atati arunatire. Fene yo seni luwaru a'i atati arunati ta'ame su, Owane Sitewi lai fene aiwawe a'i au hese etirowa." ⁴¹Serai lu taune peri lo wanu umasiye su, lu taune tomu ne'ese sa'i au ani huwe. Sosu lu taune tomu ne'ese (3,000 aiwawe a'i) Jisas lo peri wanu tote tawesi umasiye. Lowe werese Jisas lo lu feni aiwawe a'i henerai."^u

Lu taune Owane Sitewi ne au te'e wisereyeteye.

⁴²Sosu a'i pe lu taune werese, Jisas lo peri wanu tote tawesi umasiye ape, lowe, Owane Sitewi lo etiri werese a'i, lu aposel ape mo au te'e

^r 2:33 Ap 5:32; 7:55-56 ^s 2:36 Ap 5:30-31 ^t 2:39 Ais 57:19 ^u 2:41 Ap 2:47; 4:4

atuatuteye ape, wanuwei ne ta'uwerai. Lowe werese marepi ta'i a'i toteteye. Sosu lowe aiwawe ene ayei ne ta'uwerai. Sosu lowe Owane Sitewi ma'e peri au te'e tiyatiye.^v

⁴³ Lu taune werese marepi wisere erasi a'i tote nine'inamiteye. Lu feni, Jisas lai ariariyeye ape, lowe wiyaw i erasi pefine a'i tomu ne'ese ta'aneteye. Lu taune werese etiri ape mo siyeye su, lowe marepi erasi hepene se su'ariye. Sosu Owane Sitewi ma'e au te'e wisereye nine'iteye. ⁴⁴ Lu taune werese, Jisas lo peri wanu tote tawesiye ape, lowe wesi ta sahe ta'uwerai. Etiri werese towafi lowe lo lowe lu taune tiyati noneteye.^w ⁴⁵ Awei pani tewi towafi lowe lo, sosu etiri werese towafi lowe lo, lowe lai etiri werese ape mo ani ta'uweyewe, lu tere'e tamo ma'aru se eteye. Sosu lowe ma'aru aniyewe, lu taune ariye a'i ta'i ta'i a'i none isafiyete ye. ⁴⁶ Nowe mi mi werese a'i lowe Owane Sitewi lo wesi tutawe sahe ta'uweyewe. Lowe wesi tere'e tere'e sahe ene ayei ne ta'uweyewe. Lowe marepi erasi a'i nine'i wisereyenamiteye. Lowe marepi kairefi a'i se totenamiteye. ⁴⁷ Lowe Owane Sitewi ma'e au te'e wisereye nine'inamiteye. Lu taune werese omo Jerusalem sahe lowe ne tote wisereyeteye. Sosu mi mi werese Meni Owane Pefine a'i lai lu taune tomu ne'ese a'i topo le ma'e sahe hene aniteye.^x

Pita meni ta lowe afofo a'i se au ta'ane fara'uwey e.

3 ¹Sosu a'i pe Pita, sosu Jon lowesi, poweiye wati su, Owane Sitewi lo wesi tutawe ma'e wiye. Poweiye wati su, Juda lo lu taune Owane Sitewi ma'e au te'e tiyatnamiteye. ²Lowesi Owane Sitewi lo wesi tutawe ma'e henerai su, lu tamo meni ta lowe afofo a'i se wari se hene ani sutaitetai. Tu naifa mai lo meni eime ape auteiye su, meni ape lowe afofo a'i se henerai. Lowe meni ape Owane Sitewi lo wesi tutawe lo yo tewiye sahe fu howei arosawi. Yo ape lo iyape, "Yo Wisere a'i ne." Meni ape nowe mi mi weriyei saro onuteye. Lu taune Owane Sitewi lo wesi tutawe papu witeye su, le lowe ma'e ma'aru tamo ei aniteye. ³Pita, Jon lowesi yo ape papu wiye su, meni ape lowesi siyeye, le apou eiye, "Fenesi ma'aru tamo ausa!" ⁴Pita, Jon lowesi meni ape siye etiye. Sosu Pita apou eiye, "Ne notosi siye etire."^y ⁵Meni ape lowesi siye etiye. Le apou toteye, "Lowesi ma'aru tamo ane ma'e auwei ne." ⁶Sosu a'i pe Pita apou eiye, "Ane ma'aru werese po'utesiya. Ahowa, ane etiri tere'e ta ne ma'e fara'u auwei. Jisas Krais, omo Nasaret ma'e fai ape, kairefiyeyei lo se, ane ne ma'e eiye, sinere! Ne uweite!"^z ⁷Sosu Pita ereti eyate feni lo se au ani sineteye. Sosu pereye a'i meni ape sine teiye su, lowe hesi a'i lo kairefi a'i henerai. ⁸Meni ape hire ye'i auwey e. Sosu le uweiteye. Sosu le lowesi

^v 2:42 Ap 20:7 ^w 2:44 Ap 4:32-35 ^x 2:47 Ap 6:7; 11:21 ^y 3:4 Ap 14:9 ^z 3:6 Ap 4:10;
16:18

mase aiwawe Owane Sitewi lo wesi tutawe papu wiye. Le uweiteyewe, ye'i auweteye. Sosu le Owane Sitewi ne au te'e wisereye nine'iteye. ⁹Lu taune werese meni ape siyeye. Le uweiteyewe, Owane Sitewi ne au te'e wisereye nine'iteye ape, sere siyeye. ¹⁰Lowe meni ape sere siyeye su, lowe meni ape siye so'oruweye. Nowe mi mi werese, meni ape, lowe afofo a'i se ape, le Owane Sitewi lo wesi tutawe lo iyape "Yo Wisere a'i" ape sahe onuteye. Le yo tewiye sahe onuteyewe, ma'aru tamo ei aniteye. Sosu lowe hepene se su'ariye. Meni ape lowe hesi a'i lo kairefi a'i se uweiteyeye.

Pita Owane Sitewi lo wesi tutawe sahe au te'eteeye.

¹¹Sosu a'i pe meni ape Pita, Jon lowesi ma'e ya'ore tawesirai. Sosu lu taune werese meni lowe afofo a'i se uweiyeye ape, siyeye su, lowe hepene se su'ariye. Lowe Owane Sitewi lo wesi aise perei ma'e, iyape "Solomon lo Aise Perei," witane se ta'uwerai. ¹²Sosu a'i pe Pita lu taune werese ta'uwerai siyeye su, le apou ekiye, "Lu tewi ano, Israel lo lu taune wanure! Fene piyene hepene se su'ariye awere? Fene piyene notosi siye etisiya awere? Kairefiyeyei notosi lo po'utesiya. Notosi lai kairefiyeyei towafi notosi lo se, meni ape au ta'ane fara'uwe ta'ame. Notosi, yo seni wara'i a'i towafi notosi lo se meni ape au ta'ane fara'uwe ta'ame. Opiyete!

¹³'Abraham lo Owane Sitewi, Aisak lo Owane Sitewi, Jekop lo Owane Sitewi,' Kis 3:6,15

nomo werese lo Owane Sitewi, Owane Sitewi Pefine a'i lai le Jisas ne au te'e wisereyeye. Fene lai Jisas meni Pailat ma'e heneti. Sosu fene Jisas ma'e peri te'e naruwe. Sosu Pailat Jisas kalabus wesi nowe ma'e arosawiyei ne toteye su, sosu fene peri apou ekiye, ahowa! Ne Jisas me tape'i sahe aine tera'ere. ¹⁴Jisas, le yo seni luwaru a'i se iro ta'ame. Le meni wara'i pefine a'i tene! Fene lai Jisas ma'e te'e naruwe. Fene le ne te'e naruwe su, fene Pailat ma'e apou ei toweriye, 'Ne meni luwaru a'i tera'le kalabus wesi nowe ma'e ani rosa. Ne meni Jisas fa aine tera'ere.' ¹⁵Meni Owane Pefine a'i ape lai, lu taune werese marepi hepene he'i a'i auwei ape, fene lai le aine tera'eye. Fene le aine tera'eye su, Owane Sitewi lai si tame ta'ane norohuwe sineye. Notosi etiri ape mo siyeyewe, sosu fene ma'e au te'esiya. ¹⁶Jisas lo kairefiyeyei se, le meni ape, lowe afofo a'i iroteye ape, au ta'ane fara'uweye. Meni ape, lowe afofo a'i iroteye ape, Jisas ne tote tawesiye su, Jisas lai lowe hesi a'i lo kairefi a'i au irowe. Jisas lo kairefi se meni ape au iro ta'ane fara'uweye. Fene lai etiri ape mo siyeye.

¹⁷Sosu kaiyemo mo ano, fene Jisas aine tera'eye su, etiri ape, fene irowe ape, fene so'oru ta'ama. Lu Owane fene lo aiwawe a'i, lowe etiri ape so'oru ta'ama.^a ¹⁸Tu naifa weriyei Owane Sitewi lai au te'e siye lu

^a 3:17 Lu 23:34; 1 Ti 1:13

tamo ma'e apou eiye, 'Meni ape Krais, ane lai ariariyeye ape, le fofowei erasi teriterowa.' Serai le me tape'i sahe temeniyeye su, etiri ape, wiyeme a'li henerai.¹⁹ Serai fene yo seni luwaru a'i fa atati arunatire. Sosu fene Jisas lo marepi umasinamite. Fene yo seni luwaru a'i atati arunatiyei su, Owane Sitewi lai yo seni luwaru a'i no au ani sasari pamoweyei.^b ²⁰ Fene Owane Sitewi ma'e yo seni luwaru a'i atati arunatiyei su, Meni Owane Pefine a'i lai marepi fene lo au ta'ane fetaneyeye. Owane Sitewi lai meni ape, le ariariyeye ape, fene ma'e eimawe arosai. Owane Sitewi lai meni ape Jisas fene ma'e auwe.²¹ Jisas ni'arawe hire ma'e ninawenamisiya. Owane Sitewi lai etiri werese au ta'ane fareraiyeyei su, sosu nowe ape henerai tepa'asiyei su, Jisas fara'u si tame itorairowa. Owane Sitewi lai peri pefine a'i ape au te'e siye lu ma'e tu naifa weriyei au te'eye.

²² Tu naifa weriyei meni Moses apou eiye,

'Owane Sitewi lai Meni Owane Pefine a'i fene lo, le au te'e siye meni ta, ane aiawave a'i, heneraiyei ne au irorowa. Au te'e siye meni ape aiyerowa su, fene werese peri lo wanu eti umasite.'

²³ Lu taune tamo meni ape wanu umasi arisiyei su, Owane Sitewi lai lowe eyeri ma'e eimawesawiyei. Me'iye su le lu taune werese ape mo aine tera'erowa.' *Lo 18:15,18-19*

²⁴ Aiawave a'i Owane Sitewi lo au te'e siye lu werese peri ape au te'eye. Au te'e siye meni ta iyape Samuel, aiawave a'i au te'eye. Sosu au te'e siye lu werese, mo'o fai ape, lowe peri eite au te'eye. Lowe apou te'eye, 'Nowe me'iye su, poweiyeye ape henerairowa. Owane Sitewi lo peri ape peri wiyeme a'li ne.'²⁵ Fene werese lai au te'e siye lu lo lu tewi a'i ne. Owane Sitewi lai peri te'e naneiyeye wiyeme lo ape, fene ma'e auwe. Owane Sitewi lai peri pefine a'i ya'ariyei fene lo au te'eye. Sosu Owane Sitewi peri wiyeme ape fene aiawave a'i au te'eye. Owane Sitewi meni Abraham apou eiye,

'Nowe me'iye su ane lu tewi ta'i a'i no, le lu taune werese ma'e au wisereyerowa.' *Stt 22:18*

²⁶ Sosu Owane Sitewi wiyawi yahowa'i ta'ane siye meni ape ariariyeye. Owane Sitewi lai meni ape Jisas tu fene ma'e eimawesai. Fene yo seni luwaru a'i atati arunatire. Fene marepi fene lo atati tote awetowei su, le fene ne au wisereyerowa."^c

Lu owane tamo lai, Pita, Jon kalabus papu funari.

4 ¹Sosu Pita, Jon lowesi Jisas lo peri lu taune ma'e au te'eye su, ai lu tamo, au heseyei lu owane tamo, ai lu lo meni owane ta, Owane Sitewi lo wesi au noweinoweiteye ape, sosu lu owane tere'e tamo iyape Sadyusi, lowe lowesi ma'e henerai. ²Lowe lowesi ne ai marepi erasi a'i

^b 3:19 Ap 2:38 ^c 3:26 Ap 13:46

toteye. Lowesi lu taune ma'e Jisas lo iyape se apou au te'e fiyariye, "Nowe ye'ewi su lu taune werese si tame ta'ané norohuwe sinerowa." Serai lowe ai marepi erasi a'i lowesi ne totenamiteye. ³Neriwei su lowe lowesi ereti anite tawesiywé, kalabus wesi ma'e heneti. Lowe apou toteye, "Nowe pasiyewa. Nomo esi a'i su lowesi meni owane lo wesi ma'e etiyei ne heneti." ⁴Nowe poweiye tamo i tepa'asiye su, lu taune tomu ne'ese Owane Sitewi lo wesi iroteye su, lowe peri lowesi lo wanuwe. Lu taune tomu ne'ese Jisas lo peri tote tawesi umasiteye. Lu tomu ne'ese a'i (5,000 aiawae a'i) Jisas ne tote tawesiye. Taune tomu ne'ese aiawae a'i peri lowesi lo wanuwe tote tawesi umasiteye.^d

Lowe Pita, Jon, lowesi etiye.

⁵Esi su lu owane tomu ne'ese, ya'ariyei lu tamo, Juda lo yo peri so'oruwe siye lu tamo, lowe omo Jerusalem ma'e ta'uwerai. ⁶Meni Anas, au heseyei meni owane pefine aiawae a'i ta'uwerai. Kaiafas aiawae ta'uwerai, Jon, Aleksander lowesi aiawae ta'uwerai. Lu tere'e tamo, Anas lo lu feni aiawae ta'uwerai. ⁷Sosu a'i pe lowe Pita, Jon lu owane ma'e ponei sahe au teiyei ne henetai. Lowe lowesi apou te'e toweriye, "Fenesi piye kairefiyeyei aniye awere? Kairefiyeyei ape ne eiwerai fenesi ma'e auwe awere?"

⁸Sosu Pita, Owane Sitewi lo Hepene Wara'i a'i papu iroteye ape, lowe ma'e eiye, "Israel lo lu owane, wanure! ⁹Peri ano wanu etire, fene lu taune werese pani Israel sahe aiawae wanure. ¹⁰Jisas, Nasaret lo meni ape, Owane Sitewi lai le ariariyeye ape, fene lai meni ape me tape'i sahe aine tera'eye. Sosu Owane Sitewi lai le si tame ta'ané norohuwe hene ani sineye. Meni ape, Jisas lo kairefi se, meni eite lowe hesi a'i lo afofo a'i au ta'ané tei kairefiyeyei.^e ¹¹Tu naifa weriyei meni ta Devit, meni ape ne toteye. Le Owane Sitewi lo one towé sahe apou leseye,

"Tapiye ta, wesi ta'ané siye lu ani fu arosawi ape, Owane Sitewi lai
tapiye eite tutawe heneraiyei ne au irowe." *Sng 118:22*

¹²Jisas a'i lai lu taune werese marepi hepene he'i aurowa. Owe meni tere'e ta lu taune werese marepi hepene he'i a'i aurowata. Owane Sitewi lai Jisas ma'e kairefiyeyei lo auwewe, le hi awei ma'e eimawe arosai. Nomo werese le ne fu umasinamite.^f

¹³Lowe Pita, Jon lo peri kairefi a'i siyeye su, lowe hepene se su'ariye, apou eiye, "Lu hesi ape ne, au te'e atuatu siye lu tamo lai lowesi marepi wisere a'i au te'e atuatuteye awere? Lowesi iyape se ta'ama. Lowesi kairefiyeyei eite eiwerou ma'e aniye awere? Nowe tu se lowesi Jisas mase iroteye." ¹⁴Lowe meni lowe hesi a'i afofo a'i siyeye su, lowe peri ta itiya'u te'e ta'amé. Meni ape lowe hesi a'i fara'uwe tepa'asiye. ¹⁵Sosu

^d 4:4 Ap 2:41 ^e 4:10 Ap 3:6,13-16 ^f 4:12 Mt 1:21

lowe lowesi wesi tewi nowe ma'e eimawesawi. Lowesi fi su, lowe te'e tiyatiyei ne ta'uwerai. ¹⁶Lowe apou te'e tiyati toweriteye, "Nomo lu hesi ape ne eiwerou irowei awere? Lu taune werese omo Jerusalem sahe etiri erasi pefine a'i ape, lowesi ta'aneye ape, wanu wisereyeye. Nomo etiri ape eiwerou fareyarerowata. ¹⁷Nomo lowesi ma'e Jisas lo iyape se owe ape te'e einamirowa. Nomo lowesi ma'e te'e einami ta'ame su, lu taune werese peri lowesi lo wanu tote tawesi umasirowa."

¹⁸Sosu a'i pe lowe lowesi si tame ei aniye. Lowesi si tame wiye su, lowe apou eiye, "Fenesi peri nomo lo wanu etire! Fenesi Jisas lo iyape se owe ape te'e fiyariete." ^g ¹⁹Ahowa, Pita, Jon lowe ma'e itiya'u te'eye, "Fene lai peri notosi lo wanu etire. Notosi Owane Sitewi lo peri umasiyei awere? Notosi peri fene lo umasiyei awere? Wanure! Notosi lai Owane Sitewi lo peri lo umasiyei tene!" ²⁰Etiri werese ape mo, notosi wanuwe ape, sosu etiri werese ape mo notosi siyeye ape, notosi lu taune werese ma'e au te'e fiyariowa!" ²¹Lowe lowesi ma'e peri kairefi a'i se au te'e einamiye su, lowe lowesi nowe ma'e eimawe arosawi. Lowe yo seni lowesi lo ne au hese etirowata. Lu taune werese Owane Sitewi ma'e au te'e wisereyeteye. Lu taune werese lowesi ne apou te'eye, "Lowesi yo seni aseyaro wisere a'i iroteye." Serai lu owane ape mo lowesi kalabus wesi ma'e henetirowata. Kalabus wesi ma'e henetirowa su, lu taune werese lowe ma'e ai marepi erasi a'i toterowa. ²²Meni ape lowe hesi a'i afofo a'i se iyu menei lu hesi werese (40 aiwawe a'i) iroteye. Sosu pereye a'i lowe hesi a'i afofo a'i lo se kairefiyeye.

Krais lo lu taune Owane Sitewi ma'e au te'e toweriye.

²³Sosu a'i pe lu owane lowesi wesi nowe ma'e eimawesawi su, lowesi lu feni lo ma'e si tame fiyewe, lowe ma'e peri ape, au heseyei lu owane werese, sosu ya'ariyei lu owane werese lowesi ma'e te'eye ape, au te'eye. ²⁴Lu taune Jisas ne tote tawesiteye ape mo peri lowesi lo wanuwe su, lowe Owane Sitewi ma'e peri erasi au te'e wisereye nine'iteye. Lowe apou au te'eye, "Meni Owane Pefine a'i, ne lai etiri werese ta'aneye. Ne omo pani werese ta'aneye. Sa'i erasi werese a'i ta'aneye. Etiri werese awei pani sahe, sa'i sahe, sosu ni'arawe hire ma'e irosiya ape, ne lai ta'aneye." ⁱ ²⁵Ya'ariyei nomo lo Devit, le wiyaw iahowa'i ta'ane siye meni no. Owane Sitewi lo Hepene Wara'i se Devit apou eeye,

'Lu tewi tere'e werese omo werese sahe piyene ai erasi ironamisiya.

Lu tewi nomo lo piyene Owane Sitewi ma'e marepi yahowa'i irowei ne tote eye awere?

²⁶Awei lu owane tutawe werese omo werese ma'e ai atu tiyatiyei ne ta'uwersiya. Sosu ya'ariyei lu owane werese, Owane Sitewi ma'e

^g 4:18 Ap 5:28 ^h 4:19 Ap 5:29 ⁱ 4:24 Kis 20:11; Neh 9:6; Sng 146:6

ai atu tiyatiyei ne ta'uweye. Lowe Owane Sitewi lo meni ma'e, le ariariyeye ape, ai atu tiyatiyei ne ta'uweye.' " Sng 2:1-2

²⁷"Meni owane Herot, sosu meni Pontius Pailat, lu taune tomu ne'ese a'i, Juda lo yo peri umasi ta'a'me ape, sosu Juda lo lu taune tamo omo Jerusalem sahe ta'uwerai su, etiri werese ape mo pefine a'i henerai. Lowe Jisas ma'e ai atu tiyatiyei ne ta'uwerai. Meni ape Jisas, le wiwayi yahowa'i wara'i a'i meni no. Ne le ariariyeyewe, hi awei ma'e lu taune werese si tame ete hene aniyei ne eimawe arosai.^j ²⁸Lu werese ape mo etiri ape Jisas ma'e au luwaruweye su, ne a'i lai tu naifa siye so'oruweteye. Kairefi no se, sosu marepi no se, lu ape mo le ma'e au irowe.^k ²⁹Serai ne lu owane lo peri wanure. Ne nomo, wiwayi yahowa'i lu taune no fa pati ta'anere. Ne nomo au noweinoweinamite. Ne nomo au noweinoweiyei su, nomo fara'u peri no kairefi a'i se lu taune werese ma'e au te'e fiyari areiyerowa.^l ³⁰Kairefi no nomo ma'e eimawe arosa. Nomo kairefi no se lu taune u tahe se fara'u au ta'ane fara'uwerowa. Sosu etiri wisere tomu ne'ese a'i kairefi no se au ta'anerowa. Nomo etiri ape mo Jisas lo kairefi se au ta'anerowa."

³¹Sosu a'i pe lowe Owane Sitewi ma'e au te'e tepa'asiye su, Owane Sitewi lai wesi ape auseriyeye. Sosu Owane Sitewi lo Hepene Wara'lai a'i lu taune werese, wesi papu ape iroteye ape, marepi hepene lowe lo papu wiye. Sosu lowe Owane Sitewi lo peri kairefi a'i se au te'e fiyariye.

Krais lo lu taune etiri towafi lowe lo tiyati ma'e auteye.

³²Lu taune werese, Jisas ne tote tawesiteye ape, lowe marepi ta'i a'i toteteye. Ma'aru etiri werese towafi lowe lo aiwawe a'i, lowe etiri werese lowe ta'i ta'i none tiyatiye.^m ³³Lu aposel ape mo lai kairefi erasi pefine a'i lu taune ma'e apou au te'e fiyariye. Lowe apou te'eye. "Meni Owane Jisas, Owane Sitewi lai si tame ta'ane norohuwe sineye. Peri ape ne pefine a'i tene." Sosu Owane Sitewi lai lu taune werese, peri lo umasiteye ape, le lowe ma'e au te'e wisereye nine'iteye. ³⁴⁻³⁵Lowe werese etiri ape mo lowe ariye ape, aniye. Lu taune tamo wesi towafi lowe lo, sosu awei pani towafi lowe lo iroteye ape, lu tere'e ma'aru se eteye. Sosu lowe ma'aru werese towafi lowe lo lu aposel ape mo ma'e auwe. Lu feni ape mo ma'aru aniye su, lowe lu taune ma'e, etiri ma'aru ariye a'i iroteye ape mo ma'e, isafkiye nonetiye.ⁿ

³⁶Sosu a'i pe meni ta iyape Josep, Livai lo lu tewi, pani Saiprus ma'e fai ape, awei pani tewi ta iroteye. Meni tere'e ta lai eteye. Sosu Josep iyape tere'e Barnabas lo sitewi aiwawe a'i, "Meni ape lai lu taune ma'e marepi au fetaneye kairefiesiya." ³⁷Josep Barnabas le ma'aru aniyewe, lu aposel ape mo ma'e aitai.

^j 4:27 Mt 27:1-2; Lu 23:7-11; Ap 3:13 ^k 4:28 Ap 2:23 ^l 4:29 Ef 6:19 ^m 4:32 Ap 2:44

ⁿ 4:34-35 Ap 2:45

Ananaias, tani lo Safaira peri wawero au te'eye.

5 ¹Sosu a'i pe meni ta iyape Ananaias, sosu tani lo aiwawe, iyape Safaira, lowesi awei pani tewi ta iroteye. Sosu lowesi te'e tiyatiyewe, apou eiye, "Notosi awei pani tewi towafi notosi lo ma'aru aniyewe, lu aposel ma'e aurowa." Sosu meni tere'e awei tewi lowesi lo eteyewe, ma'aru tamo Ananaias ma'e auwe. ²Ma'aru aniyе su, lowesi te'e tiyatiyewe, "Notosi ma'aru tewi a'i lu feni ma'e auwei. Notosi tewi a'i aniterowa." Sosu le lu feni ma'e ma'aru tewi a'i tamo auwewe, lowe ma'e apou eiye, "Notosi ma'aru werese fene ma'e ausai."^o ³Sosu a'i pe Pita apou ei toweriye, "Ananaias, ne piyene Owane Sitewi lo Hepene Wara'i se te'e areareye aware? Ne piyene sepei, Satan, ne lire papu wirai aware? Ne awei lo ma'aru tewi a'i aniteye."^p ⁴Awei pani tewi ape fenesi ro wiyeme a'i ne. Meni tere'e awei pani ape eteye su, ma'aru ape, le ne ma'e auwe ape, ma'aru werese ape mo fenesi lo wiyeme a'i ne. Ne a'i lai eiwerou su fara'u nonerowa. Etiri ape fenesi lo a'i ne. Ahowa, ne lai nomo ma'e te'e areareye. Yo seni ape, fenesi irowe ape, luwaru a'i ne. Sosu ne lai Owane Sitewi te'e areareye su, ne yo seni tahe luwaru erasi a'i irowe."^q ⁵Ananaias peri ape wanuwe su, le awei sahe wiyeine temeniyeye. Lu taune werese etiri ape wanuwe su, lowe atoweiye erasi a'i irowe. ⁶Sosu a'i pe yo'orei lu tamo faiyewe, lowe meni ape ipari tahe napetuwewe, omo nowe ma'e sutaitetiye. Sosu lowe fisiye yo sahe towasiye. ⁷Nowe me'iye su tani lo lu aposel ma'e fai. Le etiri ape so'oru ta'ama. ⁸Sosu Pita le ma'e apou ei toweriye, "Ma'aru werese eite ne, awei pani tewi lo ma'aru werese a'i aware? Fenesi ma'aru werese a'i nomo ma'e auwe aware?" Le itiya'u apou eiye, "Ei, notosi ma'aru werese eite fene ma'e auwe." ⁹Sosu Pita le ma'e apou eiye, "Fenesi piyene Owane Sitewi lo Hepene Wara'i se te'e areareye. Siyete, yo'orei lu tamo saro irosiya. Lowe meni no sutaitetiye, fisiye yo sahe towasinari. Nowe pereye a'i lowe ne sutaitetirowa." ¹⁰Pereye a'i menitani ape awei sahe wiyeine temeniyeye. Yo'orei lu ape mo si fai su, lowe tani lo temeniyeyei siyerai. Sosu lowe menitani ape sutaitetiye, fisiye yo sahe towasiye. Meni lo atahe a'i sahe towasiye. ¹¹Lu taune werese, Jisas ne tote tawesiteye ape, sosu lu taune tere'e tamo etiri ape wanuwe su, lowe atoweiyei erasi irowe.

Lu aposel lai lu taune u se ape au ta'ane fara'uweye.

¹²Sosu a'i pe lu aposel werese etiri erasi pefine tomu ne'ese lu taune ma'e au ta'aneye. Lu feni, Jisas umasisiya ape, Owane Sitewi lo wesi tewi iyape Solomon lo aise perei ta'uweleye.^q ¹³Owe lu taune tere'e tamo lowe mase ta'uweye. Ahowa, lowe lu aposel ape mo ne marepi erasi a'i toteye.

^o 5:2 Ap 4:34-35 ^p 5:3 Jo 13:2 ^q 5:12 Ap 2:43; 14:3

Ahowa, lowe lowe mase ta'uwerai ta'ame. Lowe etiri werese lowe siyeteye ape, atoweiyeye¹⁴ Lu taune tomu ne'ese a'i Jisas lo peri wanuwewe, le ne tote tawesi umasiteye.¹⁵ Serai lu taune tomu ne'ese Jisas ne tote tawesi umasinamiteye su, lowe lu taune u se ape, lowe yo mai sahe henetai. Lowe lu taune u se ape mo, yo sahe howei ereteye su, lowe apou toteye, "Lu aposel ape mo yo sahe aiyeyei su, hawowou lowe lo lai lu taune u se napeturowa. Hawowou lowe lo ape lu taune napetuwei su, u lowe lo ape mo fara'uwerowa."¹⁶ Lu taune tomu ne'ese omo tere'le tere'e Jerulalem atahe a'i ma'e fai ape, lowe lu taune u se ape sutaitetai. Lu taune sepei luwaru a'i se ape hene aitai. Lu aposel ape mo lai lu taune werese u se ape au ta'ané fara'uweye.

Au heseyei lu owane tamo lu aposel ma'e au luwaruwewe.

¹⁷Sosu a'i pe au heseyei meni owane pefine a'i, lu tewi lo mase, Sadyusi lo lu tewi, lowe werese Jisas lo lu feni ne marepi luwaru a'i tote afofoweye.¹⁸ Lowe lu aposel ape mo ereti se anite tawesiye, kalabus wesi papu ani aroweye.¹⁹ Nowe pasiyeye su, lowe kalabus wesi papu saro iroteye. Owane Sitewi lo ipari wisere a'i kalabus wesi yo tosowewe, nowe ma'e heneti.^r ²⁰Owane Sitewi lo ipari wisere a'i ape lai lowe ma'e apou eiye, "Fene Owane Sitewi lo wesi tutawe sahe teiri. Sosu fene Owane Sitewi lo wesi tutawe teiyei su, fene lu taune werese ma'e peri he'i a'i eite au te'e fiyariye. Peri he'i eite, fene au te'e fiyariyei ape, Owane Sitewi lai marepi hepene he'i a'i lu taune ma'e aurowa."²¹ Sosu lowe esi peri ape wanuwe su, lowe, Owane Sitewi lo wesi tutawe papu wiye. Papu wiye su, lowe lu taune werese Owane Sitewi lo peri he'i a'i au te'e fiyariye.

Sosu a'i pe au heseyei meni owane pefine a'i sosu lu feni lo mase henerai su, lowe Israel lo lu owane tamo ei ta'uwerai. Lowe ai atu siye lu tamo kalabus wesi ma'e lu aposel ape mo henetaiyei ne eimawesawi.²² Lu owane ape mo kalabus wesi ma'e henerai su, lowe lu aposel ape mo siye ariye. Sosu lowe au heseyei meni owane pefine ma'e si tame faiyewe, lowe ma'e itiya'u te'eye,²³ "Nomo liyewe kalabus wesi lo yo ti tepa'asiye, yo tekiye tekiye sahe lu hesi ape saro teiteye. Nomo yo eite tosowe su, lu ape mo papu ariye siyeye."²⁴ Meni owane, Owane Sitewi lo wesi au noweinoweiteye ape, sosu au heseyei lu owane wanuwe su, lowe apou toteye. Piye etiri ape, pereye henerai ape, aware? Nomo so'oru ta'ama. Lu taune werese etiri ape wanuwei su, lowe piye toterowa aware?²⁵ Ahowa, meni ta lowe ma'e henerai. Le lowe ma'e apou eiye. "Wanure, lu ape mo fene kalabus wesi ma'e hene fu arosawi ape, lowe werese Owane Sitewi lo wesi tutawe papu sahe lu taune werese ma'e au te'e fiyariye."²⁶ Lowe peri eite wanuwe su, kalabus wesi lo meni owane, lu feni lo mase, lowe

^r 5:19 Ap 12:7-10

lu aposel ape mo lu owane ma'e si tame henetai. Lowe ereti anite tawesi ta'ame. Lowe lu taune werese ne atoweiyeye. Lowe lu taune tapiye lowe ma'e fusawiyei ne atoweiyeye.

Lu aposel lai peri te'e fiyariyei ne atoweiyeye ta'ame.

²⁷Lowe henetai su, lu owane werese lowe ponei sahe au teiye. Sosu au heseyei meni owane pefine a'i lowe ma'e peri tomu ne'ese ei toweriyei.

²⁸Le apou ei toweriye, “Nomo fene peri kairefi a'i se Jisas lo iyape se au te'e einamiye. Ahowa, fene lu taune werese ma'e omo Jerusalem sahe au te'e fiyariye. Fene lu taune werese ma'e apou au fu te'eye, ‘Fene, au heseyei lu owane werese aiwawe a'i lai meni ape Jisas me tape'i sahe aine tera'eye.’ ”^s

²⁹Sosu a'i pe Pita lu feni mase lowe itiya'u te'eye, “Nomo Owane Sitewi lo peri wiyeme a'i umasiyei. Nomo lu lo peri umasirowata.”^t ³⁰Fene Jisas me tape'i sahe hene ani aine tera'eye su, Owane Sitewi lai ya'ariyei nomo lo le ne tote tawesi umasiye ape, le lai Jisas si tame ta'ane norohuwe sineye. Fene Jisas me tape'i sahe ni'ari se hene ani aine tawere tera'eye.

³¹Owane Sitewi lai Jisas si tame ta'ane norohuwe hene sineye su, le Jisas, meni owane pefine a'i, ei ani aroweye. Jisas, lu taune werese marepi hepene he'i auwe ape, Owane Sitewi lai le ma'e kairefi erasi auwe. Israel lo lu ta'i ta'i marepi hepene ani awetowi su, Jisas lai yo seni luwaru a'i lowe lo au ani sasari pamowerowa.”^u ³²Nomo, Owane Sitewi lo Hepene Wara'i aiwawe a'i, nomo etiri ape mo siyeye. Lu taune ta'i ta'i a'i, peri lo tote tawesi umasiteye ape, Owane Sitewi lai Hepene Wara'i lo lu taune werese ape mo papu wiyei ne eimawe arosai.”

Gamaliel lu owane ape mo ma'e peri wisere a'i au te'eye.

³³Sosu a'i pe lu owane werese peri ape wanuwe su, lowe ma'e ai marepi erasi a'i toteye. Lowe lu aposel werese aine tera'eyei ne toteye. ³⁴Meni Farisi owane ta, iyape Gamaliel, meni ape Owane Sitewi lo yo peri so'oruwe siye meni ne. Lu taune werese meni ape ne tote wisereyeye. Meni ape lu owane ponei sahe sineteye su, le apou eiye, “Lu aposel ape mo ne, nomo lowe nowe ma'e eimawe arosawiyei. Nowe oso a'i su nomo fara'u lowe ei aniyei.”³⁵ Sosu le lu owane ma'e au te'eye, “Israel lo lu owane. Fene peri ano wanure! Fene lowe ma'e au luwaruweyei su, fene tu etiri ape ne tote eti hese ereirowa.”³⁶ Tu naifa meni ta henerai, iyape Teudas, le apou eiye, ‘Ane meni erasi iyape se.’ Serai lu tomu ne'ese (400 aiwawe a'i) le mo'o umasiteye. Sosu lowe meni ape aine tera'eye su, lu feni lo atoweiyeye fiyariti. Lu feni lo atoweiyeye fiyariye su, wiyawu lo yahowa'i henerai!”³⁷ Mo'o su, meni tere'e henerai, iyape Judas, Galili ma'e fai. Lu taune werese iyape

^s 5:28 Mt 27:25 ^t 5:29 Ap 4:19 ^u 5:31 Ap 2:33-34; Ef 1:20; Hi 2:10; 12:2

^v 5:36 Ap 21:38

leseye su, meni ape lu feni lo mase ai erasi atuteye. Lowe meni ape aine tera'eye. Lu feni lo tere'e tere'e atoweiyе fiyariti.³⁸ Serai fene marepi ano wanu totere! Ane apou toteye, fene Jisas lo lu aposel kalabus wesi nowe ma'e hene ani arosaire. Fene lowe ma'e owe ape au luwaruwere. Meni ta lai wiyawи ape lo sitewi irosiya su, wiyawи eite yahowa'i henerairowa. ³⁹Ahowa, Owane Sitewi lai wiyawи ape lo sitewi irosiya su, fene lowe ma'e owe ape einamire. Fene lai Owane Sitewi ma'e ai atu tiyatiye. Serai fene lu aposel werese ma'e owe ape au luwaruwere."

Lowe lu aposel lo me'iyeni ma'e wafei se aineye.

⁴⁰Sosu a'i pe le peri te'e tepa'asiye su, lu owane werese meni eite lo peri wanu umasiye. Sosu lowe lu aposel ape mo te'e aniyе. Lowe wafei se me'iyeni lowe lo ma'e aineye. Lowe apou te'e eye, "Fene Jisas lo iyape se owe ape te'e fiyarite." Sosu lowe wesi nowe ma'e ani arosawi.^w ⁴¹Lowe ta'uweyei wesi arunati su, lowe Owane Sitewi ne au te'e wisereye nine'iteye. Lowe Jisas lo iyape se neritase ta'ame. Serai lowe Owane Sitewi ma'e peri au te'e wisereye nine'iteye.^x ⁴²Mi mi weriyei Owane Sitewi lo wesi tutawe sahe, sosu wesi tere'e tere'e sahe lowe Jisas, Owane Sitewi lai ariariyeye ape, au te'e fiyari areiyeteye.

Lu aposel lai lu tamo au te'e ariariyeye.

6 ¹Sosu a'i pe lu taune tomu ne'ese Jisas lo peri wanu tote tawesi umasiteye. Lu tamo Grik lo peri te'e eye ape, lowe lu tamo, Hibru lo peri te'e eye ape, ai peri fu te'e eye. Lowe apou eiye, "Fene taune weiname towafi fene lo au noweinoweisiya. Ahowa, fene taune weiname towafi nomo lo awera'iyenati. Mi mi weriyei fene taune weiname ma'aru noneye su, fene taune weiname nomo lo awera'iyenati."^y ²Sosu lu aposel ape ne (12) lowe lu taune, Jisas ne tote tawesiteye ape, te'e ta'uweraiyewe, lowe ma'e apou te'e eye, "Nomo Owane Sitewi lo peri, nomo fene ma'e au te'e eye ape, awera'iyerowata. Ahowa, nomo taune weiname etiri ma'aru au awera'iyenatirowata. Nomo Owane Sitewi lo peri a'i au te'e fiyariyei.^z ³Serai fene werese, Meni Owane Pefine a'i umasisiya ape, wanure, fene lu ereti feni werese feni hesi a'i (7) ariariyere. Lu tewi ape mo Owane Sitewi lo Hepene Wara'i papu irosiya. Lowe etiri werese ape mo siye so'oruweysiа. Lu taune werese lowe ne marepi wisere a'i totesiya. Fene lu ape mo ariariyeyei su, lowe wiyawи tere'e tere'e ape mo au noweinoweirowa. ⁴Nomo a'i lai mi mi weriyei Owane Sitewi lo peri lu taune ma'e au te'e fiyarirowa. Sosu nomo Owane Sitewi ma'e au te'e tiyatirowa. Etiri eite mo pefine a'i tene."

⁵Lu taune werese peri ape ne wisere a'i toteye. Sosu lowe meni Stiven ariariyeye. Meni ape Owane Sitewi lo peri wanu tote tawesi umasiteye.

^w 5:40 Ap 4:18 ^x 5:41 Mt 5:10-12; 1 Pi 4:13 ^y 6:1 Ap 4:35

Owane Sitewi lo Hepene Wara'i a'i le papu iroteye. Lowe lu tere'e tere'e ariariyeye, meni Filip, meni Prokorus, meni Nikanor, meni Timon, meni Parmenas, meni Nikolas, omo Antioch ma'e fai ape, le Juda meni he'i a'i henerai. ⁶Lowe lu ape mo ariariyeye su, lowe lu aposel ape mo ma'e henetai. Sosu lowe lu ape mo ereti hire sahe fuwewe, sosu Owane Sitewi ma'e au te'e wisereyeye.

⁷Sosu lu aposel ape mo Owane Sitewi lo peri au te'e fiyari howeiyeye. Serai lu taune tomu ne'ese a'i Owane Sitewi lo peri wanu tote tawesi umasiteyewe. Au heseyei lu owane tomu ne'ese Jisas lo peri wanu tote tawesi umasiteye.^z

Lu owane tamo Stiven ereti lo sahe anite tawesiye.

⁸Sosu a'i pe Owane Sitewi lai meni Stiven ma'e kairefiyeyei lo auwe. Sosu le le ma'e ferafereyi lo erasi a'i auwe. Meni ape lu taune werese ma'e wiyawi erasi pefine a'i ta'aneye. ⁹Sosu lu tamo Stiven ne ai marepi toteteye. Lu ape mo, lowe omo pani Sairini, omo pani Aleksandria, omo pani Silisia, omo pani Esia lowe ma'e fai. Lowe Stiven ma'e henerai. Marepi lowe lo apou toteteye. "Nomo ta'uwerai su, nomo marepi fetane a'i au te'lesiya. Tu lu ape mo wiyawi erasi pefine a'i ta'aneteye. Lowe ma'aru aniyei ne tote ta'ame." Serai lowe Stiven lo peri wanuwei ne fai. Lowe Stiven lo peri wanuwe su, lowe Stiven ma'e ai marepi te'e tiyatiteye. ¹⁰Ahowa, Owane Sitewi lai Stiven ma'e marepi wisere a'i lo auwewe, serai lowe ai marepi towafi lowe lo yahowa'i au irowe. Owane Sitewi lo Hepene Wara'i Stiven ma'e kairefiyeyei lo auwe.^a ¹¹Sosu lowe eresene a'i lu tere'e tere'e tamo ma'e marepi wawero a'i apou te'eye. Fene peri nomo lo le ne au fu te'eyei su, nomo fene ma'e ma'aru tamo aurowa. Fene peri nomo lo au te'ere, "Nomo meni ape, Owane Sitewi, sosu Moses lowesi ma'e te'e naruwe. Nomo peri ape wanuwe." ¹²Serai lu taune tomu ne'ese Stiven ma'e ai marepi erasi a'i totenamiteye. Lowe ya'ariyei lo yo peri siye lu tamo, sosu ya'ariyei lu tamo ai marepi au irowe. Sosu lowe werese Stiven anite tawesiywewe, au heseyei lu owane ma'e heneti. ¹³Lowe lu tamo, peri wawero au fu te'eteye ape, henetai. Lowe apou eiye, "Meni eite mi mi weriyei weriyei Owane Sitewi lo wesi te'e luwaruwenamiteye. Yo peri nomo lo aiawawe a'i te'e naruwe. ¹⁴Nomo peri lo apou wanuwe. Le apou eiye, 'Meni eite Jisas, Nasaret ma'e fai ape, le Owane Sitewi lo wesi ani erau fiyariyei.' Peri tere'e le apou eiye, 'Ane ya'ariyei nomo lo yo seni weriyei, he'i atati awetowei. Yo seni ape, ya'ariyei nomo lo Moses lai nomo ma'e auwe.' "¹⁵Sosu lu ape mo, Stiven ma'e fu te'eyei ne ta'uwe ape, lowe Stiven lo nihari a'i siye etiteye. Nihari lo mi erasi tewi mitaiyeye, Owane Sitewi lo ipari wisere a'i lo nihari wou henerai.

^z 6:7 Ap 2:41; 16:5 ^a 6:10 Lu 21:15

Stiven lu owane ma'e, etiyei ne ta'uweye ape, au te'eye.

7 ¹Sosu a'i pe au heseyei meni owane pefine a'i le ma'e ei toweriye, “Lu ape mo, ne fu te'esiya ape, peri lowe lo wiyeme a'i aware? Piyete aware?” ²Sosu Stiven itiya'u apou te'e, “Lu feni peri ano wanure! Tu naifa ya'ariyei nomo lo meni Abraham pani Mesopotemia sato iroteye. Nowe me'iye su le omo Haran ma'e fi. Pani Mesopotemia sato iroteye su, Owane Sitewi lai hire yaro irosiya ape, Abraham ma'e henerai. ³Owane Sitewi lai le ma'e apou ekiye,

‘Lu tewi no, pani awei ape sahe no arunatire. Sosu ane ne ma'e pani awei tere'e he'i a'l ai au atuaturowa. Pani awei ape ma'e irel’ *Stt 12:1*

⁴Sosu a'i pe le pani Kaldia arunatiywewe fi. Sosu le fi su, le omo Haran ma'e onuri. Abraham lo tai temeniyeye su, Owane Sitewi lai le omo pani tere'e ma'e eimawesawi. Omo pani ape, nowe pereye eite se, fene saro irosiya. ^b ⁵Owane Sitewi lai etiri ta le ma'e au ta'ame. Opiyai! Le le ma'e awei tewi oso a'i au ta'ame. Ahowa, Owane Sitewi le ma'e apou ekiye,

‘Mo'o su ane awei pani werese ape lu tewi no ma'e aurowa.’ *Stt 12:7* Nowe ape se Abraham lo eimane werese ariye. ⁶Owane Sitewi lai le ma'e apou ekiye,

‘Nowe me'iye su lu tewi no awei pani ape arunatirowa. Lu tere'e lo pani sahe iroteyei. Lu tewi tere'e ape mo lowe ma'e au luwaruwerowa. Lowe lu tewi no wafei se ti tawesirowa. Sosu wiyawi yahowa'i erasi ta'anerowa. Ma'aru aniruwata. Lowe wiyawi yahowa'i ta'anerowa. Lowe pani ape sahe iyu menei (400 aiawawe a'i) iroteye. ⁷Iyu menei (400) i tepa'asiyei su, ane lai lu tewi tere'e, fene werese wiyawi yahowa'i anite tawesi ape, au hese ereirowa. Lu tewi no pani Isip arunatirowawe, pani eite sahe ane ne au te'e wisereye nine'inamirowa.’ *Kis 3:12*

⁸Owane Sitewi lai Abraham ma'e peri te'e naneiyei ape au te'eye. Peri te'e naneiyei ape apou a'i, ‘Ne tahe no mene'e se touwe. Ne tahe touwei ape siyeyei su, ne Owane Sitewi ma'e tote tawesiyei.’ Abraham lo tani meni eime ta auteiye, iyape Aisak. Sosu poweiyereti feni werese feni hesi heta (8) i tepa'asiyei su, Abraham meni eime lo tahe touwe. Meni eime tahe touwe ape, Abraham Owane Sitewi lo peri te'e naneiyei ape aniyi. Nowe me'iye su Aisak lo tani meni eime ta auteiye, iyape Jekop. Nowe me'iye su Jekop lo tani werese eimane ereti feni hesi lowe hesi a'l (12) auteiye. Jekop lo eimane werese ya'ariyei sitewi henerai. ^c ⁹Josep lo airu werese, lowe le ma'e yo seni luwaru a'i irowe. Sosu lowe lu tere'e tamo siyeyei su, lowe lu tere'e ape ma'e Josep henetiyewe, pani Isip lowe lo ma'e eimawesawi. Josep wiyawi yahowa'i ta'aneteye. Josep pani Isip sahe iroteye su, Owane

^b *7:4* Stt 11:31–12:5 ^c *7:8* Stt 17:9-14; 21:4

Sitewi lai le mase ironamiteye.^d ¹⁰Owane Sitewi lai le au noweinoweiteye. Lowe le au luwaruweteye su, Owane Sitewi lai le au pati ferafereiteye. Owane Sitewi le ne marepi tote wisereyeteye. Sosu Isip lo meni owane tutawe Josep ne aiawawe a'i marepi wisereye a'i toteye. Sosu Josep Isip lo pani werese au noweinoweiteye. Sosu le Isip lo meni owane tutawe lo wesi au noweinoweiteye.^e ¹¹Josep meni owane henerai su, lu taune werese pani Isip sahe, pani Kenan sahe ene ayei po'uteye. Lau erasi henerai su, ya'ariyei nomo lo werese ayei nehi ani ta'ame. Lu taune werese lau mase teriteteye.^f ¹²Meni ape Jekop peri heneruwe ta, ayei tomu ne'ese Isip sahe iroteye ape, wanuwe. Sosu le tu eimane topo lo, ya'ariyei nomo lo, pani Isip ma'e eimawesawi. ¹³Sosu mo'o Josep airu werese lo ma'e apou eiye,

'Ane Josep, pa'ise towafi fene lo ne. Marepi fene lo apou a'i toteye, ane temeniyeye. Ahowa, siyere! Ane norohu a'i irosiya.' *Stt 45:4*

Sosu Isip lo meni owane tutawe, le Josep lo awaripi wanu so'oruweye.^g

¹⁴Sosu mo'o Josep awaripi lo Isip ma'e te'e aniy. Josep lo lu feni werese Isip ma'e fai, lu tomu ne'ese a'i (75 aiawawe a'i) Isip ma'e wiye.^h ¹⁵Sosu Jekop pani Isip ma'e itowe. Le, eimane lo aiawawe a'i, saro ahe temeniyeye.ⁱ ¹⁶Pa'are lowe lo omo Sekem ma'e aiti. Pa'are lowe lo Abraham lo fisiye yo sahe fu arowe. Tu naifa fisiye yo ape Abraham lai Hamor lo eimane tamo se ete aniy. Abraham ma'aru tamo auwe.^j ¹⁷Nowe ape se peri wiyeme a'i Owane Sitewi lai Abraham ma'e au te'e naneiye ape, atahe a'i henerai su, lu tewi no lo tomu ne'ese henerai.

¹⁸Sosu nowe me'iy su Isip lo meni owane tutawe tere'e henerai. Le Josep wanu so'oru ta'ama.^k ¹⁹Le lai ya'ariyei nomo lo ma'e yo seni luwaru a'i au irowe. Le eimane he'i lowe lo werese liye pa'are a'i nowe ma'e fu arosawi. Sosu eimane he'i tomu ne'ese temeniyeye.^l ²⁰Nowe ape se menitani ta meni eime topo lo, iyape Moses, auteiye. Meni eime ape, Owane Sitewi lo nihe se, wisere a'i ne. Yame hesi heta, meni eime lo mai le ma'e mo'u au ateye. Lowe Moses tai lo wesi sahe fareyare iroteye.^m ²¹Yame hesi heta i tepa'asiye su, meni ta Isip lo meni owane tutawe ma'e le ne au te'eye. Isip lo meni owane tutawe lo eime taune, meni eime ape siyeyewe, wesi topo lo ma'e au noweinoweiyi ne heneti. Eime taune ape Moses mo'u au ateye. Meni eime topo lo wou a'i ne.ⁿ ²²Meni eite, Moses, le meni erasi henerai tepa'asiye. Le Isip lo etiri, yo seni werese siye so'oruwe tepa'asiye. Isip lo etiri, yo seni werese a'i, lowe le ma'e au te'e atuatu tepa'asiye. Le Isip lo peri wanu so'oruweye. Le wiywai erasi a'i ta'aneteye.

²³Sosu a'i pe le iyu menei lu hesi werese (40) siyeye su, le lu tewi topo lo ma'e sewiyeyei ne toteye. Lu tewi topo lo aiawawe a'i Israel lo lu tewi.

^d *7:9* Stt 28:1-3; 37:11; Stt 39:1-3,21-23 ^e *7:10* Stt 41:37-44 ^f *7:11* Stt 41:54; 42:1-2

^g *7:13* Stt 45:1-4,16 ^h *7:14* Stt 45:9-11; 46:27 ⁱ *7:15* Stt 46:1-7; 49:33 ^j *7:16* Stt 23:2-20; 33:19; Jos 24:32 ^k *7:18* Kis 1:7 ^l *7:19* Kis 1:11-22 ^m *7:20* Kis 2:2 ⁿ *7:21* Kis 2:3-10

²⁴Sosu le Isip lo meni ta, Israel lo meni tere'e ta ma'e au luwaruweye ape, siyeye. Sosu le witane a'i se Isip lo meni ape aine tera'eye.^o ²⁵Sosu Moses apou toteye, ‘Owane Sitewi lai ane Israel lo lu tevi au pati ferafereiyei ne eimawesai. Serai lowe ane siyeye su, lowe etiri ta siye so'oruweyei. Owane Sitewi lai ane ma'e au pati ferafereiyei ne eimawesai.’ Ahowa, lowe siye so'oru ta'ama. ²⁶Poweiyе mo'o su Moses lu hesi, ai atu tiyatiteye ape, siyeye. Le lowesi ma'e apou eiye, ‘Fenesi ai atu tiyati arure! Fenesi lu tevi ta'i aiwawe a'i ne. Fenesi piyene ai atu tiyati irowe awere?’ ²⁷Sosu meni ape, meni tere'e ma'e ai atu tiyatiye ape, le meni Moses ma'e ani ere itesawiyewe, itiya'u apou ei toweriye,

‘Eiwerai ne kairefi nomo ne au hese ereiyei ne auwe awere? Ne yo seni nomo lo au hese ereirowata.

²⁸Ne ane aiwawe a'i aine tera'eyei awere? Liyewe ne lai Isip lo meni ta aine tera'eye aiwawe a'i ne. Nomo peri heneruwe ape wanu tepa'asiye.’

Kis 2:14

²⁹Sosu Moses peri ape wanuwe su, le atoweiyе erasi a'i iteroti. Le omo pani Midian ma'e atoweiyе iteroti. Sosu le menitani ta'i a'i naituwe. Lowesi eimane hesi auteiyе. Le lu tevi tere'e lo omo pani onuteye.^p

³⁰Sosu a'i pe iyu menei lu hesi werese (40) i tepa'asiye su, Moses omo pani, lu ta'ame ape, iroteye. Sosu Owane Sitewi lo ipari wisere a'i Moses ma'e itorai. Le me same ta sahe yehe a'i papu wiye. Omo pite a'i iyape Sainai atahe a'i iroteye. ³¹Moses etiri ape siyeye su, le hepene se su'ariye. Le atahe a'i aiye ataheyeye su, le Meni Owane Pefine a'i lo peri ahi erasi wanuwe. ³²Meni Owane Pefine lo peri ahi apou eiye,

‘Ane a'i lai Abraham lo Owane Sitewi, Aisak lo Owane Sitewi, Jekop lo Owane Sitewi.’

Kis 3:6

Sosu Moses tei atoweiyе auseriyeye. Le me ape yehe ti meteteye ape, siyeye ne atoweiyeye. ³³Sosu a'i pe Meni Owane Pefine le ma'e apou eiye, ‘Lowe tahe no ani tahe ani arosawire. Awei eite ano a'i meni ta teirowata.

³⁴Ane Isip lo lu taune werese lu feni ano ma'e au luwaruweyei siyeye. Ane lu uruwei lowe lo wanuwe. Ane lai lowe hene ani ferafereiyei ne fai. Serai ane ne pani Isip ma'e si lowe ma'e au ferafereiyei ne eimawesawiyei.’”

Kis 3:7-10

³⁵Sosu a'i pe Stiven apou tame te'eye, “Meni Moses ape ne, lowe tu naifa le ne apou te'eye. ‘Eiwerai ne kairefiyei nomo ne au hese ereiyei ne auwe awere?’ Owane Sitewi lai meni Moses lowe ma'e eimawesawi. Moses lai meni owane lowe lo henerai. Owane Sitewi lo ipari wisere a'i me same papu iroteye su, Owane Sitewi lai meni ape ariariyeye.^q ³⁶Sosu le lu tevi lo, Isip lo omo pani hene arunari. Le etiri erasi pefine a'i tere'e

^o 7:24 Kis 2:11-15 ^p 7:29 Kis 2:21-22; 18:3-4 ^q 7:35 Kis 3:1-4

tere'e, tu Lowe siyeye ta'ame ape, ta'aneye. Le etiri erasi pefine a'i ape mo Isip lo pani sahe ta'aneye. Le wiwayi erasi pefine a'i Sa'i Lo'u a'i sahe ta'aneye. Le wiwayi erasi pefine a'i omo pani, lu ta'ame ape sahe, ta'aneye. Lowe omo pani, lu ta'ame ape sahe, iyu menei lu hesi werese (40) saro iroteye.^r ³⁷Meni ape, Moses, le aiwawe a'i Israel lo lu tewi ma'e apou eiye,

'Nowe me'iye ta su Owane Sitewi lai au te'e siye meni ta, ane aiwawe a'i, fene ma'e eimawesai. Le lu tewi nomo lo aiwawe a'i henerai.'

Lo 18:15

³⁸ Meni ape, Moses, le lai aiwawe a'i omo pani ariye a'i saro iroteye. Owane Sitewi lo ipari wisere a'i Omo Sainai sahe au te'eye su, le a'i lai ya'ariyei nomo lo mase iroteye. Owane Sitewi lai meni ape ma'e yo peri, marepi hepene ausiya ape, norohu a'i au te'eye. Serai meni ape Owane Sitewi lo peri fene ma'e te'e fiyariye. Le nomo ma'e au te'e fiyariye.^s ³⁹ Ya'ariyei nomo lo yo peri ape wanuwe su, Lowe yo peri ape umasi ta'ame. Ahowa, Lowe meni ape ne me'iyeni ma'e atati aruwe. Lowe marepi apou toteye, 'Nomo pani Isip si ire.'^t ⁴⁰ Sosu Lowe Moses lo pa'ise Aron ma'e apou te'eye,

'Meni tere'e ape Moses le nomo Isip ma'e henetai ape, le eiwerou fi awere? Le temeniyeye awere? Nomo so'oru ta'ama. Serai ne etiri ta ta'anere. Etiri ape hepene se heneraiyei. Serai nomo etiri ape nomo omo pani wisere a'i ma'e henetirowa.'

Kis 32:1

⁴¹ Sosu nowe ape se Lowe fe bulmakau yene nihari aiwawe tapiye gol se ta'aneye. Lowe fe lo'u nihari eite ma'e au heseye. Lowe yakowei erasi irowe. Lowe etiri eite ma'e au te'e wisereye nine'iteye.^t ⁴² Sosu Owane Sitewi lai Lowe ne me'iyeni ma'e atati aruwe. Sosu Owane Sitewi lai Lowe awera'iyenati. Etiri werese, ni'arawe ma'e iroteye ape, Lowe etiri ape mo ne au te'e wisereye nine'iteye. Tu naifa Owane Sitewi lo au te'e siye meni ta apou Owane Sitewi lo one tote sahe aiwawe leseye,

'Israel lo lu tewi, fene omo pani, etiri werese po'uteteye ape, iyu menei lu hesi werese (40) sahe iroteye su, fene fe lo'u tamu ane ma'e au hese ta'ame. ⁴³ Ahowa, fene lai ipari tahe wesi erasi tere'e ta, lu taune god wawero, iyape Molek, au te'e wisereyeye. Fene god wawero tere'e, iyape Refan, lo eiwariyemi fene lai eiwariyemi eite Lowe uporo ape'i onuwewe, le ma'e au te'e wisereyeteye. Serai ane fene werese omo tere'e eyeri ma'e eimawesawirowa. Omo Babilon awera'iyenatirowawe, sosu feni eiro ma'e irowa.'

Amo 5:25-27

⁴⁴ Tu naifa ya'ariyei nomo lo omo pani etiri werese po'uteteye ape, sahe iroteye su, Owane Sitewi lo wesi, ipari tahe se ta'aneye ape, Lowe aiwawe

^r **7:36** Kis 7:3; 14:21; Nam 14:33 ^s **7:38** Kis 19:3 ^t **7:41** Kis 32:2-6

iroteye. Lowe wesi eite siyeye su, lowe apou toteye, ‘Owane Sitewi lai nomo aiwawe iroteye.’ Owane Sitewi lai Moses ma'e wesi ape, le ta'aneye ape, au atuatuwe. ⁴⁵ Sosu lowe wesi ape ta'aneye su, ya'ariyei nomo lo wesi ape aiwawe suteti. Meni Josua lai lu taune, omo pani tere'e iroteye ape, ai atu tiyatiye su, lowe Owane Sitewi lo ipari tahe wesi ape aiwawe sutaiteti. Lu taune tere'e, omo pani iroteye ape, Owane Sitewi lai lowe na'ari arosawi. Owane Sitewi lo ipari tahe wesi ape omo pani ape sahe iroteye. Nowe me'iye su meni owane Devit henerai su, wesi ape iroteye.^u ⁴⁶ Sosu Owane Sitewi lo nihe se, meni ape Devit ne au te'e wisereyeteye. Serai Devit lai Owane Sitewi ma'e apou ei toweriye, ‘Jekop lo Owane Sitewi, ane fara'u wesi no tapiye se ta'anerowa aware?’^v ⁴⁷ Ahowa, Devit Owane Sitewi lo wesi tutawe ta'ane ta'ame. Meni tere'e iyape Solomon, le a'i lai Owane Sitewi lo wesi tutawe au ta'aneye.^w ⁴⁸ Ahowa, wesi werese a'i, lu ta'aneye ape, Owane Sitewi lai onu te ta'ame. Au te'e siye meni ta'i Owane Sitewi lo one tote sahe apou leseye, Owane Sitewi apou eiye,

⁴⁹ ‘Wesi ano ni'arawe hire yaro ironamisiya. Hi awei ape sahe, ane lowe topo ano saro atosiya. Fene ane ne piye wesi au ta'aneyei aware? Omo pani eiwerou ma'e ane howeirowa aware?’

⁵⁰ Ahowa, fene etiri ta tote anite tawesire! Ane ereti topo ano se etiri werese a'i ta'aneye.’

Ais 66:1-2

⁵¹ Fene werese peri ano wanure! Fene marepi afofo a'i totesiya. Fene lu taune, peri werese ano tote arisinamisiya ape, fene lowe ne aiwawe a'i ne. Fene Owane Sitewi lo peri werese wanu arisinamiteye. Marepi fene lo kairefi luwaru a'i ne. Fene lai ya'ariyei fene lo aiwawe a'i ne. Lowe Owane Sitewi lo peri umasi ta'ame fene Owane Sitewi lo Hepene Wara'i a'i lo peri wanu arisinamisiya.^x ⁵² Owane Sitewi lo au te'e siye lu werese, fene lai lowe ma'e au luwaruweteye. Lowe lai lu werese, meni wara'i a'i ne au te'eteye ape, aine tera'eye. Tu naifa lowe apou au te'eye. Meni wara'i a'i ta mo'o aiyerowa. Lowe peri ape au te'eye su, ya'ariyei fene lo lowe aine tera'eye. Meni wara'i a'i ape henerai su, fene meni ape ne me'iyeni ma'e atati aruwewe, sosu le aine tera'eye.^y ⁵³ Owane Sitewi lai yo peri lo ape fene ma'e auwe. Owane Sitewi lo ipari werese yo peri lo ape ne fene ma'e au te'eteye. Sosu fene Owane Sitewi lo yo peri ape wanuwe su, fene yo peri lo wanu arisinamisiya.’

Lowe meni Stiven tapiye se aine tera'eye.

⁵⁴ Lowe Stiven lo peri ape wanuwe su, lowe le ma'e ai marepi erasi pi tomu tawesiteye. ⁵⁵ Ahowa, Stiven, Owane Sitewi lo Hepene Wara'i a'i papu iroteye ape, le ni'arawe hire ma'e siye etiteye. Le Owane Sitewi

^u 7:45 Jos 3:14-17 ^v 7:46 2 Sml 7:1-16 ^w 7:47 1 Kin 6:1-38 ^x 7:51 Ais 63:10

^y 7:52 Mt 23:31

lo mitaiyeyei erasi pefine a'i siyeye. Le Jisas Owane Sitewi lo eyate feni ma'e teiyei siyeye.^z ⁵⁶Sosu le apou eiye, "Siyere! Ane ni'arawe ani erauwiyei siyesiya. Ane meni ape, hi awei ma'e ni'arawe hire ma'e itorai ape, Owane Sitewi lo eyate feni ma'e teisiya ape, siyesiya."^a ⁵⁷Sosu lowe apaniye lowe lo erseti se anite tawesiyewe, lowe peri erasi a'i hareteye. Lowe werese Stiven ma'e wafei se iteru anite ti tawesiri. ⁵⁸Sosu lowe omo nowe ma'e le hene ni'ariti. Lowe le omo nowe ma'e hene ni'ariti su, lowe tapiye le ma'e ani fusawi. Sosu lowe lai, peri wawero au te'eye ape, ipari tahe ani erau aniyewe, sosu lowe yo'orei meni Sol ma'e ipari tahe erseti lo se au aniteyei. ⁵⁹Lowe tapiye fusawi su, Stiven Jisas ma'e au apou eiye, "Jisas Meni Owane Pefine a'i ano, Ne hepene ano hene ani wire." ⁶⁰Sosu le lowe uporo ape'i onuwewe, sosu le apou hareye, "Meni Owane Pefine a'i, ne yo seni luwaru a'i lowe lo au ani sasari pamowere." Sosu le peri ape tepa'asiye su, le temeniyeye.^b

8 ¹Sosu a'i pe lowe Stiven aine tera'eye su, meni ape, Sol, le lai marepi wisere erasi a'i toteye.

Meni Sol lai Jisas lo lu taune ma'e au luwaruweteye.

Sosu poweiye ape se, lowe lu taune werese, Jisas ne tote tawesiteye ape ma'e Jerusalem sahe au luwaruwenamiteye. Lowe werese omo pani Judia, omo pani Samaria ma'e fiyari howeiye. Jisas lo lu aposel wiyeme a'i, lowe omo Jerusalem sahe iroteye. ²Sosu lu tamo Jisas lo peri umasiteye ape, lowe Stiven lo tahe pa'are fisiye yo sahe funari. Sosu lowe luwei erasi a'i ewiteye. ³Meni ape Sol lai Jisas lo lu feni werese au luwaruweteye ne toteye. Le wesi ta'lai ta'lai werese ma'e lu taune werese hene ni'arititeye, kalabus wesi ma'e heneti.^c

Lu aposel ape mo lai Jisas lo peri omo pani Judia, omo pani Samaria sahe au te'e fiyariteye.

(Aposel 8:4–12:25)

Filip omo Samaria ma'e itori.

⁴Serai lu taune werese, omo omo fiyari howeiye ape, lowe Jisas lo peri te'e fiyariteye. ⁵Meni Filip omo Samaria ma'e fi. Le lu taune werese ma'e omo ape sahe meni Jisas, Owane Sitewi lai ariariyeye ape ne, au te'e fiyariyei ne fi. ⁶Sosu lu taune werese etiri erasi pefine a'i, Filip ta'aneteye ape, lowe peri lo wanuwe su, lowe peri ape wanu tote tawesi umasiteye. ⁷Sosu le lu taune tomu ne'ese, sepei luwaru tomu ne'ese a'i papu iroteye ape, le lai sepei luwaru a'i ape mo au ta'ane sasari arosawi. Sepei luwaru

^z 7:55 Sng 110:1 ^a 7:56 Kl 3:1 ^b 7:60 Lu 23:34 ^c 8:3 Ap 9:1,13; 22:4; Ap 26:9-11

a'i hare uteyei erasi irowe su, lowe lu taune werese arunatiyewe fi. Lu taune lowe afofo a'i se, le lowe lowe lo au ta'ane fara'uweye. ⁸Serai lu taune werese, omo ape sahe iroteye ape, lowe marepi erasi a'i wisereye nine'iteye.

Saimon sinariyei meni.

⁹Nowe ape se meni ta, iyape Saimon, omo ape sahe iroteye. Le sinariyei meni erasi a'i ne. Nowe tu naifa le sinariyei seni au ta'aneteye. Sosu lu taune werese, omo Samaria sahe, lowe meni ape marepi tote wisereyeye. Le apou eiye, "Ane meni erasi a'i ne. Ane meni iyape se ne." ¹⁰Sosu lu taune werese lu taune iyape se, sosu lu taune tere'le lowe werese Saimon lo peri wanu etiteye. Lowe apou au te'eye, "Meni ape Owane Sitewi lo kairefi se irosiya." ¹¹Lu taune werese sinariyei siyeye su, lowe werese meni ape umasiteye. ¹²Sosu a'i pe Filip peri heneruwe wisere a'i lu taune werese ma'e au te'eteye. Le aiawae a'i Jisas Krais lo iyape ne au te'eteye su, lu taune tomu ne'ese wanu tote tawesi umasiye. Serai lu taune Jisas ne tote tawesiye su, le mo'o lu taune ma'e sa'i au huwe. ¹³Sosu Saimon aiawae Filip lo peri wanuwe su, le aiawae a'i Jisas ne tote tawesi umasiye. Sosu Filip le ma'e sa'i au huwe. Sosu meni ape Filip mo'o umasiye. Le Filip lo etiri wisere a'i siyeye su, le hepene se su'ariye.

¹⁴Sosu a'i pe lu taune tomu ne'ese, omo Samaria sahe iroteye ape, Jisas ne tote tawesi umasiteye. Sosu lu aposel ape mo, omo Jerusalem sahe iroteye ape, tote tawesiyei lowe lo wanuwe su, lowe lu hesi Pita, Jon lowe ma'e eimawesawi. ¹⁵Lowesi henerai su, lowesi Owane Sitewi ma'e apou au te'e toweriye. "Ne Hepene Wara'i a'i no lu taune werese ma'e, omo Samaria iroteye ape, marepi hepene papu au ani wiyei ne eimawesaire." ¹⁶Owane Sitewi lo Hepene Wara'i a'i lu taune werese ape mo tu naifa marepi lowe lo papu wi ta'ame. Lowe Meni Owane Jisas lo iyape se sa'i ani huwe. ¹⁷Sosu Pita, Jon lowesi ereti lowesi lo se lu taune werese ma'e hire isawe hetesiye, Owane Sitewi lo Hepene Wara'i lowe papu wira.^d

¹⁸Sosu a'i pe lowesi meni Saimon ereti hire ma'e isawe hetesiye su, le Owane Sitewi lo Hepene Wara'i itorai ape, siyeye, le apou eiye, ¹⁹"Ane kairefi lo ape aniyei ne totesiya. Ane ma'aru tomu ne'ese fenesi ma'e auwei. Ane kairefi ape aniyei su, ane lu taune werese ereti hire ma'e isawe hetesirowa. Serai lowe Owane Sitewi lo Hepene Wara'i anirowa."

²⁰Sosu Pita itiya'u eiye, "Ne ma'aru mase temeniyenamirowa. Marepi no luwaru a'i apou toteye, Owane Sitewi lo Hepene Wara'i a'i, Owane Sitewi lai ausiya ape, 'Ane fara'u ma'aru se eteyei ne totesiya.' Yo seni ape luwaru a'i ne. ²¹Ne Owane Sitewi lo wiyaw i tewi a'i nomo mase ta'anerowata. Marepi hepene no, Owane Sitewi lai siyeye ape, unou

^d 8:17 Ap 19:6

pefine a'i ne. ²²Ne marepi hepene he'i ani aresaiyere. Ne Owane Sitewi ma'e apou ei towerire, 'Ne yo seni luwaru a'i ano au ani pamowere.' Ane so'oru ta'ama. Owane Sitewi lai yo seni luwaru a'i no, marepi papu toteye ape, au ani sasari pamowerowa awere? Piyete awere? ²³Ane marepi no siye so'oruweysi. Marepi no wawe sa'i horuse a'i wou a'i ne. Marepi no sahe etiri werese luwaru a'i papu teme'eriyesiya. Yo seni luwaru a'i lai marepi hepene no ya'ore tawesisiya."

²⁴Sosu a'i pe Saimon itiya'u apou ekiye, "Fenesi Meni Owane Pefine a'i ma'e ake ne au te'e towerite. Peri ape, fenesi te'eye ape ake ma'e henerai ta'ame."

²⁵Sosu a'i pe lowesi Meni Owane Pefine lo peri lu taune werese ma'e au te'eteye su, lowesi Samaria lo omo omo au te'eteyewe, omo Jerulalem ma'e si tame fai.

Filip Itiopia lo meni owane ma'e au te'eye.

²⁶Sosu a'i pe Meni Owane Pefine lo ipari wisere a'i Filip ma'e apou ekiye, "Ne yo mai ta fau ma'e itori. Yo mai ape lu ariye a'i ne. Yo mai ape lowe omo Jerusalem arunatiyewe, omo Gasa sahe itorai." ²⁷Sosu Filip yo mai sahe iteye su, meni owane ta, pani Itiopia ma'e fai ape, siyeye. Meni ape meni owane erasi a'i ne. Itiopia lo menitani owane tutawe, iyape Kandasi. Le menitani owane lo ma'aru werese au noweinoweiteye. Meni ape Jerusalem fai su, le Owane Sitewi lo wesi tutawe sahe Owane Sitewi ne au te'e wisereyeyei ne fai. ²⁸Sosu omo topo lo si tame iteye su, le wai tere'e ta awei pani ma'e uweisiya ape, sahe onuwe. Le Owane Sitewi lo one towi sahe siye te'eteye. One towi ape sahe le Owane Sitewi lo au te'e siye meni, Aisaia, lo peri au siye te'eye. ²⁹Sosu Owane Sitewi lo Hepene Wara'i a'i lai Filip ma'e apou ekiye. "Ne wai ape ma'e ataheye teirire." ³⁰Sosu a'i pe Filip wai ape ma'e ataheye teirai. Iteroti su, le meni ape, peri siye te'eye ape, wanuwe. Le Owane Sitewi au te'e siye meni, Aisaia lo peri siye te'eye. Sosu Filip le ma'e apou ei toweriye, "Ne peri eite lo sitewi wanu so'oruweysi awere? Piyete awere?"

³¹Le itiya'u apou ekiye, "Ane peri eite lo sitewi wanu so'oru ta'ama. Meni ta lai ake sitewi lo au te'e atuatuwei su, ake fara'u peri lo sitewi wanu so'oruweyei." Sosu le Filip ma'e ekiye, "Ne wai papu ake mase wi onura." ³²Meni owane ape Owane Sitewi lo peri apou siye te'eye. Apou ekiye,

"Lowe le hene meme'iti, fe sipsip wou a'i naiye. Le fe sipsip yene wou a'i tahe towi touwei su, le hareyei se ta'ama. Le ahi lo au ei titaneye.

³³Lowe le ma'e te'e naruwe, Lowe le ma'e au luwaruwewe. Sosu Lowe le aine tera'eye. Serai owe meni ta lu feni ta ne au te'e ta'ame."

Ais 53:7-8

³⁴Sosu meni Owane ape Filip ma'e ei toweriye, “Au te'e siye meni ape le eiwerai ne leseye awere? Le topo lo leseye awere? Meni tere'e leseye awere?” ³⁵Sosu Filip Owane Sitewi lo peri ape, Aisaia leseye ape, Meni Owane ape ne au te'eye. Sosu mo'o le Jisas ne au te'e areiyeye. ³⁶Lowesi wai se itiye su, lowesi sa'i ta siyeye. Sosu meni owane ape apou eiye, “Siyete! Sa'i irosiya. Ne fara'u ane sa'i au huwei awere?”^e ³⁷Sosu Filip le ma'e apou eiye, “Ne Jisas lo peri ne marepi werese no se tote tawesiyei su, ne fara'u sa'i ani huwei.” Sosu meni owane ape itiya'u apou eiye, “Ei! Ane lai Jisas ne, Owane Sitewi lo ariariye siye meni, marepi werese ano se tote tawesiye. Ane Jisas Owane Sitewi lo meni eime poto ne tote tawesiye. Jisas lai Owane Sitewi lo meni eime ne. Ane marepi eite tote tawesiye.”

³⁸Sosu meni owane ape apou eiye, “Wai ano ape arure.” Sosu meni owane ape Filip aiwawe lowesi sa'i ma'e itowe. Sosu Filip lai le sa'i au huwe. ³⁹Sosu lowe sa'i arunati su, Meni Owane Pefine a'i lo Hepene Wara'i a'i, le Filip hene itero po'utenati. Sosu meni owane ape Filip tame siyeye ta'amie. Sosu le wai papu wi atowe su, omo topo lo marepi erasi a'i si tame wisereye nine'iti. ⁴⁰Sosu a'i pe Owane Sitewi lo Hepene Wara'i a'i lai Filip omo Asdot ma'e heneti. Sosu le omo omo werese sahe Jisas ne au te'e fiyariti. Au te'e fiyariye su, le omo Sisaria ma'e henerai.^f

Sol marepi hepene he'i atati aresaiyeye.
(Aposel 22:4-16; 26:9-18)

9 ¹Sosu a'i pe meni Sol peri ta au te'e fiyariteye. Le apou au eiye, “Nomo Jisas lo lu feni werese aine tera'eyei.” Serai le au heseyei meni owane ma'e fi.^g ²Le le ma'e apou ei toweriye, “Meni owane, ne ta'uweyei wesi werese ma'e, omo Damaskus irosiya ape, one towé ta lesere. Ne apou lesere, ‘Lu taune, eimane werese, Jisas lo marepi umasiye ape, irosiya su, sosu ane fara'u lowe werese omo Jerusalem ma'e kalabus wesi ma'e si tame henetaiyei.’” Sosu Sol one towé eite aniyé su, le omo Jerusalem ma'e arunatiyewe, omo Damaskus ma'e iteyé.

³Sosu le lu tamò mase omo Damaskus ataha a'i iteyé su, sosu witane a'i ni'arawe ma'e mitaiyeyei erasi itorai. Mitaiyeyei ape lai lowe werese ani napetuwe. ⁴Sosu Sol awei sahe wiyeineyewe, peri ahi erasi wanuwe. Peri ahi apou eiye, “Sol, Sol ne piyene ane au luwaruwéye awere?”

⁵Sosu Sol itiya'u apou ei toweriye, “Meni Owane Pefine a'i, ne eiwerai awere?” Peri ahi apou itiya'u eiye. “Ane a'i lai Jisas. Ne lai ane au luwaruwésiya. ⁶Ne sinere! Ne omo Damaskus ma'e ire. Sosu meni ta, piye etiri ne irowei ape, ne ma'e te'erowa.”

⁷Lu tere'e werese, Sol aiwawe iteyé ape, lowe hepene se su'ariye. Lowe peri eite wanuwe. Ahowa, lowe meni ape siye ta'amie. ⁸Sosu Sol awei

^e 8:36 Ap 10:47 ^f 8:40 Ap 21:8 ^g 9:1 Ap 8:3

sahe sineteye su, le nihe lo niso'uwe tawesiye. Le etiri werese siye ta'ame. Sosu lowe le omo Damaskus ma'e ereti se heneti.⁹ Poweiye hesi heta nihe niso'uwe tawesi ape, iroteye. Le ayei tamo a ta'ame. Sa'i a ta'ame.

¹⁰ Meni ta, Jisas lo peri umasiye ape, omo Damaskus sahe iroteye ape, iyape lo Ananaias. Sosu Meni Owane Pefine le ma'e suwou hamehamyei se uteye, "Ananaias." Le itiya'u apou ekiye, "Ei, Meni Owane Pefine, ane sato irosiya."

¹¹ Sosu Meni Owane Pefine apou ekiye, "Ne Judas lo wesi ma'e ire! Wesi ape sahe yo iyape 'Fareraiy'e' irosiya. Ne iyei su, ne Sol, omo Tarsus ma'e fai ape, ei aniy'e. Pereye a'i le ane ma'e au te'e tiyatiye.¹² Ane le ma'e suwou hamehamyei se au te'e eye. Le apou siyeye, 'Meni ta iyape lo Ananaias ereti lo se ne ma'e fuwewe, nihe no au ta'ane petaneye. Serai ne fara'u siyerowa.'

¹³ Sosu Ananaias itiya'u ekiye, "Meni Owane, meni ape lu feni no werese au luwaruvesiya. Ane peri heneruve ape wanuwe. Le lu feni no Jerusalem ma'e au luwaruweye.¹⁴ Le omo eite sahe au heseyei lu owane lo kairefi se fai. Le lu, taune, eimane werese, peri no umasiye ape, kalabus wesi ma'e henetirowa."

¹⁵ Sosu a'i pe Meni Owane Pefine lai Ananaias ma'e apou ekiye, "Ire! Ane meni ape ariariyeye. Le lu tewi tere'e ma'e iyape ano se au te'e fiyarirowa. Le peri ano lu tewi tere'e lo lu owane ma'e au te'e fiyarirowa. Sosu le peri ano Israel lo lu taune ma'e au te'e fiyarirowa.^h ¹⁶ Le peri ano au te'e fiyariyei su, le fofowei erasi teriterowa. Ane le ma'e fofowei erasi a'i au ataturowa."ⁱ

¹⁷ Sosu a'i pe meni Ananaias wesi ape papu wiye. Le ereti lo Sol hire ma'e isawe aniteye. Sosu le apou ekiye. "Kaiyemo Sol, Meni Owane Pefine a'i, Jisas nomo lo, ne omo ape sahe yanerai su, le ne ma'e yo sahe siyeye. Le ane ne ma'e eimawesai. Le nihe no au ta'ane petaneyei. Sosu le Owane Sitewi lo Hepene Wara'i a'i marepi hepene papu no ma'e eimawesai."

¹⁸ Pereye a'i etiri tamo hare tahe koropo wou a'i nihe lo la'e arowe. Sosu le si tame siyeteye. Sosu le sineye su, Ananaias lai le sa'i au huwe.¹⁹ Sosu le ayei tamo aye su, le tahe kairefi a'i henerai.

Sol omo Damaskus sahe au te'e fiyariye.

Sosu poweiye tomu ne'ese, Sol omo Damaskus sahe Jisas lo lu feni mase iroteye.

²⁰ Pereye a'i le ta'uweyei wesi sahe lu taune ma'e au te'e fiyariye. Le apou te'eye, "Meni ape Jisas, Owane Sitewi lo meni eime ne."

²¹ Lu taune werese peri ape wanuwe su, lowe hepene se su'ariye. Lowe apou ei toweriye, "Sawi Amou! Meni ape lu taune, Jisas lo marepi

^h 9:15 Ap 25:13; 27:24; Ro 1:5 ⁱ 9:16 2 Ko 11:23-28

umasiye ape, Jerusalem sahe iroteye ape, le lowe ma'e au luwaruweteye awere? Le omo ape sahe lu taune tamo wafei se ti tawesiyei ne toteye. Sosu au heseyei lu owane kalabus wesi ma'e henetiyei ne toteye.”^j

²²Sol Owane Sitewi lo peri au te'e fiyariye su, le peri lo Owane Sitewi lo kairefi se te'e fiyariye. Le lu taune werese ma'e, Owane Sitewi lai, Jisas ariariyeye ape, au te'e atuatuteye. Au te'eye su, lu taune tomu ne'ese hepene se su'ariye. Lowe le ma'e peri itiya'u te'erowata.^k

Juda lo lu tamo Sol ma'e ai marepi toteteye.

²³Nowe tomu ne'ese i tepa'asiye su, Juda lu owane lai Sol aine tera'eyei ne te'e nanekiye. ²⁴Ahowa, Sol lu owane lo peri ape ne wanuwe. Lu owane ape mo lai ai atu siye lu tamo yo tewiye sahe tei ninawe siye etiteye.

Lowe Sol aine tera'eyei ne toteye. ²⁵Lu feni lo le pasi a'i tapiye fisah pite a'i ma'e henetiye, lowe Sol ipi erasi papu tapiye fisah nowe hi ma'e ani ararowe. Sosu Sol omo tere'e iteroti.^l

Sol omo Jerusalem ma'e fi.

²⁶Sosu a'i pe le omo Jerusalem ma'e henerai su, le Jisas lo lu disaipel mase ta'uweyei ne toteye. Ahowa, lowe le mase ta'uwe ta'am. Lowe meni ape ne atoweiyeteye. Lowe marepi lowe lo apou toteye, “Meni ape Jisas lo peri umasi ta'am.”^m ²⁷Meni ta iyape, Barnabas, Sol Jisas lo lu disaipel ma'e heneti. Le lu feni ma'e apou te'eye, “Sol lai Meni Owane Pefine a'i nomo lo yo mai sahe siyeye. Meni Owane Pefine le ma'e au te'eteye.” Mo'o su Sol lu taune werese Damaskus sahe Jisas lo peri kairefi se au te'e fiyariye. Sosu le atoweiyta'am.ⁿ ²⁸Sosu Sol Jisas lo lu feni mase ta'uweye. Le lowe mase fiyari howeiye. Le Jisas lo peri kairefi se au te'e fiyariye. ²⁹Nowe ta se le lu tere'e tamo ma'e, pani Grik ma'e fai ape, te'e tiyatiteye. Lowe Sol ne ai peri erasi a'i toteye. Sosu lowe le aine tera'eyei ne toteye. ³⁰Sosu lu feni tamo, Jisas ne tote tawesiteye ape, peri lowe lo wanuwe su, lowe Sol omo Sisaria ma'e henetiye, omo Tarsus ma'e wai se eimawesawi.

³¹Sosu a'i pe lu taune werese, Jisas lo peri umasiteye ape, pani, omo Judia, omo pani Galili, omo pani Samaria. Lowe marepi fetane a'i iroteye. Lu taune werese ape mo tote tawesiyei lowe lo kairefi a'i henerai. Owane Sitewi lo Hepene Wara'i a'i lai lu taune werese ma'e kairefi lo auwe. Sosu lu taune tomu ne'ese lu feni mase ta'uwerai. Lowe Owane Sitewi ma'e au te'e wisereyeteye.

Pita meni Ainias lo u tahe au ta'ane fara'uweye.

³²Sosu a'i pe Pita omo omo tere'e ma'e fiyariti su, le lu taune, Jisas ne tote tawesiteye ape, omo Lida sahe iroteye ape, sewiyenarai. ³³Omo

^j 9:21 Ap 8:3 ^k 9:22 Ap 18:28 ^l 9:25 2 Ko 11:32-33 ^m 9:26 Ga 1:17-19 ⁿ 9:27 1 Ko 9:1

henerai su, le meni ta siyeye, iyape lo Ainias. Meni ape Lowe pa'are afofo a'i iyu menei ereti feni werese feni hesi heta (8) wari sahe howeiteye. Le uweirowata. ³⁴Sosu Pita le ma'e apou eiye, "Ainias, Jisas Krais lai ne au ta'lane fara'uvesiya. Ne sinere! Etiri werese no ta'uwere." Pereye a'i Ainias sineteye. ³⁵Lu taune werese, omo Lida, omo Saron iroteye ape, meni ape siyeye su, lowe Meni Owane Pefine a'i ma'e ani aresaiye umasiye.

Pita lai Tabita si tame au ta'ane norohuwe sineye.

³⁶Omo Jopa sahe menitani iyape Tabita, iyape tere'e Dorkas, Jisas lo marepi umasiye ape, le weriyei weriyei yo seni wisere a'i au ta'aneteye. Le lu taune werese ma'e, ma'aru etiri po'utseye ape, au pati ferafereiteye. ³⁷Sosu a'i pe le u erasi ta menitani ape ya'oreye. Sosu le temeniyeye. Lowe, Juda lo peri umasiteye ape, tahe pa'are lo sa'i au ani hu sasariye. Sosu lowe wesi tutu wari hire ma'e ani fuwe. ³⁸Omo Lida lai omo Jopa ataheyeye su, lu taune Jisas ne umasiteye ape, lowe Pita, omo Lida sahe iroteye ape wanuwe su, lowe lu hesi le ma'e eimawesawi. Lowesi apou te'eye, "Ne notosi mase omo Jopa ma'e fa aiya." ³⁹Sosu pereye a'i Pita sineyewe, lowesi mase omo Lida ma'e tame fai. Lowe henerai su, lowesi Pita wesi tutu papu wiye, Dorkas howeiteye ape, hene wiye. Lowe papu wiye su, weiname tomu ne'ese uruwei erasi irowe. Lowe ipari tahe tomu ne'ese, menitani ape ta'aneye ape, Pita ma'e au atatuwe. ⁴⁰Sosu Pita lu taune werese wesi tutu nowe ma'e eimawesawi. Sosu le lowe uporo ape'i onuwe su, le Owane Sitewi ma'e te'eye. Sosu le menitani lo tahe pa'are ma'e atati onuwe. Sosu le menitani ma'e eiye, "Tabita sinere!" Sosu menitani nihe lo petaneye. Sosu le Pita ma'e siyeye, le sine onuwe. ⁴¹Sosu Pita menitani ereti lo aniteyewe, ani sineye. Sosu le lu taune, Jisas ne umasiteye ape, sosu weiname werese ei aniye. Sosu le apou eiye, "Fene menitani ape siyere. Le norohu a'i irosiya." ⁴²Lu taune werese, omo Jopa irosiya ape, etiri ape wanuwe. Sosu lu taune tomu ne'ese Jisas ne tote tawesi umasiteye. ⁴³Sosu a'i pe Pita poweiye tomu ne'ese Jopa ma'e iroteye. Le meni Saimon, fe tahe ta'aneteye ape, lo wesi sahe howeiteye.

Meni Kornilius Pita ei aniy.

10 ¹Omo Sisaria sahe meni ta iyape Kornilius iroteye. Le ai atu siye lu tomu ne'ese (100 aiwawe a'i) au noweinoweiteye. Ai atu siye lu ape mo lowe iyape apou au eiye, Itali lo ai atu siye lu. ²Le nohuweripi awaripi werese lo aiwawe a'i Owane Sitewi lo peri umasiteye. Lowe Owane Sitewi ne au te'e wisereyeteye. Le lu taune ma'e, etiri ma'aru po'utseye ape, ma'aru tomu ne'ese auwe. Le mi mi werese Owane Sitewi ma'e au te'e tiyatiteye. ³Nowe ta se poweiye wati su, le suwou hamehamyei ta siyeye. Le apou siyeye, Owane Sitewi lo ipari wisere a'i le ma'e ito eirai.

Owane Sitewi lo ipari apou eiye, "Kornilius." ⁴Sosu Kornilius le ma'e siye eti atoweiyeye. Sosu le apou ei toweriye, "Meni Owane Pefine, ne peri eiwerou te'esiya awere?" Sosu Owane Sitewi lo ipari itiya'u apou eiye, "Owane Sitewi lai peri no wanuteye. Le ma'aru no, ne lai lu taune tere'e ma'e auwe ape, siyeye. Owane Sitewi lai marepi erasi a'i ne ne au totesiya. ⁵Sosu ne lu tamo omo Jopa ma'e eimawesawi. Lowe meni ta iyape Saimon Pita hene aisera. ⁶Le Saimon tere'e lo wesi irosiya. Meni ape Saimon fe tahe ta'anе siye meni. Wesi lo sa'i tewiye sahe irosiya." ⁷Sosu a'i pe Owane Sitewi lo ipari wisere a'i si tame fi su, Kornilius wiyawi lu hesi a'i ei aniyе. Le ai atu siye meni tere'e lo ta, Owane Sitewi lo peri umasiye ape, ei aniyе. ⁸Sosu Kornilius lowe ma'e etiri werese ape au te'eye. Au te'e tepa'asiye su, le lowe omo Jopa eimawesawi.

Pita suwou hamehameyei wou siyeye.

⁹Sosu a'i pe lowe pasi a'i iteye su, nowe esi omo Jopa ma'e atahе a'i henerai.

Sosu a'i pe poweiye po a'i Pita wesi aite ma'e wiye. Le Owane Sitewi ma'e au te'e tiyatiyei ne fi. ¹⁰Sosu le lau erasi mase teriteye. Le ayei ta areme. Lowe ayei tamo ta'uweye su, le hamehameyei ta siyeye. Le apou siyeye, ¹¹Ni'arawe erauwi fiyariye. Le ipari tahe erasi oweriye hesiyo hesiyo se hi awei ma'e te'e sahe ararowi siyeye. ¹²Ipari tahe erasi sahe ayei etiri werese luwaru a'i se itorai, fe luwaru a'i, haru luwaru a'i, irowe luwaru a'i, awiye luwaru a'i, etiri werese ayei amou a'i siyeye. ¹³Sosu peri ahi ta apou eiye, "Pita sinere! Ne etiri eite tamo aine tera'e are."

¹⁴Sosu Pita itiya'u eiye, "Ahowa! Meni Owane Pefine, ane ayei etiri luwaru werese a'i arowata. Ayei etiri eite mo oro'oru a'i. Eite amouweyei ne."^o

¹⁵Sosu peri ahi tame eiye, "Ne ayei etiri werese eite mo oro'oru a'i owe ape te'e're. Ane ayei etiri werese eite mo amerame a'i au irowe. Ne fara'u are."^p ¹⁶Sosu peri ahi nowe hesi heta tame te'eye. Sosu ipari tahe ape si hire ni'arawe ma'e wiye.

¹⁷Pita suwou hamehameyei ape ne toteye su, Kornilius lo lu ape mo Saimon, tahe ta'anе siye meni lo wesi, nehiteye. ¹⁸Henerai su, lowe apou te'e toweriye, "Saimon Pita irosiya awere? Piyete awere?"

¹⁹Sosu Pita suwou hamehameyei toteteye su, Owane Sitewi lo Hepene Wara'l le ma'e apou eiye, "Saimon, Lu hesi heta ne ne ei aniyе. ²⁰Sinere! Wesi papu hi itore. Ne lowe mase ire. Ne marepi erasi a'i owe ape totere. Ane lai lowe ne ma'e eimawesai." ²¹Sosu Pita hi ma'e itoraiyewe, lowe ma'e eiye, "Ane lai ne, fene ei aniyе ape. Fene piyene ane nehiyei ne fai awere?"

^o 10:14 Wkp 11:1-47; Ese 4:14 ^p 10:15 Mk 7:15,19

²²Sosu lu ape mo apou itiya'u eiye, “Meni Kornilius nomo ne ne nehiyei ne eimawesai. Meni ape yo seni farere a'i ne. Le Owane Sitewi lo peri werese umasinamisiya. Juda lo lu taune werese meni ape ne marepi wisere a'i toteye. Owane Sitewi lo ipari wisere a'i ta meni ape ma'e ito eirai, ‘Ne Saimon Pita hene aiseri. Le Owane Sitewi lo marepi werese a'i ne ma'e au te'erowa.’ ”

²³Sosu Pita lowe wesi papu ene ayei ne ei aniye. Sosu lowe wesi ape sahe pasi a'i howeiye.

Pita Kornilius lo wesi ma'e fi.

Esi mitaiyeyei su, Pita, lu hesi heta, lu tere'e tamo, Owane Sitewi lo peri umasiteye ape, aiwawe omo Jopa arunatiyewe fi.

²⁴Lowe yo sahe howeiteye. Sosu esi a'i lowe omo Sisaria ma'e henerai. Sosu Kornilius lowe ninaweteye su, le lu feni werese lo, kaiyemo tamo lo ei ta'uwerai. ²⁵Sosu Pita wesi papu wiye su, Kornilius le ma'e lowe uporo ape'i onuraiyewe, le ma'e au te'e wisereye nine'iteye. ²⁶Ahowa, Pita le ma'e eiye, “Sinere! Ane a'i lai meni yahowa'i ne. Ne ane ma'e lowe uporo ape'i owe ape onure!”^q ²⁷Pita le mase te'e tiyatiteye su, lowesi wesi papu wiye. Wesi papu wiye su, le lu taune tomu ne'ese, wesi sahe ta'uwerai ape, siyeye. ²⁸Sosu le lowe ma'e apou te'eye, “Fene etiri ape ta so'oruvesiya tene! Nomo, Juda lo lu tewi ma'e fai ape, nomo lu tewi tere'e mase teirowata. Eite amou ne. Ahowa, Owane Sitewi lai ane ma'e etiri ta au atuatuwe, ‘Ane lu tamo oro'oru a'i wou eirowata.’ ²⁹Serai Kornilius ane ei aniye su, ane witane a'i fai. Sosu ane ne ma'e apou ei towerisiya, ‘Ne piyene ane ei aniye awere?’ ”

³⁰Sosu Kornilius apou eiye, “Pasi hesi heta i tepa'asiye su, ane poweive wati su Owane Sitewi ma'e au te'e tiyatiteye. Pereye aiwawe a'i meni ta ipari tahe wapo a'i ane metete ma'e teirai.

³¹Sosu ane ma'e apou eiye, ‘Kornilius, Owane Sitewi lai peri werese no, ne le ma'e te'eteye ape, wanuwe. Le ma'aru no, ne lai lu taune tere'e ma'e auwe ape, siyeye. ³²Serai ne Saimon Pita, omo Jopa irosiya ape, hene aiseri. Le Saimon tere'e fe tahe ta'ane siye meni lo wesi irosiya. Saimon lo wesi sa'i tewiye sahe irosiya.’ ³³Serai ane pereye a'i ne ei aniye. Owane Sitewi lai nomo mase irosiya. Ne saro ahe fai su, ane marepi wisere erasi a'i terite wisereyeye. Sosu ane lu tewi ano, lu taune tere'e tamo ei ta'uwe aniye. Nomo Owane Sitewi lo marepi werese, Owane Sitewi ne ma'e au te'eye ape, wanuwei ne totesiya.”

^q 10:26 Ap 14:13-15; KTH 19:10

Pita, Krais lo peri Kornilius ma'e au te'e areiyeye.

³⁴Sosu a'i pe Pita lowe ma'e eiye, "Peri ape wiyeme a'i. Ane etiri ta so'oruweiya. Owane Sitewi lai lu taune werese aiwawe a'i siyesiya."
³⁵Lu taune omo omo werese sahe Owane Sitewi ma'e au te'e wisereyeyei su, le yo seni aseyaro a'i irowei su, Owane Sitewi lai lu taune apo mo le topo lo ma'e ei aniyei. ³⁶Fene werese etiri ape so'oruweiya. Owane Sitewi lai Juda lo lu taune werese ma'e peri lo eimawesai. Owane Sitewi lo peri wisere a'i apou te'esiya, 'Jisas Krais lai lu taune werese ma'e peri fere au te'esiya. Jisas ne, le lai Meni Owane Pefine lu taune werese ma'e henerai.' ³⁷Fene etiri werese, Judia lo pani werese sahe henerai ape, wanuwe. Tu Jon omo Galili sahe lu taune werese ma'e apou au te'e fiyariye, 'Lu taune werese fene yo seni luwaru werese a'i fene lo atati awetore. Sosu fene sa'i ani hure.'^s ³⁸Fene etiri ape mo, etiri werese mo'o henerai ape, so'oruweiya. God lai Hepene Wara'i lo kairefi lo mase Jisas omo Nasaret lo meni ma'e auwe. Sosu le omo tere'e tere'e ma'e lu taune tomu ne'ese wiyawu erasi au ta'aneteye. Le lu taune werese, sepei Satan marepi hepene papu iroteye ape, au ta'ane sasarisawi. Owane Sitewi lo kairefi le mase iroteye.^t ³⁹Nomo lu disaipel lo, etiri werese Juda lo pani werese sahe, omo Jerusalem sahe nomo Jisas lo wiyawu erasi pefine a'i siyeteye. Lowe le me tape'i sahe ni'ari se aine tawere tera'eye. ⁴⁰Ahowa, Owane Sitewi lai le si tame ta'ane norohuwe sineye. Le poweiyehesi heta fisiye yo sahe iroteye. Sosu Owane Sitewi lai le si tame ta'ane norohuwe hene sineye. Sosu si tame sineye su, lu taune tomu ne'ese lai le siyeteye. ⁴¹Owane Sitewi lai lu taune werese ma'e le au atuatu ta'am. Ahowa, Owane Sitewi lai lu taune tamo fara'u siyeyei ne au ariariyeye. Jisas si tame norohuwe sineye su, nomo a'i lai le mase ene aye, sa'i ene aye.^u ⁴²Sosu le nomo ma'e apou eiye, 'Fene lu taune werese ma'e te'e fiyarite. Ane meni ape, Owane Sitewi lai ariariyeye ape. Owane Sitewi lai ane ma'e kairefi lo se lu taune werese, temeniye ape, norohuwe irosiya ape, yo seni werese lowe lo au hese etirowa.'^v ⁴³Tu naifa Owane Sitewi lo au te'e siye lu werese le ne au te'e areiyeye. Lu taune werese, peri lo umasiteye ape, Owane Sitewi lai Jisas lo kairefiyeyei se lowe ma'e yo seni luwaru a'i lowe lo au ani sasari pamowerowa."^w

Lu tewi tere'e tamo Hepene Wara'i aniyeye.

⁴⁴Sosu a'i pe Pita au te'e tepa'asiye su, Owane Sitewi lo Hepene Wara'i lu taune werese ma'e, peri lo wanuwe ape, itorai.^x ⁴⁵⁻⁴⁶Lowe lu taune

^r 10:34 Lo 10:17; Ro 2:11 ^s 10:37 Mt 4:12-17 ^t 10:38 Mt 3:16; Lu 4:17-20

^u 10:41 Ap 1:8; Lu 24:42-43 ^v 10:42 Ap 17:31; 1 Pi 4:5 ^w 10:43 Ais 53:5-6; Jer 31:34

^x 10:44 Ap 11:15; 15:8

peri tere'e se, Owane Sitewi ma'e au te'e wisereyeye ape, wanuwe. Juda lo lu, Jisas lo peri umasiteye ape, Pita mase fai ape, lowe hepene se su'ariye. Serai lowe apou te'eye, "Sawi amou! Owane Sitewi lai Hepene Wara'i a'i lo lu taune tere'e tere'e ma'e auwe."^y ⁴⁷Sosu a'i pe Pita apou eiye, "Owe lu tamo lu taune sa'i au ani huwei ne owe ape amouweye. Lu taune werese eite Owane Sitewi lo Hepene Wara'i a'i nomo aiwawe anije." ⁴⁸Serai Pita apou eiye, "Fene lu taune werese ma'e Jisas Krais lo kairefi se sa'i au ani hure." Sosu lowe Pita ma'e apou ei toweriye, "Ne fara'u poweiye tamo nomo mase tei irorowa awere?"^z

Pita lu tewi tere'e ne omo Jerusalem sahe au te'e fiyariteye.

11 ¹Sosu a'i pe lu aposel ape mo, sosu lu tere'e, Jisas ne umasiteye ape, omo pani Judia iroteye ape, lowe lu tewi tere'e Owane Sitewi lo peri tote tawesi umasiteye ape, wanuwe. ²Sosu Pita omo Jerusalem ma'e si tame yaneye su, Juda lo lu tamo, Jisas lo peri umasiye ape, lowe Pita ma'e ai peri erasi au te'eye. ³Lowe apou te'eye, "Ne lu tewi tere'e luwaru a'i lo wesi papu wiywewe, sosu lowe mase ene aye. Yo seni ape amouwesiya tene!"^a ⁴Sosu Pita etiri werese henerai ape, lowe ma'e itiya'u apou au te'eye, ⁵"Ane omo Jopa sato onuteye su, ane Owane Sitewi ma'e au te'e tiyatiteye. Sosu ane suwou hamehameyei ta siyeye. Ane ipari tahe erasi ni'arawe sahe, oweriye hesiyo hesiyo se hi awei ma'e itorai ape, siyeye."^b ⁶Ane ipari tahe papu siyeye su, ane ayei etiri lowe pa'are hesiyo hesiyo ape siyeye. Ane ayei etiri werese luwaru a'i itorai, fe luwaru a'i, haru luwaru a'i, irowe luwaru a'i, awiye luwaru a'i, etiri werese ayei amou a'i siyeye. ⁷Sosu ane etiri ape mo siyeye su, peri ahi ta ane ma'e apou eiye, 'Pita sinere! Ayei etiri tamo aine tera'e are.' ⁸Sosu ane itiya'u eiye, 'Ahowa! Meni Owane Pefine, ane etiri luwaru a'i werese arowata. Etiri oro'oru werese a'i ane ahi papu furowata.' ⁹Sosu peri ahi tame eiye, 'Owane Sitewi lai etiri ape mo amerame a'i au irowe. Ne ayei etiri werese ape mo oro'oru a'i owe ape te'ere.' ¹⁰Ane peri ahi ape nowe hesi hetu wanuwe. Sosu ipari tahe ni'arawe ma'e si tame wiye. ¹¹Sosu a'i pe pereye a'i, lu hesi hetu wesi sahe henerai. Meni ta Sisaria ma'e ape, lowe ane ma'e eimawesai. ¹²Sosu Owane Sitewi lo Hepene Wara'i a'i ane ma'e apou eiye, 'Ne fara'u lowe mase si ire.' Sosu ane lu ertu feni werese feni ta'i ape mo (6), Jisas lo peri umasiteye ape, aiwawe fi. Nomo meni ape lo wesi papu wiye. ¹³Meni ape lai nomo ma'e, le Owane Sitewi lo ipari wisere a'i siyeye ape ne, te'eteye. Owane Sitewi lo ipari ape apou eiye, 'Ne meni ta iyape Saimon Pita omo Jopa sahe hene aiseri. ¹⁴Meni ape aiyeyei su, le Owane Sitewi lo marepi werese ne ma'e au te'erowa. Ne peri ape wanuwei su, Owane Sitewi lai ne lu feni no mase marepi

^y 10:45-46 Ap 2:4; 19:6 ^z 10:48 Ap 2:38 ^a 11:3 Ap 10:28; Ga 2:12 ^b 11:5 Ap 10:9-48

hepene he'i a'i aurowa.^c ¹⁵Ane lowe ma'e au te'eteye su, Owane Sitewi lo Hepene Wara'i a'i lowe ma'e itorai. Le nomo ma'e tu aiwawe a'i itorai.^d

¹⁶Sosu ane Owane Sitewi lo peri tame tote tawesiye. Jon lu taune ma'e sa'i se au ani huwe. Sosu Owane Sitewi lai fene ma'e Hepene Wara'i a'i lo au ani hurowa.^e ¹⁷Owane Sitewi lai Hepene Wara'i a'i lo lu tewi tere'ma'e au eimawesai. Nomo Jisas lo peri umasiye su, nomo tu aiwawe a'i Owane Sitewi lo Hepene Wara'i a'i aniye. Ane a'i lai Owane Sitewi owe ape einamite."

¹⁸Sosu lowe peri ape wanuwe su, lowe ai marepi tote ta'ame. Lowe Owane Sitewi ma'e au te'e wisereyeye. Lowe apou eiye, "Serai lu taune tere'e tamo marepi hepene atati awetowei su, Owane Sitewi lai lowe ma'e aiwawe a'i marepi hepene he'i a'i auwei."^f

Lu taune, Jisas ne tote tawesiteye ape, omo Antiok sahe iroteye.

¹⁹Nowe tu naifa lu tamo meni Stiven ma'e au luwaruweye su, lu taune tomu ne'ese omo omo tere'e ma'e atoweiye fiyariti. Lowe omo pani Fonisia, kemere Saiprus, omo Antiok ma'e fi. Lowe Jisas lo peri Juda lo lu taune ma'e au te'e fiyariye.^g ²⁰Sosu lu tamo, kemere ta iyape Saiprus ma'e fai ape, Sairini ma'e fai ape, lowe omo Antiok sahe Meni Owane Jisas ne lu taune tere'e ape mo ma'e au te'eye. Lu taune omo pani Grik ma'e fai. ²¹Sosu Jisas lo kairefi lowe mase iroteye. Serai lu taune tomu ne'ese yo seni luwaru a'i atati arunatiyewe, Jisas ne umasiteye. Sosu Owane Sitewi lai lowe ma'e marepi hepene he'i a'i auwe.

²²Sosu Jisas lo lu feni omo Jerusasem sahe peri heneruwe ape wanuwe su, lowe meni ta, iyape Barabas, omo Antiok ma'e eimawesawi.^h ²³Sosu le omo Antiok ma'e henerai su, le Owane Sitewi lo kairefiyeyei lu taune ma'e itoraiye siyeye. Le Owane Sitewi ma'e marepi erasi a'i au te'e wisereyeteye. Le lowe ma'e apou eiye, "Fene Owane Sitewi lo peri, sosu Owane Sitewi lo yo wara'i a'i fa umasi etite. Fene yo tere'e umasirowata."ⁱ ²⁴Meni eite Barnabas meni wisere a'i ne. Owane Sitewi lo Hepene Wara'i a'i marepi hepene lo papu teme'eriyanamiteye. Le Meni Owane Pefine a'i lo marepi tote tawesi umasinamiteye. Meni ape Jisas ne au te'eye su, lu taune tomu ne'ese yo seni luwaru a'i atati arunatiyewe, Meni Owane Pefine a'i ma'e umasinamiteye.

²⁵Sosu a'i pe meni Barnabas omo Tarsus ma'e fi. Le meni Sol nehiti.ⁱ

²⁶Le meni ape siyeye su, le le omo Antiok ma'e si heneti. Sosu lowesi yame tomu ne'ese Owane Sitewi lo lu feni aiwawe a'i iroteye. Lowesi Owane Sitewi lo marepi werese lowe ma'e au te'e atuatuteye. Lu taune tomu ne'ese Owane Sitewi lo peri wanuteye. Sosu lowe Krais lo lu feni

^c 11:14 Ap 16:31 ^d 11:15 Ap 2:4 ^e 11:16 Ap 1:5 ^f 11:18 Ap 13:48; 14:27

^g 11:19 Ap 8:1-4 ^h 11:22 Ap 4:36 ⁱ 11:25 Ap 9:30

Antiok sahe ma'e iyape he'i a'i au te'eye. Iyape he'i a'i ape apou aiwawe 'Kristen.'

²⁷Sosu poweiye eite se Owane Sitewi lo au te'e siye lu tamo omo Jerusalem ma'e arunatiyewe, omo Antiok ma'e fai. ²⁸Owane Sitewi lo au te'e siye meni ta, iyape Agabus, le Owane Sitewi lo Hepene Wara'i a'i se ponei sahe sine teiteye su, le apou eiye, "Nowe me'iye su omo omo werese sahe ayei werese ariye po'uterowa." Awei meni owane Klodius lo nowe se etiri ape wiyeme a'i henerai.^j ²⁹Lu taune meni Agabus lo peri wanuwe su, lowe ma'aru tamo ta'uwe aniye. Lu tamo, ma'aru erasi iroteye ape, ma'aru tomu ne'ese auwe, lu tamo ma'aru oso a'i iroteye ape, ma'aru oso a'i auwe. Lowe ma'aru werese lu taune, Jisas ne umasiye ape, omo pani Judia sahe ausawi. ³⁰Lowe lu hesi Barnabas, Sol lowesi ma'aru ape, lowe ta'uwe aniye ape, aitiyei ne ariariyeye. Lowesi ma'aru ape mo lu owane ma'e, Jisas ne tote tawesinamiteye ape, aiti.^k

Awei meni owane Herot lai Jems aine tera'eye.

12 ¹Sosu a'i pe poweiye ape se awei meni owane tutawe, iyape Herot,^l lu taune ma'e, Jisas ne umasiteye ape, au luwaruweteye. Serai le Jisas lo lu feni tamo ereti se anite tawesiyewe, kalabus wesi ma'e fu arunari. ²Le ai atu siye lu tamo ma'e apou eiye, "Fene meni Jems, Jon lo airu hene aiseriyewe, ipari mene'e se aine tera'ere." ³Jems aine tera'e tepa'asiye su, Juda lo lu taune etiri ape ne marepi wisere a'i ne. Serai meni owane Herot marepi wisere a'i lowe lo siyeye su, le apou toteye, "Ane Pita aiwawe a'i ereti se anite tawesiye. Sosu ane mo'o aiwawe a'i le aine tera'eyei." Nowe ape se Juda lo lu taune tomu ne'ese ta'uwe hereiyei ta ta'uwe aniye. Ta'uwe hereiyei ape lo iyape "Nau Meiyei Ta'ama." Lowe nau opaiyei su, lowe etiri ta nau sahe fu aro ta'am. ⁴Sosu le Pita ereti se anite tawesiyewe, kalabus wesi ma'e hene arunarai. Herot ai atu siye lu tomu ne'ese Pita ma'e ninaweyei ne eimawesawi. Nowe esi a'i ai lu hesiyo hesiyo Pita ninaweteye. Poweiye po se ai lu hesiyo hesiyo tere'e le tei siye ninaweteye. Sosu pasi a'i ai lu hesiyo hesiyo tere'e Pita tei siye ninaweteye. Sosu pasi po ai lu hesiyo hesiyo tere'e le tei siye ninaweteye. Ta'uwe hereiyei ape, iyape Pasova, i tepa'asiye su, Herot Pita lu taune werese ponei ma'e henetiywewe, le etiyei ne toteye. Mo'o lu taune werese siyeyei su, le Pita aine tera'erowa. ⁵Sosu a'i pe Pita kalabus wesi sahe iroteye su, lu taune werese Jisas ne tote tawesiteye ape, Owane Sitewi ma'e Pita ne au te'e toweri etiteye.

^j 11:28 Ap 21:10 ^k 11:30 Ap 12:25 ^l 12:1 Owane Sitewi lo one tote hesi heta iroteye. Herot tutawe, le awei meni owane tutawe iroteye su, menitani Maria Jisas auteiye. Herot to'uressi, le lu taune Jisas ne umasiteye ape mo, au luwaruweteye. Le Jems aine tera'eye. (Aposel 12:1-2) Herot faforu, le Herot Agripa. Le Herot to'uressi lo meni eime. Le Pol lo peri wanutuye. (Aposel 26:2-7:23)

Owane Sitewi lai Pita kalabus nowe ma'e hene arosai.

⁶Pasi a'i Herot apou toteye, “Ane aperi Pita lu taune werese ponei ma'e henetirowawe, etirowa.” Sosu Pita kalabus wesi papu howeiteye su, ai atu siye meni ta'i eyate feni ma'e wafei se ti tawesiye, meni ta'i epi feni ma'e wafei se ti tawesiye. Lu hesi yo sahe ninaweteye. ⁷Pereye a'i Owane Sitewi lo ipari wisere a'i kalabus wesi papu ponei sahe itorai. Mi erasi kalabus wesi sahe tewi mitaiye fiyariye. Sosu le Pita ma'e ani eisoweye. Sosu le ma'e eiye, “Witane a'i sinere!” Sosu le sineye su wafei hesi ereti sahe ani erau ararowe. ⁸Sosu a'i pe Owane Sitewi lo ipari ape le ma'e eiye. “Ipari tahe no ani asire. Lowe tahe no ani asire.” Sosu Pita ipari tahe, lowe tahe topo lo ani asiye. Sosu tame eiye, “Ipari tahe erasi ape'iyе atati asiyewe, sosu ane mo'o umaskiye.” ⁹Sosu Pita Owane Sitewi lo ipari wisere a'i ape kalabus wesi nowe ma'e umasiti. Ahowa, Pita etiri ape so'oru ta'ama. Le suwou hamehameyei aiwawe a'i siye toteye. ¹⁰Lowesi lu hesi, tei siye ninaweteye ape, awera'iyenatiywе fi. Sosu lu hesi tere'e yo sahe, tei siye ninaweteye ape, awera'iyenatiywе fi. Sosu lowesi kalabus wesi lo yo kairefi erasi henerai su, sosu yo ape toso howeiyе. Sosu lowesi nowe ma'e henerai. Lowesi eyeri oso a'i iteye su, Owane Sitewi lo ipari ape le arunatiywе, ni'arawe hire ma'e wiye.^m

¹¹Sosu Pita aiwawe toteye, “Etiri eite wiyeme a'i. Owane Sitewi lai ipari lo ane ma'e eimawesai. Sosu ane kalabus wesi arunatiywе, Herot aiwawe awera'iyenati. Serai etiri werese Juda lo lu taune ane ne au luwaruwеyei ne toteye ape, awera'iyenati.”

¹²Le etiri ape mo tote tepa'asiye su, le Maria lo wesi ma'e fi. Maria meni eime lo, iyape Jon Mak tu naifa auteiyе. Lu taune tomu ne'ese Owane Sitewi ma'e au te'e toweriyеi ne ta'uwerai. ¹³Sosu Pita yo sahe aine ta'aruteye. Sosu wiyawi menitani ta, iyape Roda, yo tosowi ne fi. ¹⁴Sosu Pita lo peri ahi wanuwe su, le marepi erasi nine'iteye. Serai le yo toso ta'ame. Le si tame iterotiyewe, lu taune werese ma'e eiye, “Wanure, Pita wesi yo nowe ma'e sahe teisiya!” ¹⁵Lowe le ma'e apou eiye, “Piyete. Ne meremereye a'i henerai.” Sosu menitani ape tame te'eye. Sosu lowe apou te'eye, “Nomo so'oru ta'ama. Pita lo hepene yo sahe teisiya aware?”

¹⁶Sosu a'i pe Pita yo sahe tame aine ta'aruteye. Lowe yo tosowe su, Pita siyeye. Lowe marepi hepene se su'ariye. ¹⁷Sosu Pita peri lowe lo au einamiye. Sosu eiye, “Owane Sitewi lai ipari wisere a'i lo kalabus wesi ma'e eimawesai. Le wafei ano ani erauwe. Sosu ane kalabus wesi nowe ma'e heneti.” Sosu le tame eiye, “Fene meni Jems, Jisas lo pa'ise, sosu lu taune Jisas ne umasiteye ape, aiwawe a'i etiri ape mo ne au te'ere.” Sosu le lowe ma'e te'e tepa'asiye su, Pita wesi tere'e ma'e fi.

^m 12:10 Ap 5:19

¹⁸Sosu esi a'i ai atu siye lu werese hepene se su'ari luwaru a'i irowe. Lowe apou te'e toweriye, "Meni ape Pita, eiwerou ma'e fi awere?"ⁿ ¹⁹Sosu Herot Pita siyeyei ne nehiteye su, le siye ta'ame. Sosu le ai atu siye lu apou ei toweriye, "Pita eiwerou ma'e irosiya awere?" Sosu lowe so'oru ta'ama. Sosu le ai atu siye lu tere'e tamo ma'e apou eiye, "Fene ai atu siye lu ape mo hene aitiyewe, lowe aine tera'ere." Sosu Herot, Judia lo pani arunatiyewe, omo Sisaria ma'e fetaneye itori. Poweiye tamo saro iroteye.

Herot temeniye.

²⁰Le omo Tair, omo Saidon lo lu taune werese ne ai peri erasi irowe. Sosu lowe Herot ma'e ta'uwerai. Lowe le peri te'e tiyatiyei ne toteye. Lowe omo pani ape ayei werese Herot lo pani ma'e aniyе. Serai lowe meni owane ma'e peri fere au te'eyei ne toteye. Lowe meni Blastus marepi towafi lowe lo eteye. Meni ape Blastus lai Herot lo wesi au noweinoweiteye.

²¹Sosu poweiye ta se Herot lu taune ma'e au te'eyei ne ariariyeye ape, le ipari tahe lo'u wisere a'i lo ani asiteye su, le awei meni owane tutawe lo me tuto'u saro onuteye. Sosu le lowe ma'e au te'eteye. ²²Le peri au te'e tepa'asiye su, lu taune werese hare uteyei erasi irowe. "Peri ahi ape god ta lo peri ahi wou ne. Le meni ta lo peri au te'e ta'ame." ²³Sosu pereye a'i Herot lai Owane Sitewi ma'e peri luwaru a'i au te'e naruteye. Serai Owane Sitewi lai ipari lo ta hi ma'e eimawesai. Sosu ipari ape i'lere tamo Herot lo tahe ma'e heneraiyei ne au irowe. Serai le temeniye.^o

²⁴Lu taune tomu ne'ese lai Owane Sitewi lo peri omo omo tere'e ma'e au te'e fiyariye.^p

²⁵Sosu lowesi meni Barnabas, Sol aiwawe wiyawi lowesi lo ta'ane tepa'asiye su, lowesi omo Jerusalem ma'e arunati. Meni Jon Mak lowesi mase fi.^q

Pol Jisas lo peri omo pani tere'e tere'e sahe au te'e fiyariteye.

(Aposel 13:1-21:14)

Barnabas, Sol Krais lo peri au te'eyei ne eimawesawi.

13 ¹Lu taune tomu ne'ese, Jisas lo peri umasiteye ape, omo Antiok iroteye. Owane Sitewi lo au te'e siye lu tamo, atuatu siye lu tamo aiwawe a'i iroteye. Iyape lowe lo apou aiwawe a'i, meni ta iyape, Barnabas, meni tere'e iyape Simeon, aiwawe a'i tahe lo iwise a'i ne. Meni Lusius omo Sairini ma'e fai. Meni ta iyape, Manain. Tu le meni owane

ⁿ 12:18 Ap 5:22-24 ^o 12:23 Dan 5:20 ^p 12:24 Ais 55:11 ^q 12:25 Ap 11:29-30; 15:37

Herot lo wesi sahe iroteye. Sosu meni, Sol, lu Owane ape mo, lowe lu taune, Jisas lo yo umasiteye ape, au noweinoweiteye. ²Sosu lowe Owane Sitewi ma'e au te'e wisereye nine'iteye. Lowe Owane Sitewi ne toteye. Lowe ayei siyenamiye aiawawe a'i su, Owane Sitewi lo Hepene Wara'i a'i lowe ma'e te'eye, "Fene lu hesi Barnabas, Sol aiawawe au ariariyere. Lowesi wiyawi ano ape ane lowesi ma'e ta'aneyei ne ariariyeye."^r

³Sosu lowe Owane Sitewi ma'e au te'e toweriye, ayei werese amouweye su, lowe lu hesi ape ma'e ereti isawe fuwewe, sosu Owane Sitewi lo wiyawi au ta'aneyei ne eimawesawi.^s

Lowesi kemere Saiprus ma'e fi.

⁴Sosu Owane Sitewi lo Hepene Wara'i a'i Barnabas, Sol aiawawe, lowesi eimawesawi su, lowesi omo Selusia itori. Omo Selusia henerai su, lowesi omo pani kemere erasi a'i Saiprus ma'e wai se iyatuti. ⁵Omo Salamis henerai su, lowesi Juda lo ta'uweyei wesi papu wiye. Lowesi Owane Sitewi lo peri au te'e fiyariteye. Meni Jon Mak le lowesi mase wiyawi lo au pati ta'aneteye.^t

⁶Lowe lu taune omo Salamis sahe au te'e tepa'asiye su, lowe kemere ma'e toneri. Kemere ma'e toneri su, lowe omo Pafos ma'e henerai. Saro ahe Juda lo au te'e siye meni wawero ta iyape Barjisas. Le yo seni sinariyei au ta'aneteye. ⁷Meni ape awei meni owane erasi ta iyape Sergius Paulus lowesi nati wafei wou titeye. Meni owane ape marepi wisere a'i toteteye. Sosu meni owane ape lai Barnabas, Sol, ei aniy. Le Owane Sitewi lo peri wanuwei ne toteye. ⁸Sosu sinariyei meni ape, Barjisas, iyape tere'e Elimas, peri tere'e Grik, te'eye. Le lowesi lo peri te'e einamiyei ne toteye. Le meni owane ape Owane Sitewi lo peri umasiyei wou ta'ama. ⁹Sosu Sol iyape tere'e Pol Owane Sitewi lo Hepene Wara'i kairefi se sinariyei meni ma'e siye etiteyewe, apou eiye, ¹⁰"Ne Satan lo meni eime ne. Ne etiri wisere werese a'i ne airame irosiya. Ne marepi hepene no etiri luwaru a'i wawero a'i papu irosiya. Ne lai Owane Sitewi lo peri areareyei ne totesiya. ¹¹Owane Sitewi lo ereti se ne ma'e isawe hetesiyei su, le nihe no niso'urowa. Serai poweiye ta se ne mitaiyeyei werese siyerowata." Pereye a'i nihe lo eiwerou a'i napetuwe. Sosu le meremereye a'i uweiteye. Le meni tere'e ta nehiteye. Sosu meni ape le fara'u yo au atuatuttirowa.^u ¹²Meni owane tutawe ape etiri ape mo siyeye su, le Owane Sitewi ne hepene se su'ariye. Le Meni Owane Pefine ne tote tawesi umasiteye.

Lowesi omo Antiok, pani Pisidia sahe, Jisas lo peri au te'e fiyariteye.

¹³Sosu a'i pe Pol lu feni tere'e tamo mase omo Pafos arunatiyewe, omo Perga, omo pani Pamfilia sahe wai se iyatuti. Meni Jon Mak, le lowesi

^r 13:2 Ap 9:15 ^s 13:3 Ap 6:6 ^t 13:5 Ap 12:12; 15:39 ^u 13:11 Ap 9:8

arunatiyewe, omo Jerusalem ma'e si tame fi.^v ¹⁴Sosu lowesi omo Perga arunati su, lowesi omo Antiok, omo pani Pisidia sahe iroteye ape, iteye. Sosu Owane Sitewi lo nowe se lowesi ta'uweyei wesi wi onuri. ¹⁵Sosu ta'uweyei wesi lo meni owane ta Moses lo yo peri, Owane Sitewi lo peri, Owane Sitewi lo au te'e siye lu leseye ape, le lu taune ma'e peri au siye te'eye. Lowe peri ape au siye te'e tepa'asiye su, lowe Pol, Barnabas ei aniye, lowesi ma'e apou te'eye, "Kaiyemo mo, fenesi peri wisere a'i tamo irosiya su, fara'u lu taune ma'e au te'ere." ¹⁶Sosu Pol sineteye su, ereti lo tesu isawe fuwe apou au te'eye, "Israel lo lu tewi werese, sosu lu tewi tere'e tere'e, fene, Owane Sitewi lo yo peri umasiteye ape, peri ano wanure. ¹⁷Israel lo lu taune lo Owane Sitewi Pefine a'i, le lu ya'ariyei nomo lo ariariyeye. Lu ya'ariyei nomo lo pani Isip iroteye ape, le lowe werese au noweinoweiteye. Sosu lowe Isip arunati su, Owane Sitewi lai kairefi erasi lo se pani tere'e sahe heneti.^w ¹⁸Sosu ya'ariyei aite nomo lo, lowe lai Owane Sitewi lo yo peri arisinamiteye su, lowe pani ariye a'i iyu menei lu hesi werese yahowa'i a'i fiyari uweiteye. Lowe yo seni luwaru a'i ironamiteye su, le lowe ne tote i'ane ta'lame.^x ¹⁹Mo'o su le lu tewi tere'e, omo pani Kenan sahe iroteye ape, lu tewi tere'e ereti feni werese, feni hesi a'i (7) hi ani ararosawi. Sosu omo pani lowe lo lu ya'ariyei nomo lo ma'e auwe.^y ²⁰Owane Sitewi lai lu tewi ape ma'e iyu menei (450 aiawwe a'i) au noweinoweiteye. Sosu nowe ape i tepa'asiye su, le lu taune ma'e lu owane tere'e tamo au noweinoweiyei ne auwe. Lu Owane tere'e ape mo lai Israel lo lu tewi au noweinoweiteye. Sosu Owane Sitewi lo au te'e siye meni iyape Samuel henerai.^z ²¹Sosu lu taune werese Owane Sitewi ma'e meni owane tutawe ta fa au ne ei toweriye. Sosu Owane Sitewi peri lowe lo wanuwe su, le Sol, Kis lo meni eime, lowe ma'e au noweinoweiyei ne auwe. Sol lai Benjamin lo niyene ma'e fai. Meni owane tutawe ape Israel lo lu taune werese iyu menei lu hesi werese (40) au noweinoweiteye.^a ²²Sosu Owane Sitewi lai Sol hi ani arosawi su, le meni owane tutawe Devit au ariariye henerai. Owane Sitewi lu tewi lo ma'e Devit ne au te'eye. Le apou eyie,

'Ane meni Devit siyeyei ne nehiye. Meni ape Devit Jesi lo meni eime, le marepi ano aiawwe a'i totesiya. Le marepi werese ano umasinamirowa.'

Sng 89:20

²³Sosu Devit lo lu tewi Owane Sitewi lai Israel lu taune ma'e meni ta ariariyeye ape, au te'e naneiye. Meni ape Israel lo lu taune werese ma'e marepi hepene he'i a'i aurowa. Tu naifa weriyei le peri te'e naneiyei ape au te'eye. Sosu pereye nowe eite se, peri te'e naneiyei ape, wiyeme a'i henerai.^b ²⁴Tu Jisas henerai ta'ama su, meni

^v 13:13 Ap 15:38 ^w 13:17 Kis 1:7; 6:6; 12:51 ^x 13:18 Nam 14:34; Lo 1:31

^y 13:19 Lo 7:1; Jos 14:1 ^z 13:20 Het 2:16; 1 Sml 3:20 ^a 13:21 1 Sml 8:5,19; 10:20-24

^b 13:23 2 Sml 7:12-16

ta iyape Jon, le Israel lo lu taune werese ma'e apou te'eye, 'Fene werese yo seni luwaru a'i atati awetore. Sosu fene fara'l'u sa'l au ani hure.'^c 25 Sosu Jon lo wiwayi ta'ane tepa'asiye su, le apou eiye, 'Piye marepi fene lo ne totesiya awere? Fene ane ne aiawae piye totesiya awere? Meni ape, fene ninawesiya ape, ane meni ape ta'ama. Le aiyerowa su, ane lowe tahe lo ani eraurowata. Le meni erasi a'i ne. Ane meni yahow'a! ali ne.'^d

26 Kaiyemo mo ano, Abraham lo lu tewi, sosu lu tewi tere'e tere'e, Owane Sitewi ne marepi erasi a'i tote etiteye ape, wanure! Owane Sitewi lai marepi hepene he'i a'i lo peri fene ma'e ausai. 27 Jerusalem lo lu taune werese, lu owane lowe lo aiawae a'i Jisas ne so'oru ta'ama. Ahowa, lowe meni ape temeniyeyei ne te'eye su, lowe Owane Sitewi au te'e siye lu lo peri wiyeme a'i wanu ta'ame. Peri ape lowe nowe amou se siye te'eteye ape, siye te'eteye. 28 Lowe Jisas yo seni luwaru a'i ta siye ta'ame. Ahowa, lowe meni Pailat ma'e apou te'e toweriye. 'Ne meni ape fa aine tera'ere.'^e 29 Lowe meni eite aine tera'eye su, peri werese ape, Owane Sitewi lo au te'e siye lu werese tu naifa leseye ape, wiyeme a'i henerai. Etiri werese henerai tepa'asiye su, lowe Jisas me tape'l'i hene ani itorai, fisiye yo papu fu arowe.^f 30 Ahowa, Owane Sitewi lai Jisas si tame ta'ane norohuwe hene aniye. 31 Nowe mi mi tomu ne'ese, le lu disaipel lo ma'e henerai. Lowe lai le siyeteye. Lu disaipel lo ape pani Galili arunatiyewe, omo Jerusalem ma'e henerai. Lu disaipel lo werese ape, lowe Israel lo lu taune ma'e au te'e fiyariye.^g 32 Notosi fene ma'e peri heneruwe wisere a'i au te'esiya. Peri heneruwe wisere a'i ape apou aiawae a'i te'eye, 'Owane Sitewi lai tu naifa ya'ariyei nomo lo ma'e peri lo au te'e naneiye. 33 Owane Sitewi lai Jisas si tame ta'ane norohuwe hene aniye su, Owane Sitewi lai peri lo wiyeme a'i au iro henerai. Ya'ariyei lu feni nomo lo peri te'e naneiyei wiyeme a'i aniye.' Tu naifa weriyei Devit one towे Buk Song nemeroru apou leseye,

'Ne eimane ano, pereye ane tai wiyeme a'i no henerai.' *Sng 2:7*

34 Owane Sitewi lai Jisas si tame ta'ane norohuwe hene aniye su, tahe pa'are lo uwaserowata. Tu naifa weriyei lowe le ne apou leseye,

'Tu naifa ane meni Devit ma'e peri tomu ne'ese te'e naneiyei auwe.

Serai ane fene ma'e peri pefine aiawae wisere a'i ano aurowa.'

Ais 55:3

35 One towе tere'e sahe meni ta apou leseye,

'Ne meni eime pefine a'i no uwaserowata.'

Sng 16:10

36 Sosu Devit Owane Sitewi lo wiwayi ta'ane tepa'asiye su, le temeniyeye. Lowe tahe pa'are lo fisiye yo papu fu arowe. Sosu tahe pa'are lo uwaseye.

37 Ahowa, meni ape Jisas, Owane Sitewi lai si tame ta'ane norohuwe

^c 13:24 Mt 3:1-2 ^d 13:25 Jo 1:20,27 ^e 13:28 Mt 27:22-23 ^f 13:29 Mt 27:59-60

^g 13:31 Ap 1:3,8

hene ankiye ape, tahe pa'are lo uwaseye ta'ame. ³⁸Serai kaiyemo mo ano, peri ano wanure! Meni ape, Jisas, yo seni luwaru werese fara'u a'i au ani sasari pamowerowawe, sosu yo seni luwaru a'i tote i'anenamirowa. Notosi peri ape fene ma'e au te'esiya. ³⁹Meni ape se, lu taune werese Jisas ne tote tawesi umasiye ape, Owane Sitewi lai yo seni luwaru werese a'i lowe lo au ta'ane sasari pamoweye. Tu naifa Owane Sitewi lai yo peri lo, Moses ma'e auwe ape, yo peri ape yo seni luwaru a'i au ani sasari pamowerowata.^h ⁴⁰Sosu Weiyai! Fene Owane Sitewi lo au te'e siye lu lo peri wanu etire. Fene peri lowe lo wanu ta'ame su, etiri ape mo fene ma'e henerairowa. Lowe apou leseye,

⁴¹ ‘Wanure! Fene, Owane Sitewi ma'e te'e naruwe ape, hepene se su'ariye iore. Sosu fene temeniyerowa. Nowe fene lo ane lai wiyawi erasi ta'anerowa. Fene wiyawi erasi ape siyeyei su, fene hepene se erasi a'i su'ariye irorowa. Meni ta etiri ape fene ma'e au te'eyei su, fene wiyawi ape tote tawesirowata.’ Hab 1:5

Owane Sitewi lo au te'e siye lu apou leseye.”

⁴²Sosu a'i pe peri lowesi lo peri tepa'asiye su, lowesi ta'uweyei wesi arunati. Ta'uweyei wesi arunati su, lu taune tamo lowesi ma'e apou te'eye, “Fenesi peri ape nowe amou se nowe me'iye su si tame au te'erowa.” ⁴³Lu taune ta'uweyei wesi arunati su, lu owane tamо lu tewi tere'e tamо, Juda lo yo peri umasiteye ape, lowesi ma'e mo'o umasiti. Lowesi lowe ma'e apou te'eye, “Fene Owane Sitewi lo ferafereiyei tote tawesi umasire.”

Pol nowe amou to'uresi se lu taune ma'e au te'e fiyariye.

⁴⁴Sosu lo nowe amou mo'o su lu taune werese ta'uweyei wesi ma'e Owane Sitewi lo peri wanuwei ne ta'uwerai. ⁴⁵Ahowa, Juda lo lu owane lu taune werese siyeye su, lowesi ma'e marepi kororu a'i iroteye. Lowe Pol lo peri ne te'e naruteye. Lowe le ne peri luwaru a'i te'e naruteye. ⁴⁶Sosu Pol, Barnabas aiawae a'i lowesi lowe ma'e itiya'u peri kairefi a'i se apou te'eye, “Tutawe nomo fene ma'e, Juda lo yo peri umasisiya ape, Jisas lo peri au te'eye. Ahowa, fene peri ape wanu tote tawesi ta'ame su, serai fene apou totesiya, ‘Nomo lu yahowa'i a'i ne. Nomo marepi hepene he'i a'i mi mi pasi pasi anriowata.’ Fene le ne tote tawesi ta'ame. Serai, nomo a'i lai lu tewi tere'e ma'e au te'e fiyariyei.ⁱ ⁴⁷Owane Sitewi lai nomo ma'e peri kairefi a'i apou au te'eye,

‘Ane fene ma'e lu tewi tere'e ma'e mi erasi wou tewi mitaiyeyei ne ariariyeye. Fene peri heneruwe omo omo werese sahe au te'e fiyariowa. Lowe peri ano wanuwei su, ane lowe ma'e marepi hepene he'i a'i aurowa. Serai nomo a'i lai lu tewi tere'e ma'e marepi hepene he'i a'i au te'e fiyariye.’ Ais 49:6

^h 13:39 Ro 10:4 ⁱ 13:46 Ap 3:26; 18:6

Peri ape Owane Sitewi lai kairefi se nomo ma'e au te'eye."

⁴⁸Sosu a'i pe lu tewi tere'e Jisas lo peri wanuwe su, lowe marepi erasi a'i wisereye nine'iteye. Lowe Meni Owane Pefine a'i lo peri ape ne te'e ani arowenamiteye. Sosu lu taune werese, Owane Sitewi lai marepi hepene he'i a'i auwei ne ariariyeye ape, lowe Jisas ne tote tawesi umasiteye.

⁴⁹Meni Owane Pefine a'i lo peri heneruwe wisere a'i omo omo werese ma'e au te'e fiyariye. ⁵⁰Ahowa, Juda lo lu owane tamo, lowe taune owane iyape se, Moses lo yo peri umasiteye ape, lu erasi, iyape se, lowe ma'e peri morose iroteye. Serai lowe Pol, Barnabas lowesi ma'e au luwaruwewayi ne toteye. Sosu lowe omo towafi lowe lo lowesi hene na'ari arosawi. ⁵¹Sosu a'i pe lowesi omo arunati su, lowesi lowe lo oro'oru werese sasari arosawi. Lowesi oro'oru sasari arosawi su, lowesi lu taune werese ma'e, Owane Sitewi lai lowe me'iyeni atati arunati ape, atuatuwe. Sosu lowesi omo Aikoniam ma'e fi.^j ⁵²Sosu Jisas lo lu feni werese lowe Owane Sitewi lo Hepene Wara'i a'i marepi hepene papu teme'eriye. Lowe marepi erasi wisereye nine'iteye.

Pol, Barnabas aiwawe omo Aikoniam ma'e fi.

14 ¹Sosu a'i pe lowesi omo Aikoniam ma'e henerai su, lowesi Juda lo ta'uweyei wesi ma'e wiye. Lowesi peri kairefi se au te'eteeye su, lu taune tomu ne'ese Jisas ne tote tawesiteye. Juda lo lu taune tamo, lu tewi tere'e lo lu taune aiwawe a'i, Jisas lo peri umasiye. ²Sosu Juda lo lu taune tamo, Jisas lo peri umasi ta'amé ape, lowe lu taune tewi tere'e ma'e peri morose a'i au te'eteye. Lowe marepi lu tewi lo ma'e afofo a'i iroteye. ³Sosu Pol, Barnabas aiwawe a'i, poweiye tomu ne'ese saro iroteye. Lowesi Meni Owane Pefine a'i ne, lu taune ma'e au te'e wisereye eye ape, peri kairefi a'i au te'eteye. Lowesi peri lo au te'eteye su, Owane Sitewi lai kairefi lo lowesi ma'e auwe. Sosu lowesi wiyawi erasi pefine a'i ta'aneteye.^k ⁴Sosu omo ape sahe lu taune werese marepi hesiyei toteye. Lu taune tamo Juda lo yo peri umasiteye. Sosu lu taune tere'e tamo Jisas lo marepi umasiteye.

⁵Sosu a'i pe lu tewi tere'e tamo Juda lo lu tewi tamo lowe werese ta'uwerai. Sosu lowe meni owane lowe lo marepi ta'i a'i toteteye. Lowe lai lowesi au luwaruwewayi ne toterowa. Lowe lai lowesi ma'e tapiye se fusawiyei ne toterowa.^l ⁶Sosu lu aposel peri ape ne wanuwe su, lowesi pani Likonia ma'e iteroti. Omo pani Listra, omo pani Derbe sahe iteroti. Pani lo ma'e aiwawe iteroti. ⁷Omo ape mo sahe lowesi lu taune ma'e peri heneruwe wisere a'i au te'e fiyariteye.

Lowesi Listra, Derbe sahe Krais lo peri au te'e fiyariteye.

⁸Lowesi omo Listra ma'e henerai su, lowesi meni ta lowe afofo a'i siyeye. Mai le auteiye su, meni ape lo lowe afofo a'i iroteye. Le mi

^j 13:51 Mt 10:14; Ap 18:6 ^k 14:3 Mk 16:20; Hi 2:4 ^l 14:5 Ap 14:19

mi weriyei uweite ta'ame. ⁹Sosu meni ape Pol lo peri wanuwe su, le marepi lo, Owane Sitewi lai lowe afoko a'i au ta'anane fara'uweye ape, tote tawesiye. Sosu Pol tote tawesiyei lo siye so'oruwegete su, le meni ape siye etiye, le ma'e eiye, ¹⁰Ane ne ma'e eiye, "Sinere!" Sosu meni ape peri wanuwe su, le witane a'i sine tei uweiteye. ¹¹Sosu lu taune werese etiri ape siyeye su, lowe Likonia lo peri se apou hareye, "Siyete! God nomo lo ape mo, meni ta wou heneraiyewe, nomo ma'e itorai."^m ¹²Lowe Barnabas iyape apou eiye, Sus. Sosu Pol peri erasi au te'eteeye su, lowe iyape apou eiye, au

te'e siye ipari Hermes.ⁿ ¹³God wawero a'i, Sus lo wesi, omo nowe ma'e iroteye. Sosu Sus lo au heseyei meni owane lai fe bulmakau tamo me su tamo se, lowe lo ta'aneye ape, le etiri ape mo omo nepawe ma'e funarai. Le, lu taune werese aiwawe a'i, lowe fe bulmakau ape lowesi ma'e aine tera'e au heseyei ne toteye.

¹⁴Sosu lowesi etiri ape ne wanuwe su, serai lowesi ipari tahe towafi lowesi lo ani erauwiye. Lowe lu taune ponei a'i sine iterotiyewe apou hareye, ¹⁵"Lu werese, fene piye irosiya awere? Notosi god ta ta'ama. Notosi lu yahowa'i a'i ne. Fene aiwawe a'i ne. Notosi Owane Sitewi lo peri heneruwe wisere a'i fene ma'e au te'eyei ne fai. Fene werese etiri yahowa'i ape atati arosawire. Fene Owane Sitewi lo marepi ma'e atati tote umasire. Owane Sitewi, mi mi pasi pasi weriyei irosiya ape, le lai etiri werese ape mo ta'aneye. Etiri werese ni'arawe hire ma'e Owane Sitewi lai ta'aneye. Etiri werese, awei sahe irosiya ape mo, Owane Sitewi lai ta'aneye. Etiri werese, sa'i papu irosiya ape mo, Owane Sitewi a'i lai ta'aneye.^o ¹⁶Tu naifa weriyei le lu taune werese marepi towafi lowe lo au iro umasiteye.^p ¹⁷Le mi mi weriyei lu taune werese ma'e topo le ne au te'e atuatunamisiya. Le etiri tomu ne'ese lu taune ne au ta'anenamiteye. Le sa'i fene ma'e hi awei sahe ausai. Le etiri werese, ta'aneyei awei irosiya ape, perati wiyei ne au iroteye. Le lu feni werese ma'e ayei tomu ne'ese auteye. Le marepi hepene lowe lo au fetaneye wisereyesiya. Serai lowe Owane Sitewi ne siye so'oruwegeteye."^q ¹⁸Sosu lowesi peri te'e tepa'asiye su, lowe lai lowesi ma'e fe lo'u ta au heseyei ne toteye. Lowesi apou eiye, "Piyete, fene notosi ma'e fe lo'u owe ape au hesere!"

¹⁹Sosu Juda lo lu tamo, Antioch ma'e fai ape mo, Aikoniam aiwawe ma'e fai ape, lowe lai lu taune werese ma'e marepi te'e tatai aniyei ne toteteye. Lowe Pol tapiye se fusawiyewe, lowe omo nowe ma'e hene ani ni'ariye arosai. Lowe apou toteye, "Pol temeniyeye."^r ²⁰Lowe omo nowe

^m **14:11** Ap 28:6 ⁿ **14:12** Lu taune, omo pani Grik sahe iroteye ape, lowe god wawero tomu ne'ese ne au te'e nine'iteye. God Sus ne, lowe apou toteye, god ape god tutawe pefine a'i nomo lo ne. Sosu Hermes, le god ta, peri ta lu taune ma'e au te'esai. ^o **14:15** Sng 146:6; Ap 10:26 ^p **14:16** Ap 17:30 ^q **14:17** Jer 5:24 ^r **14:19** Ap 17:13; 2 Ko 11:25

ma'e arunati su, lu feni lo Pol ma'e ta'uwerai. Pol sineteyewe, omo papu si tame wiye. Nowe mo'o su, Pol, Barnabas aiwawe lowesi Listra arunati su, omo Derbe ma'e fi.

Barnabas, sosu Pol lowesi omo Antiok ma'e si tame fi.

²¹Sosu a'i pe lowesi omo Derbe ma'e henerai su, lowesi lu taune tomu ne'ese ma'e Jisas lo peri heneruwe wisere a'i au te'e fiyariteye. Lu taune tomu ne'ese a'i Jisas lo peri wanu tote tawesi umasiteye. Sosu lowesi omo Listra ma'e si tame fi. Sosu omo Listra arunati su, omo Aikoniam ma'e heneri. Sosu omo Aikoniam arunati su, omo Antiok ma'e heneri. Omo Antiok pani Pisidia sahe iroteye. ²²Omo ape mo sahe lowesi lu taune werese lo marepi au te'e kairefiyeteye. Lowesi apou te'eye, "Fene Jisas lo marepi tote tawesite. Nomo werese Owane Sitewi lo marepi umasisiya su, etiri luwaru tomu ne'ese a'i nomo aiwawe henerairowa. Serai fene werese Jisas lo marepi tote tawesi umasite."^s ²³Sosu lowesi lu owane tamo Jisas lo marepi tote tawesiye ape, ariariyeye. Omo omo ape mo sahe, lu ape mo lu taune Meni Owane Pefine lo marepi tote umasiteye ape, au noweinoweiteye. Lowe Owane Sitewi ma'e au te'e toweri tiyatiteye. Sosu lowe ayei siyenamiteye. Sosu Pol, Barnabas lowesi lu ape mo Owane Sitewi ma'e apou au te'eteye, "Owane Sitewi ne fara'u lu eite mo au noweinoweinamite."

²⁴Sosu lowesi omo ape mo arunati su, lowesi pani Pisidia awera'iyenatiyewe, omo Pamfilia ma'e heneri. ²⁵Sosu lowesi lu taune werese ma'e, omo Perga sahe iroteye ape, au te'e fiyari tepa'asiye su, lowesi omo Atalia ma'e itori. ²⁶Sosu lowesi omo Atalia arunati su, lowesi wai se omo Antiok ma'e pani Siria sahe, si tame iyatu toneri. Tu naifa omo ape sahe Jisas lo lu feni, Pol, Barnabas ereti hire hetesiywewe, Owane Sitewi lo kairefi se eimawesawi. Nowe ape se lowesi wiyaw lowesi lo ta'ane tepa'asiye.^t

²⁷Omo Antiok henerai su, lowesi lu taune werese, Jisas lo peri umasiteye ape, te'lauwe aniy. Sosu lowesi lowe ma'e Owane Sitewi lo etiri werese, ta'aneye ape, au te'e areiyeteye. Lowesi lowe ma'e au te'eye, Owane Sitewi lai lu taune tewi tere'e tomu ne'ese hene aniy. Serai lu taune tomu ne'ese Owane Sitewi lo marepi tote tawesi umasiteye.^u ²⁸Sosu lowesi nowe tomu ne'ese lu taune ape mo aiwawe iroteye. Sosu lowesi nowe yame tomu ne'ese a'l lu taune, Jisas lo marepi tote umasinamiteye ape, mase ironamiteye.

Lu taune tomu omo Jerusalem ma'e ta'uwerai.

15 ¹Lu tamo pani Judia arunatiyewe, omo Antiok ma'e henerai. Lowe lu taune tewi tere'e he'i a'l, Jisas lo marepi umasiteye ape,

^s 14:22 Ap 15:32; 1 Te 3:3 ^t 14:26 Ap 13:1-2 ^u 14:27 Ap 15:4,12

lowe ma'e apou au te'e atuatuteye, "Tu fene werese Juda lo marepi pefine a'i umasiteye. Fene Moses lo yo peri tote umasiteye. Moses aiwawe au te'eteye. Fene Moses lo marepi, tahe touwei ape, umasi ta'ame su, fene marepi hepene he'i a'i anirowata."^v Sosu Pol, Barnabas aiwawe, lowe ma'e ai peri erasi te'e tiyatiteye. Sosu lu feni tamo, omo Antiok irotaye ape, lowesi omo Jerusalem ma'e eimawesawi. Lowesi Aposel werese ape mo ma'e, lu owane tere'e tamo aiwawe a'i, peri te'e tiyatiyei ne fi. Lu tamo tere'e lowesi aiwawe a'i fi."^w

³Lu taune tamo, Jisas lo peri umasiye ape, ma'aru etiri tamo lowesi ma'e auwewe, omo Jerusalem ma'e eimawesawi. Sosu lowesi omo ape arunatiywewe fi su, omo pani Fonia, omo pani Samaria awera'iyenatiywewe iteye. Sosu lowesi lu taune werese, Jisas lo peri umasiteye ape ma'e, au te'e fiyariteye. Lowesi apou au te'eye, "Lu taune tewi tere'e ape mo Jisas lo peri umasiteye." Lowe wanuwe su, lowe marepi wisereye nine'iteye. ⁴Sosu lowesi omo Jerusalem ma'e henerai su, lu taune werese, Krais lo peri umasiteye ape, sosu Jisas lo lu aposel, sosu ya'ariyei lu owane tamo, lowesi ma'e eriteye. Sosu lowesi etiri werese, Owane Sitewi lai, ta'aneteye ape, au te'eteye.^x ⁵Sosu a'i pe lu Farisi tamo, Jisas lo peri umasiteye ape, lowe ponei sahe sine teiteyewe apou te'eye, "Lu taune tewi tere'e werese ne, lowe tu Juda lo marepi aiwawe a'i anirowa. Sosu lowe tahe tewi toure. Sosu lowe Moses lo yo peri umasite. Lowe Juda lo marepi werese umasiyei su, Owane Sitewi lai marepi hepene he'i a'i lowe ma'e aurowa."

⁶ Jisas lo lu aposel, sosu ya'ariyei lu owane tamo etiri ape ne te'eyei ne ta'uwerai. ⁷Lowe werese apou te'e tiyatiteye. Peri te'e tiyati tepa'asiye su, Pita lowe ponei sahe sineteyewe, lu taune werese ma'e apou au te'eye, "Kaiyemo mo ano, etiri ape mo fene wanu so'oruwesiya! Tu naifa Owane Sitewi lai ane ma'e apou eiye, 'Ne lu taune tere'e tere'e ma'e peri ano au te'e fiyariye.' Lowe Owane Sitewi lo peri wanuwe su, le lowe ma'e marepi hepene he'i a'i aurowa.^y ⁸Owane Sitewi lai lu taune werese lo marepi papu siyesiya. Lu taune tewi tere'e ape mo Jisas lo peri umasiye su, le Hepene Wara'i a'i lo marepi lowe ma'e au eimawesai. Nomo aiwawe a'i Hepene Wara'i a'i lo aniy.^z ⁹Owane Sitewi lai lu taune werese aiwawe a'i siyesiya. Lowe Jisas lo peri tote tawesiteye su, le marepi lowe lo au iro wara'iyeye. ¹⁰Serai fene piyene Owane Sitewi lo marepi ne au luwaruve tote etisiya aware? Fene lu taune tewi tere'e ape mo ma'e marepi orese erasi a'i au fuwe. Tu naifa ya'ariyei nomo lo werese marepi orese erasi a'i apou ape irorowata. Fene piyene marepi orese a'i ape lowe ma'e auwe aware?^a ¹¹Ahowa! Nomo apou tote tawesiye, Owane Sitewi lai nomo

^v 15:1 Ga 5:2 ^w 15:2 Ga 2:1 ^x 15:4 Ap 14:27 ^y 15:7 Ap 10:1-43 ^z 15:8 Ap 10:44; 11:15

^a 15:10 Mt 11:30; Ga 3:10

werese marepi hepene he'i a'i aurowa. Lu taune tewi ape mo aiwawe a'i aurowa.”^b

¹²Sosu lu taune werese, wesi ape ta'uwerai ape, peri lowesi lo wanuwe su, lowe te'e ta'ama. Lowe werese Pol, Barnabas lo peri wanu etiye. Sosu lowesi wiyawi erasi pefine a'i, Owane Sitewi lu tewi tere'e ma'e iroteye ape, lowesi lowe ma'e au te'e areiyeteye. ¹³Lowesi peri lowesi lo te'e tepa'asiye su, Jems apou ekiye, “Kaiyemo mo peri ano wanure.”^c ¹⁴Saimon nomo ma'e apou te'e tepa'asiye, nowe tu naifa Owane Sitewi lai lu taune tewi tere'e werese ne marepi erasi a'i tote wawesiyenamiteye. Lu taune ape mo, le ne tote tawesiye ape, le lu feni pefine a'i lo au iro henerai. ¹⁵Owane Sitewi lo au te'e siye lu ape mo apou aiwawe a'i te'eye. Lowe Owane Sitewi lo one towé sahe apou leseye.

¹⁶‘Etiri ape mo henerai tepa'asiyei su, ane lai si tame aiyerowa.

Ya'ariyei nomo lo Devit lo lu tewi werese Owane Sitewi ne me'iyei ma'e atati arunati. Ane si tame aiyeyei su, ane lowe werese te'e ta'uwe anirowa.

¹⁷Serai lowe iyape ano ne tame tote tawesi umasirowa su, lu taune tewi tere'e tere'e, omo omo werese iroteye ape, lowe Meni Owane Pefine a'i siye nehirowa. Sosu lu tewi tere'e werese ane ne tote tawesi umasiyei ape, ane lowe werese lu feni pefine a'i ano au iro henerairowa. Ane Meni Owane Pefine a'i apou te'esiya.

¹⁸Nowe tu naifa weriyei etiri ape mo lu taune werese siye so'oruwe tepa'asiye.’

Amo 9:11-12

¹⁹Serai marepi ano apou totesiya. Lu taune tewi tere'e, Owane Sitewi ne tote tawesi umasisiya ape, nomo Juda lo marepi orese a'i lowe ma'e owe ape fute. ²⁰Ahowa, nomo lowe ma'e one towé ta leseyei. Nomo lowe ma'e apou te'eyei, “Fene fe lo'u god wawero ma'e au heseye ape, owe ape ene are. Fene tafa'e yo seni luwaru a'i owe ape irote. Fene ayei tamo, wafei se awiwe temeniyessiya ape, owe ape ene are. Sosu fene fisai'i werese owe ape ene are.”^d ²¹Lu tamo nowe tomu ne'ese Moses lo yo peri omo omo werese a'i au te'eteye. Nowe amou se lowe Moses lo yo peri ta'uweyei wesi sahe au siye te'eteye. Serai lu taune ape mo etiri apou ape mo irorowata.”

Lowe one towé ta lu tewi tere'e ma'e lese ausawi.

²²Sosu a'i pe lu aposel werese ape mo, ya'ariyei lu owane tamo, sosu lu taune tere'e werese, Jisas lo peri umasiteye ape, aiwawe a'i, lowe lu tamo ariariyeye. Lowe lai lu ape mo Pol, Barnabas mase omo Antioch ma'e eimawesawi. Lowe lu hesi Judas iyape tere'e Barsabas, Sailas aiwawe a'i ariariyeye. Lu taune werese lowesi ne marepi erasi a'i tote wisereyeye.

²³Lowe one towé lowe mase lese ausawi. Lowe apou leseye,

^b 15:11 Ga 2:16; Ef 2:5-8 ^c 15:13 Ga 2:9 ^d 15:20 Kis 34:15-17; Wkp 17:10-16

“Nomo, Jisas lo lu aposel pefine a'i, sosu ya'ariyei lu owane tamo, Jisas lo marepi tote umasiteye ape, lowe kaiyemo mo nomo lo, nomo lu taune, Moses lo yo peri umasiteye ape, omo Antiok, omo Siria, omo Silisia ma'e fai. Nomo fene ma'e eritesiya.

²⁴Nomo, lu tamo fene ma'e peri ta au te'leteye ape, apou wanuwe. Lowe fene ma'e au luwaruwesiya. Nomo lai lowe fene ma'e eimawesawi ta'amie. Lowe marepi fene lo au luwaruwewei ne toteye. ²⁵Sosu, nomo werese ta'uveraiyewe, peri ape ne te'e tiyatiteye. Serai nomo lu tamo kaiyemo Pol, Barnabas mase fene ma'e eimawesawi. ²⁶Lu hesi ape Jisas lo peri au te'e fiyariteye su, lu tomu ne'ese lowesi ma'e au luwaruwewe. Lu tamo temeniyyeye. ²⁷Serai nomo lu hesi Judas, Sailas aiawake fene ma'e eimawesawi. Lowesi fene ma'e one towé ape peri au siye te'eye ne eimawesawi. ²⁸Owane Sitewi lo Hepene Wara'i a'lí nomo ma'e apou te'eye, ‘Nomo fene ma'e marepi orese a'lí aurowata.’ Nomo apou totesiya. Fene etiri tamo pei irote.^e ²⁹‘Fene god wawero lo ayei tewi a'lí, au heseye ape, owe ape ene are. Fisal'i werese owe ape ene are. Fe lo'u werese awiwe wafei se temeniyesiya ape, owe ape ene are. Fene tafa'e yo seni werese owe ape irote. Fene etiri eite amouweteyei su, marepi fene lo wisere a'lí heneraiyei. Peri eite papera.

Owane Sitewi lai fene noweinoweinamiteyei.’ ”

³⁰Sosu a'lí pe lowe lu hesiyo hesiyo ape mo eimawesawiyewe, lowe omo Antiok ma'e itori. Lowe lu taune werese, Jisas lo marepi umasiteye ape, ei ta'uwe aniyé. Sosu lowe one towé eite lowe ma'e auwe. ³¹Sosu lu taune one towé ape aniyé su, lowe siye te'eye. Lowe peri ape ne wanu tote wisereye nine'iteye. ³²Lu hesi ape Judas, Sailas Owane Sitewi lo au te'e siye lu, lowesi lowe ma'e peri wisere a'lí au te'eteye. Lowesi marepi lowe lo au kairefiyeteye. ³³Nowe ne'ese lowe lu taune ape mo saro iroteye. Mo'o su lu taune werese lu hesi ma'e au te'e wisereyeyewe, lowesi omo towafi lowesi lo si tame eimawesawi. ³⁴{Ahowa, marepi lo umasiyei su, meni Sailas saro ahe iroteye.}^f ³⁵Ahowa, Pol, Barnabas lowesi omo Antiok saro iroteye. Lowesi lu taune tomu ne'ese mase Owane Sitewi lo marepi au te'e atuatuteye. Sosu Owane Sitewi lo peri au te'e fiyariteye.

Pol, Barnabas ai peri te'e tiyatiteye.

³⁶Mo'o su, Pol lai Barnabas ma'e apou eiye, “Notosi omo tere'e tere'e wiwayi notosi lo tu Owane Sitewi lo peri au te'e fiyariye ape ma'e, si tame iyei. Lu taune werese ape mo fara'u a'lí irosiya awere?” ³⁷Ahowa,

^e 15:28 Mt 23:4 ^f 15:34 Peri eite yaru “{”, sosu “}” hesi ponei sahe irosiya ape, peri eite piye meni lai leseye awere? Lu so'oru se tamo lowe so'oru ta'amie. Ya'ariyei one towé tomu tamo sahe peri eite iro te ta'amie. One towé tere'e tamo sahe peri eite iroteye.

Barnabas itiya'u ieye, "Ei. Notosi si iyei. Notosi meni Jon Mak, nomo aiwawe iyei."^g ³⁸Ahowa, Pol apou toteye, "Ahowa, meni ape notosi mase irowata. Meni eite omo Pamfilia sahe atowekiye iteroti. Le wiyawi notosi lo einamiye."^h ³⁹Serai lowesi ai peri erasi te'e tiyatiye. Sosu lowesi omo tere'e tere'e fiyariti. Barnabas lai, Jon Mak kemere Saiprus ma'e wai se heneti. ⁴⁰Pol lai meni Sailas henetiyewe, omo Antiok arunatiywewe fi. Lu taune Jisas lo marepi umasiteye ape apou iyei, "Meni Owane Pefine lai fenesi mase aiwawe irotorowa." ⁴¹Sosu lowesi omo pani Siria, omo pani Silisia ma'e Jisas lo peri heneruwe wisere a'i au te'e fiyariyei ne fi su, lowesi lu taune werese Jisas lo marepi umasiteye ape, lowe ma'e au te'e atuatuteye.

Timoti lai Pol, sosu Sailas mase fi.

16 ¹Sosu a'i pe Pol omo Derbe ma'e peri au te'eyei ne fi. Lowesi omo ape arunati su, lowesi omo Listra ma'e henerai. Meni ta iyape Timoti Jisas lo peri umasiteye ape, saro ahe iroteye. Timoti lo mai Juda lo lu tewi ma'e fai. Menitani ape Jisas lo marepi umasiteye. Timoti lo aite pani Grik ma'e fai.ⁱ ²Jisas lo lu taune omo Listra, omo Aikoniam iroteye ape, lowe le ne peri wisere a'i toteye.^j ³Sosu Pol apou toteye, "Meni ape Timoti, notosi mase aiwawe iyei. Ane Juda lo lu taune werese Timoti lo peri wanuwei ne totesiya." Juda lo lu taune omo ape saro iroteye ape, lowe Timoti lo tai, omo pani Grik ma'e fai ape, so'oruweye. Lowe Timoti, Juda lo lu feni ta'ama ape, so'oruweye, serai Pol Timoti lo tahe mene'e se touwe. Lu Juda le ne marepi wisere a'i toteye. ⁴Sosu lowe omo tere'e tere'e ma'e fi. Lowe lu taune ma'e one towé ape au te'e fiyariteye. One towé ape Aposel werese ape mo, lu owane ape mo omo Jerusalem sahe leseye. Lowe apou te'eteye, "Fene werese peri ape umasinamite."^k ⁵Sosu lowe, lu taune Jisas lo peri umasiye ape, lo marepi au kairefiyeteye. Sosu mi mi werese lu taune tomu ne'ese Jisas lo peri umasiteye.

Pol meni Masedonia sahe suwou hamehameyei wou siyeye.

6Owane Sitewi lo Hepene Wara'i a'i lowe ma'e te'eye, "Fene pani Esia ma'e owe ape ire." Serai Pol lu hesi mase omo pani Frigia, omo pani Galesia ma'e fiyariti.^l ⁷Lowe omo pani Misia lo atahé a'i henerai su, lowe omo pani Bitinia ma'e iyei ne toteye. Ahowa, Jisas lo Hepene Wara'i a'i lowe ma'e einamiye. ⁸Sosu lowe omo pani Misia awera'iyenati su, lowe omo Troas ma'e henerai. ⁹Sosu pasi su, Pol suwou peri ta siyeye. Le apou siyeteye, meni ta'i, omo pani Masedonia ma'e iroteye ape, le ma'e ei

^g 15:37 Ap 12:12,25 ^h 15:38 Ap 13:13; Kl 4:10 ⁱ 16:1 Ap 14:6; 2 Ti 1:5 ^j 16:2 Fl 2:19-22
^k 16:4 Ap 15:23-29 ^l 16:6 Ap 18:23

aniye. Meni ape apou eiye, "Ne omo pani Masedonia ma'e aiyere. Nomo ne au pati ferafereite." ¹⁰Sosu Pol suwou peri siye tepa'asiye su, pereye a'i lowe etiri werese lowe lo ta'uweye. Owane Sitewi lai nomo ma'e apou eiye, "Owane Sitewi lai nomo omo pani Masedonia ma'e ei aniye. Nomo Owane Sitewi lo peri au te'eyei ne."

Menitani ta, Lidia, Jisas ne tote umasiteye.

¹¹Sosu a'i pe nomo omo Troas arunati su, nomo wai se kemere Samotres. Nowe mo'o su, nomo kemere Samotres arunatiyewe, omo Neapolis ma'e henerai. ¹²Omo Neapolis arunatiyewe, nomo omo Filipai henerai. Omo Filipai Rom lo meni owane au noweinoweiteye. Omo ape pani Masedonia sahe erasi a'i ne. Omo ape sahe nomo nowe poweiyе mi tamo iroteye. ¹³Nowe amou se, nomo omo nowe ma'e sa'i mai tekiye ma'e fi. Nomo awei tewi ta, nomo lu taune Owane Sitewi ma'e peri au te'eteye ape, siye nehiyei ne fi. Henerai su, nomo awei tewi ape sahe onuteye. Taune tamо awei tewi sahe, ta'uwerai ape, nomo lowe ma'e peri onu te'e tiyatiteye. ¹⁴Menitani ta iyape Lidia, omo Taiataira ma'e fai ape, le Pol lo peri wanuteye. Menitani ape lo wiyawi apou wou a'i ne ipari tahe nere'awe a'i eteteye. Le Owane Sitewi lo marepi tote umasiteye. Sosu le Pol lo peri wanuwe su, Meni Owane Pefine lai marepi lo ma'e au te'eye. ¹⁵Sosu le lu taune tewi lo Jisas lo peri wanu tote tawesi umasiteye su, nomo lowe ma'e sa'i au huwe. Lowe sa'i ani hu tepa'asiye su, le lowe ma'e apou eiye, "Fene ane Meni Owane Pefine a'i lo peri umasiteye ape ne, totesiya su, fene wesi ano aiyere." Nomo peri kairefi a'i lo wanuwe su, nomo wesi lo ma'e fi.

Lu tamo Pol, Sailas aiwawe a'i kalabus fu aroweye.

¹⁶Nowe ta se nomo pani tevi ma'e, Owane Sitewi ma'e te'e tiyatiteyei ne fi su, nomo wiyawi yahowa'i a'i menitani ta siyeye. Menitani ape sepei luwaru a'i papu iroteye. Sepei luwaru a'i ape menitani ape ma'e au so'oru weteye. Etiri werese, mo'o henerairowa ape, menitani ma'e siye so'oru areiyeteye. Meni owane lo ape, ma'aru tomu ne'ese aniteye. ¹⁷Menitani ape Pol, nomo aiwawe, umasiteye. Le apou hareye, "Lu ape mo Owane Sitewi Pefine lo wiyawi ta'ane siye lu. Lowe fene ma'e Owane Sitewi lo marepi lu taune werese ma'e marepi hepene he'i a'i auwe ape, au te'esiya."^m ¹⁸Menitani ape poweiyе mi tomu ne'ese apou aiwawe uteye. Sosu Pol marepi topo lo luwaru a'i toteye su, le atati siye etiteye. Sepei luwaru a'i ma'e apou eiye, "Sepei, Jisas lo kairefi se, ne menitani eite arunatire." Sosu pereye a'i sepei luwaru a'i ape arunatiyewe fi.

¹⁹Menitani lo lu owane siyeye su, lowe ai marepi erasi toteye. Sepei luwaru a'i arunatiyewe fi su, lowe menitani ape se ma'aru tomu ne'ese

^m 16:17 Mk 1:24

ta'ame aniyei. Sosu lowe Pol, Sailas aiwawe ereti anite tawesiywewe, ta'uweyei pani sahe ni'ariyewe, Rom lo lu owane ma'e heneti.²⁰ Lu Owane ma'e hene meme'iti su, lowe apou eiye, "Juda lo lu hesi a'i ape lu taune werese ape mo ma'e omo ape sahe marepi afoko erasi a'i au te'e luwaruwesiya."ⁿ ²¹ Lowesi lu taune werese ma'e peri tere'e au te'eye. Nomo, Rom lo lu taune ape mo peri lowesi lo wanu umasirowata. Etiri ape mo amou a'i ne."²² Sosu lu taune werese ai marepi lowesi ma'e toteye. Sosu lu owane ape mo lowe ma'e apou au te'eye, "Ipari tahe lowesi lo ani erauwi arosawi. Sosu wafei se me'iyeni lowesi lo ma'e ainere."^o ²³ Lowe me'iyeni ma'e aineye su, lowe kalabus wesi papu ani fu arosawi. Lowe kalabus wesi meni owane ma'e peri te'eye, "Ne lu hesi ape siye eti noweinoweite."²⁴ Meni ape peri wanuwe su, le lu hesi ape kalabus wesi papu wiyeme henetiywewe, metei se lowe lowesi lo asi he'e tawesiye.

²⁵ Pasi a'i, Pol, Sailas lowesi Owane Sitewi ma'e omoyawi ahi au sineteye. Sosu le ma'e au te'eteeye. Lu tere'e werese ape mo, kalabus wesi papu iroteye ape, lowesi lo peri omoyawi ahi se wanuteye. ²⁶ Lowesi omoyawi ahi ape sineteye su, awe erasi auseriye henerai. Kalabus wesi tapiye werese au ani auseriyeye. Pereye a'i kalabus wesi lo yo werese toso fiyari arosawi. Sosu lu werese lo wafei ti tawesiye ape, ani erau arosawi. ²⁷ Sosu kalabus wesi meni owane ape nihe petene sine teiyewe, kalabus wesi lo yo werese tosowi siyeye. Sosu le mene'e lo anije su, le topo le ma'e aine tou tera'eyei ne toteye. Le apou toteye, "Lu werese kalabus wesi arunatiywewe, itero ereye."^p ²⁸ Ahowa, Pol le ma'e peri erasi uteye, "Weiya! Ne topo ne a'i lai owe ape aine tera'ere. Nomo werese sato irosiya."

²⁹ Sosu kalabus wesi meni owane taweiru erasi a'i teriteye ape, yehe erei ei aitai. Sosu le wesi papu witane se a'i fiyewe, Pol, Sailas ma'e lowe uporo ape'i onuwe. ³⁰ Le lowesi kalabus wesi nowe ma'e heneti su, apou ei toweriye, "Lu hesi, ane marepi hepene he'i a'i aniyei ne totesiya. Ane piye irowei awere?"^q

³¹ Lowesi le ma'e itiya'u eiye, "Ne Meni Owane Jisas lo peri tote tawesi umasire. Jisas lo peri tote tawesiyei su, Owane Sitewi lai ne ma'e marepi hepene he'i aurowa. Ne lu feni no aiwawe marepi hepene he'i a'i aurowa."³² Sosu lowesi le ma'e lu feni lo mase Meni Owane Pefine lo peri au te'eteeye. ³³ Lowesi peri te'e tepa'asiye su, meni ape enite werese lowesi lo sa'i au huwe. Sosu pereye a'i lowesi le lu tewi lo mase sa'i au huwe. ³⁴ Sosu kalabus wesi meni owane ape lowesi wesi lo papu hene wirai. Sosu le lowesi ma'e ayei erasi isafiye noneye. Sosu le, lu tewi lo mase, marepi wisereye nine'iteye. Lowe werese Owane Sitewi lo marepi umasiteye. Serai lowe marepi erasi a'i nine'inamiteye.

ⁿ 16:20 Mk 13:9 ^o 16:22 2 Ko 11:25; 1 Te 2:2 ^p 16:27 Ap 12:18-19 ^q 16:30 Ap 2:37

³⁵Nowe esi mitaiyeye su, lu owane peri ape wanu so'oruweye lu tere'e tamo lowe ma'e au te'esai. Lowe kalabus wesi meni owane ma'e apou eiye, "Ne lu hesi ape hene arosawire."

³⁶Sosu le Pol ma'e apou eiye, "Lu owane apou eisai, 'Fenesi fara'u arosawirowa.' Sosu fenesi fara'u ire, Owane Sitewi lo ferafereiyei se fenesi mase ire."

³⁷Ahowa, Pol le ma'e itiya'u eiye, "Lowe notosi lu werese lo nihe se wafei se me'i yeni notosi lo ma'e aineyewe, kalabus wesi ma'e fu arosawi. Meni Owane ape peri notosi lo wanu ta'ame. Notosi Rom lo lu wiyeme a'i ne. Sosu lowe a'i lai notosi eresene a'i hene arosawi. Piyete! Lowe a'i lai notosi hene ani arosawire."

³⁸Sosu lu ape mo meni owane pefine erasi ma'e si tame au te'esawi. Sosu lu owane ape mo peri wanuwe su, lowe hepene se su'ariye, apou toteye. "Lu ape mo lai Rom lo omo pani ma'e fai. Nomo Rom lo lu au luwaruwerowata. Nomo lowesi au luwaruweye su, yo seni ape luwaru a'i ne. Serai yo seni ape ne etiri luwaru a'i nomo ma'e itiya'u henerairowa."

³⁹Sosu lowe kalabus wesi ma'e wiye su, lowe lowesi ma'e te'e ewiteye. Sosu lowe omo nowe ma'e heneti. Lowe apou eiye, "Fenesi omo nomo lo arunatire." ⁴⁰Sosu lowesi kalabus wesi arunati su, lowesi Lidia lo wesi ma'e fi. Lowesi Jisas lo lu feni tame siyeye. Sosu lowesi marepi lowe lo au kairefiyeteye. Peri tepa'asiye su, lowesi omo ape arunatiywewe fi.

Pol, Sailas omo Tesalonaika ma'e fi.

17 ¹Sosu a'i pe Pol, Sailas aiwawe a'i omo Filipai arunati su, lowesi omo Amfipolis awera'i yenati, omo Apolonia awera'i yenati, sosu omo Tesalonaika ma'e heneri. Saro ahe Juda lo ta'uwewayi wesi iroteye. ²Nowe tomu ne'ese Pol wesi ape papu wiye. Nowe amou hesi heta le ta'uwewayi wesi papu wiye. Le lu tamo Owane Sitewi lo peri one tow sahe au te'eteye. ³Le apou au te'eye, "Owane Sitewi lo one tow sahe apou leseye, 'Meni ape Owane Sitewi lai ariariyeye ape, le fofowei erasi teriteye. Mo'o su lowe lai meni ape aine tera'erowa. Sosu Owane Sitewi lai le si tame ta'ane norohuwe hene anirowa.' Peri werese ape mo pereye wiyeme a'i henerai. Meni ape Jisas ane fene ma'e au te'eye ape, le a'i lai, Owane Sitewi lai meni ape ariariyeye ape, Krais ne." ⁴Juda lo lu tamo Pol lo peri wanuwe su, lowe Jisas ne tote tawesiteye. Sosu lowe Pol, Sailas umasiteye. Omo pani Grik lo lu taune tomu ne'ese Owane Sitewi pefine a'i ma'e au te'e wisereyeteye ape, aiwawe umasiteye. Ya'ariyei taune owane tomu ne'ese aiwawe a'i lowesi umasiteye.

⁵Ahowa, Juda lo lu tewi tamo lowesi ma'e marepi afofo a'i toteteye. Lowe lai lu luwaru a'i tamo, lu ta'arei a'i tamo, onota'ano a'i lu tamo te'e ta'uve aniye. Lowe ma'e apou eiye, "Fene werese lu taune werese mase lowesi ma'e au luwaruwete." Sosu lowe werese lu taune werese mase ai

peri erasi au irowe. Lowe meni Jeson lo wesi ma'e fi. Lowe Pol, Sailas lowesi itero siyeyei ne fi. Lowe lowesi lu taune werese ma'e ai marepi ni'ariyei ne totesiya. ⁶Ahowa, lowe lowesi siye ta'ame su, lowe Jeson, lu feni tamo ereti anite ti tawesiye. Lowe awei meni owane ma'e heneti. Lowe apou uteye, "Wanure! Lu hesi ape Pol, Sailas lowesi omo omo werese sahe yo seni luwaru a'i iroteye. Pereye lowesi saro ahe henerai. ⁷Jeson lai lowesi wesi topo lo sahe au noweinoweiteye. Lowe, Meni Owane Sisar, Rom lo meni owane tutawe lo peri ape te'e naruwe. Lowe apou au te'eye, 'Meni owane pefine tere'e irosiya. Meni Owane pefine tere'e lo iyape Jisas.' "^r ⁸Sosu awei lu owane werese lu taune werese mase peri ape wanuwe su, lowe ai marepi luwaru erasi a'i toteteye. ⁹Sosu awei lu owane Jeson, lu feni lo aiawawe, ma'e apou eiye, "Fene nomo ma'aru tamo auwei su, fene fara'u wesi no si tame iyei." Sosu lowe lu owane ma'e ma'aru tamo auwewe, wesi lo si tame fi.

Pol, Sailas omo Beria ma'e au te'e fiyariteye.

¹⁰Nowe pasi su, lu feni tamo lai, Pol, Sailas eimawesawi. Lowesi omo Beria ma'e fi. Omo Beria henerai su, lowesi Juda lo ta'uweyei wesi papu wiye. ¹¹Sosu a'i pe Beria lo lu taune marepi lowe lo wisereye kairefiyeteye. Tesalonaika lo lu taune marepi lowe lo haroharo a'i ne. Beria lo lu taune Pol lo peri wanuwe su, lowe Owane Sitewi lo one tote wanu tote etiteye. Pol lo peri wiyeme a'i aware? Wawero a'i aware? ¹²Juda lo lu taune tomu ne'ese Jisas lo marepi tote tawesiteye. Omo pani Grik lo ya'ariyei taune owane tomu ne'ese aiawawe toteye. Grik lo lu tomu ne'ese aiawawe a'i Jisas lo marepi umasiteye. ¹³Ahowa, Juda lo lu taune, omo Tesalonaika iroteye ape, Pol Owane Sitewi lo peri au te'e fiyariyei ne wanuwe su, lowe omo Beria ma'e iteroti. Lowe lu taune werese lo marepi luwaru a'i au te'eteye. ¹⁴Jisas lo lu feni werese lowe siyeye su, lowe Pol sa'i erasi tewiye ma'e eimawesawi. Lu hesi Sailas, Timoti lowesi omo Beria saro iroteye. ¹⁵Lu tamo, Pol aiawawe fi ape, lowe le omo Atens ma'e heneti. Sosu Pol lowe ma'e apou te'eye, "Lu hesi ano, Sailas, Timoti aiawawe, lowesi ane mo'o fu aiya." Sosu lowe le arunatiyewe, omo Beria ma'e si tame fi.

Pol omo Atens sahe au te'e fiyariteye.

¹⁶Pol lai lowesi omo Atens sahe ninaweteye su, le god wawero tomu ne'ese lu taune, au te'e wisereyeye ape, siyeteye. Le ai marepi erasi a'i toteye. ¹⁷Sosu le Juda lo ta'uweyei wesi ma'e fi. Sosu le Juda lo lu tamo, Grik lo lu tamo, Owane Sitewi Pefine a'i ma'e au te'e wisereyeteye ape, le ta'uweyei wesi nepawe ma'e Owane Sitewi lo peri au te'e areiyeteye.^s

^r 17:7 Lu 23:2; Jo 19:12 ^s 17:17 Ap 18:19

¹⁸Sosu a'i pe lu tamo Epikurian lo marepi tote tawesiteye ape, lu tere'e tamo Stoik lo marepi tote tawesiteye ape, lowe Pol ma'e henerai. Lowe Pol ma'e ai peri morose a'i te'e tiyatyiye ne fai. Lu tamo apou te'eye, "Meni ape peri topo lo so'oru ta'ama. Le piye peri te'esiya awere?" Lu tere'e tamo apou te'eye, "Le a'i lai god tere'e ne au te'esiya." Pol Jisas lo peri au te'eteye. Owane Sitewi lai Jisas si tame ta'ane norohuwe hene aniy. ¹⁹Sosu lowe Pol ereti se aniteyewe, awei lu owane tamo, ta'uwerai ape, ma'e heneti. Lu ape ta'uwerai ape iyape Areopagus. Lowe henerai su, le ma'e apou ei toweriye, "Ne piye peri he'i a'i te'e fiyariteye awere? ²⁰Nomo peri he'i no wanuwe su, nomo peri ape lo sitewi wanu so'oru ta'ama. Ne peri sitewi ape ne nomo ma'e au te'ere." ²¹Sosu lu taune tomu ne'ese omo Atens sahe iroteye ape, nowe tomu ne'ese peri he'i a'i tere'e tere'e ape mo te'e te'e tiyatiteye.

²²Sosu Pol lai Areopagus lo ta'uweyei ponei sahe sineteye su, le apou te'eye, "Atens lo lu werese wanure! Ane fene, god tomu ne'ese ma'e au te'e nine'isiya ape, siyesiya. ²³Ane yo mai itiye su, ane god lo etiri tomu ne'ese siyeteye. Ane itiye su, ane god ta'llo metei wari siyeteye. Fene peri ape metei unahi sahe apou leseye, 'Nomo ne ma'e au te'e wisereye nine'iteye. Ahowa, nomo ne so'oru ta'ama.' Ane fene ma'e au te'eye. Ane etiri ape wiyeme a'i so'oruwsiya. ²⁴Owane Sitewi pefine a'i lai awei werese werese ta'aneye. Le a'i lai etiri werese, papu irosiya ape, ta'aneye. Le a'i lai hire ni'arawe werese lo Meni Owane Pefine a'i ne. Le a'i lai awei werese werese lo Meni Owane Pefine a'i ne. Le wesi ta, lu ta'aneye ape, sahe iro ta'ame.^t ²⁵Owane Sitewi ape ereti lo se etiri werese ta'aneteye. Le etiri werese ape mo ma'e marepi hepene norohu a'i auwe. Le lowe ma'e ahi lo se fateteye su, lu taune werese marepi hepene norohu a'i henerai. Lu taune werese le ma'e au pati ta'anerowata. Etiri werese a'i ne topo lo ne.^u ²⁶Tu naifa weriyei, le meni tutawe ape ta'aneye. Meni ta'i a'i ape se, lu taune tere'e tere'e omo omo werese sahe henerai. Le omo werese ape ne lu taune eiwerou ma'e irosiya ape mo, au ariariyeye. Aiawae a'i le lu taune, eiwerou su henerairowa ape, au ariariyeye. ²⁷Owane Sitewi lo marepi apou totesiya. Lu taune werese le ma'e siye nehinamirowa. Lowe omo omo werese sahe le ma'e siye nehinamiteye. Lowe le siyerowa su, lowe le ne umasinamirowa. Le nomo werese atah a'i ironamisiya.^v ²⁸Nomo le sahe ironamisiya. Le nomo mase uweinamisiya. Nomo le papu ironamitorowa. Lu tamo, omo towafi fene lo irosiya ape, apou te'eye, 'Nomo eimane topo lo ne.' ²⁹Nomo werese Owane Sitewi lo eimane a'i ne. Serai fene peri tamo owe ape totete, 'Nomo Owane Sitewi pefine a'i tapiye gol, tapiye silva, tapiye tere'e se fara'u ta'anerowa.' Fene Owane Sitewi pefine a'i ta'anerowata.^w ³⁰Tu naifa

^t 17:24 1 Kin 8:27; Ap 7:48 ^u 17:25 Sng 50:12 ^v 17:27 Sng 145:18; Jer 23:23

^w 17:29 Ais 40:18-20; 44:10-17; Ap 19:26

fene werese etiri ape mo so'oru ta'ama. Sosu marepi fene lo ape ne Owane Sitewi lai tote i'aneye. Ahowa, pereye nowe eite se le a'i lai lu taune werese ma'e apou te'esiyi, 'Fene werese marepi hepene fa ani aresaiye awetote.'

³¹ Nowe ta se henerairowa su, Owane Sitewi lai lu taune werese lo yo seni au hese ereirowa. Le yo seni werese au hese ereirowa su, marepi lo farere a'i ironamirowa. Tu naifa weriyei, le lai meni ta yo seni au hese ereiyei ne ariariyeye. Meni ape temeniyei su, le meni ape si tame ta'ane norohuwe ani sineye. Serai le nomo werese ma'e marepi farere a'i lo au atuatuteye."^x

³² Pol peri tepe'asiye. Lu tamo meni ape ne si tame norohuwe sineye ape, wanuwe su, lowe apou te'eye, "Peri eite wawero tene!" Lu tamo tere'e apou te'eye, "Nomo peri ape wisere a'i se wanuwe. Ne nomo ma'e si tame au te'e areiyete!" ³³ Sosu Pol peri tepe'asiye su, le ta'uweyei ape arunati fi. ³⁴ Lu tewi oso a'i Pol lo marepi umasiteye. Lowe Jisas lo peri wanu tote tawesiteye. Meni ta'i iyape Dionisius, Areopagus lo meni ta'i iroteye. Meni tani tere'e ta iyape Damaris, aiwawe Jisas lo marepi umasiteye. Sosu lu taune tere'e tamo aiwawe a'i Jisas ne tote tawesi umasinamiteye.

Pol Korin sahe Jisas lo peri au te'e fiyariteye.

18 ¹ Nowe mo'o su Pol omo Atens arunatiyewe, omo Korin ma'e fi. ² Omo Korin ma'e henerai su, Juda lo meni ta siyeye, iyape Akwila, omo sitewi lo iyape Pontus. Le, tani lo aiwawe a'i pani Itali ma'e fai. Nohuwe hesi ape pani Itali ma'e tu oso a'i fai. Tani lo iyape Prisila. Rom lo meni owane tutawe, iyape Klodius, Juda lo lu taune werese, omo ape sahe iroteye ape, hene sasarisawi. Sosu Pol lowesi ma'e siyeyei ne fi.^y ³ Wiyawi lowesi lo Pol aiwawe a'i ta'aneteye. Lowesi ipari tahe wesi iwisisiteye. Pol lowesi aiwawe irotewewe, wiwayi ape au pati ta'aneteye.^z ⁴ Nowe amou se Pol lai Juda lo ta'uweyei wesi ma'e fi. Sosu le Owane Sitewi lo peri Juda lo lu taune, Grik lo lu taune aiwawe ma'e au te'e fiyariteye. Le marepi lowe lo tote tatai aniyei ne toteteye."

⁵ Sosu a'i pe lu hesi Sailas, Timoti omo pani Masedonia arunatiyewe, omo Korin ma'e henerai. Lowesi Pol ma'e sewiyeyei ne fai. Pol Juda lo lu taune werese ma'e marepi ta'i a'i apou au te'eteye, "Meni Owane Jisas ne, Owane Sitewi meni ape ariariyewe, hi awei ma'e eimawe arosai."^a ⁶ Sosu Juda lo lu peri ape wanuwe su, lowe Pol ma'e peri luwaru a'i au te'e naruwe. Pol peri luwaru a'i wanuwe su, le awei peperi ipari tahe lo sahe au ani sasarisawi. Le lowe ma'e apou te'eye, "Owane Sitewi lai fene ma'e ai marepi totenamiteye. Le fene ne me'iyeni ma'e atati aruwei. Fene yehe omo ma'e iyei su, etiri fene lo ne. Ane Owane Sitewi lo marepi fene ma'e au te'e atuatuteye. Ahowa, fene peri ano wanu ta'ame. Serai ane

^x 17:31 Sng 96:13 ^y 18:2 Ro 16:3 ^z 18:3 Ap 20:34 ^a 18:5 Ap 17:14-15

me'iyen ma'e fene ne atati aruwei. Serai ane awei peperi ipari tahe ano sahe au ani sasarawisiya. Fene, Juda lo lu taune werese, peri ano wanu ta'ame su, ane lu taune tewi tere'e ma'e Jisas lo peri au te'e fiyarirowa.^b ⁷Sosu Pol ta'uweyei wesi arunati su, le meni Titius Jastus lo wesi ma'e fi. Meni ape Owane Sitewi ma'e au te'e wisereyeye. ⁸Meni tere'e ta iyape Krispus ta'uweyei wesi meni owane, le lu tewi lo aiwawe a'li Jisas lo peri tote tawesi umasiteye. Lu taune tomu ne'ese, omo Korin sahe iroteye ape, aiwawe a'li tote tawesi umasiteye. Lowe Owane Sitewi lo marepi tote tawesiteye su, Pol, lu feni lo aiwawe, lowe ma'e sa'i au huteye.

⁹Nowe pasi ta se Meni Owane Pefine a'li lai Pol ma'e suwou hamehameyei se siyeteye. Le apou eiye, "Ne atoweiye sawa. Ne lu taune werese ma'e fa au te'e fiyarite. Ne peri ano owe ape einamite. ¹⁰Ane lai ne aiwawe irosiya. Owe lu tamo ne ma'e ainerowata. Lowe ne ma'e au luwaruwerowata. Lu taune tomu ne'ese omo ape sahe marepi ano umasinamisiya."^c ¹¹Pol suwou hamehameyei siyeye su, le Korin ma'e yame tamo (18) saro iroteye. Le Owane Sitewi lo peri lowe ma'e au te'e fiyariteye ape au te'eteye.

Lu tamo Pol meni owane Galio ma'e etiyei ne heneti.

¹²Meni owane ta iyape Galio, Juda lo marepi umasi ta'ame. Le omo pani Akaia lo lu taune au noweinoweiteye. Nowe ape se Juda lo lu tamo Pol ma'e au luwaruweteye. Lowe Pol Galio ma'e henetiyei ne etiteye. Lowe apou te'eye, ¹³"Meni eite lu taune werese ma'e tatai aniteye. Le lowe ma'e apou au teleteye, 'Fene Owane Sitewi ma'e yo tere'e se fu au te'e wisereyete.' Meni ape yo peri nomo lo arisinamisiya."

¹⁴Sosu Pol lowe ponei ma'e sine teiyewe, meni owane pefine lai lu taune werese ma'e apou au te'eye, "Juda lo lu werese, fene peri ano wanure! Meni eite yo peri ta arisiye su, ane fara'u peri fene lo wanurowa. Meni eite yo seni luwaru a'li irowe su, ane peri fene lo fara'u wanurowa. ¹⁵Ahowa, fene yo peri fene lo sahe fene Juda lo meni tere'e lo iyape au te'eyewe, meni ape yo peri fene lo arisiye su, ane peri fene lo wanurowata. Fene lai etiri eite au fareraiyere. Ane etiri eite wanurowata."¹⁶Serai meni owane ape lowe werese nowe ma'e au sasari arosawi.

¹⁷Sosu a'i pe lu tamo meni Sostenes, ta'uweyei wesi meni owane pefine ma'e hene anite tawesiyewe, etiyei wesi nepawe pani atah a'i aineye. Meni owane Galio siyeye su, le etiri ape tote ta'ame.

Pol omo Antiok ma'e si tame fai.

¹⁸Sosu a'i pe Pol omo Korin poweiye tamo se saro iroteye. Nowe me'iye su, le omo Korin Jisas lo lu feni arunatiywew, pani Siria ma'e wai

^b 18:6 Ap 13:46,51; Ap 20:26 ^c 18:10 Jos 1:9; Ais 41:10

se iyatuti. Nohuwe hesi tani Prisila meni lo Akwila, lowesi Pol aiawawe a'i fi. Tu naifa Pol, Owane Sitewi ma'e peri ta au te'e naneiye. Sosu omo Senkria sahe le mato towe topo lo werese howe pamoweye. Peri te'e naneiye tepa'asiye su, le mato towe werese a'i howe pamoweye.^d ¹⁹Sosu lowe wai se omo Efesus ma'e iyatu heneri. Saro ahe Pol nohuwe hesi ape arunatiyewe, le ta'uweyei wesi papu wiye. Le Juda lo lu tamo ma'e au te'e tiyatiteye. ²⁰Lowe Pol ma'e te'e toweriye, "Ne fara'u nomo mase iroterowa awere?" Sosu Pol itiya'u apou eiye, "Ahowa!" ²¹Sosu le arunati su, le apou te'eye, "Owane Sitewi lo marepi ane ma'e te'eye su, ane heta su si tame aiyerowa." Sosu le omo Efesus arunatiyewe, wai se iyatuti.

²²Wai se iyatuti su, le omo Sisaria ma'e iyatu heneri. Sosu omo Sisaria arunati su, le omo Jerusalem ma'e yaneri. Le Jisas lo lu feni werese ma'e eriteteye. Sosu lowe arunati su, le omo Antiok ma'e itori. ²³Le omo Antiok ma'e henerai. Powekiye mi tomu ne'ese saro iroteye. Omo Antiok arunati su, le omo tere'e tere'e ma'e heneri. Le pani Galesia, pani Frigia ma'e au te'e fiyariti. Le peri lo se Jisas lo lu feni werese ma'e au kairefiyeteye.

Apolos omo Efesus, sosu Korin sahe au te'e fiyariteye.

²⁴Sosu a'i pe Juda meni ta iyape Apolos, omo Aleksandria ma'e fai. Meni ape omo Efesus ma'e henerai. Meni ape etiri tomu ne'ese wanu so'oruwegeteye. Le Owane Sitewi lo peri werese one towe lo sahe wanu so'oruwegeteye. ²⁵Tu naifa meni ta le ma'e Jisas lo marepi au te'e atuatuteye. Serai meni ape Jisas lo peri lu taune werese ma'e au te'e areiyeteye. Le Jisas lo peri kairefi se au te'eteye. Tu naifa meni ape, Jon lo sa'i au huwe ape, le siye so'oruweye. ²⁶Meni ape Apolos, Juda lo ta'uweyei wesi papu wiye su, le Jisas lo peri kairefi se au te'eteye. Sosu Prisila, Akwila aiawawe peri lo wanuwe su, lowesi le ma'e wesi topo lo ma'e heneti. Wesi topo lo ma'e henerai su, lowesi le ma'e Owane Sitewi lo marepi werese au te'e atuatuteye. ²⁷Sosu Apolos omo pani Akaia ma'e iyei ne toteye su, Jisas lo lu feni tamo le ma'e eimawesawi. Lowe one towe ta Jisas lo lu feni ma'e omo Akaia ma'e lese ausawi. Lowe apou leseye, "Fene meni eite eritere." Sosu le omo pani Akaia henerai su, le Jisas lo lu feni werese au pati ferafereiteye. Le lowe ma'e, Owane Sitewi lo marepi hepene he'i wara'i a'i auwe ape, au pati ta'aneteye." ²⁸Meni ape Juda lo lu tamo kairefi se au te'e tiyatiteye. Lowe peri ape wanuwe su, lowe peri itiya'u te'erowata. Lu taune werese siyeye su, lowe meni ape ne Owane Sitewi ma'e au te'e wisereyeteye. Meni ape lu taune werese ma'e Owane Sitewi lo peri apou au te'e atuatuteye, "Owane Sitewi lai Jisas ariariyeye." Le meni Krais tene!^e

^d 18:18 Nam 6:18; Ap 21:24 ^e 18:28 Ap 9:22

Pol omo Efesus sahe Jisas lo peri au te'e fiyariteye.

19 ¹Sosu a'i pe Apolos omo Korin ma'e iroteye su, Pol yo sahe iteyewe, pani tewi awera'iyenatiyewe, omo Efesus ma'e heneri. Omo Efesus ma'e henerai su, le Jisas lo lu feni tamo saro siyeye.^f ²Sosu le lowe ma'e apou ei toweriye, "Fene Jisas lo peri tote tawesiteye su, fene Owane Sitewi lo Hepene Wara'i a'i aniye aware? Piyete aware? Sosu lowe itiya'u ekiye, "Ahowa, nomo Owane Sitewi lo Hepene Wara'i a'i so'oru ta'ama. Owane Sitewi lo Hepene Wara'i irosiya aware? Ariye aware?"^g

³Sosu Pol itiya'u te'e toweriye, "Eiwerou su fene sa'i au huwe aware?" Lowe itiya'u ekiye, "Jon lai nomo sa'i au huwe."

⁴Sosu Pol itiya'u ekiye, "Meni ta yo seni luwaru a'i ape tote aresaiye awetowe su, Jon lai sa'i au huwe. Le lu taune werese ma'e apou ekiye, 'Fene meni ta'i mo'o aiyerowa ape, fene le ne tote tawesire.' Meni ape lo iyape Jisas."^h

⁵Lowe peri ape wanuwe su, Pol lowe werese Jisas lo iyape se sa'i au huwe. ⁶Sosu Pol ereti lo lowe hire ma'e isawe fuwe su, Owane Sitewi lo Hepene Wara'i a'i lowe papu wirai. Lowe peri tere'e tere'e au te'eye. Lowe peri etiri tamo mo'o henerairowa ape ne au te'eteye.ⁱ ⁷Lu ereti feni hesi lowe hesi a'i (12) Pol lo peri wanuwe.

⁸Sosu a'i pe Pol ta'uweyei wesi papu wiye. Le peri kairefi a'i se Owane Sitewi lo marepi ne au te'e fiyariteye. Yame hesi heta Pol omo ape sahe iroteye. Le ta'uweyei wesi papu wiyewe, apou a'i au te'eteye. ⁹Ahowa, lu tamo marepi kairefi a'i iroteye. Lowe Owane Sitewi lo marepi umasi ta'ame. Lowe Owane Sitewi lo marepi ne au te'e naruteye. Serai Pol lowe ma'e arunatiyewe fi. Le lu taune tamo, Jisas umasiteye ape, Tiranus lo wesi ma'e heneti. Le lowe ma'e Owane Sitewi lo etiri ne te'e te'e tiyatiteye. ¹⁰Pol nowe tomu ne'ese iyu menei hesi a'i saro iroteye. Le lu taune werese ma'e Owane Sitewi lo peri au te'e fiyariteye. Juda lo lu tewi werese, Grik lo lu tewi werese pani Esia iroteye ape, lowe Owane Sitewi lo peri wanuteye.

Skeva lo wenei eimane tamo lai sepei luwaru a'i au ani sasariowata.

¹¹Owane Sitewi lai Pol lo ereti se etiri erasi a'i ta'aneye. Lu taune werese hepene se su'ariye.^j ¹²Lu tamo ipari tahe tewi a'i Pol ereti se aniteye ape, lowe lu taune u tahe se ape mo ma'e aiti. Ipari tahe ape ereti se isawe hetesi anite fuwe su, u tahe lo tepa'asiye. Meni ta, sepei luwaru a'i iroteye ape, ereti se isawe hetesi ani siyeye su, sepei luwaru ape meni ape sahe arunati.^k ¹³Sosu a'i pe Juda lo lu tamo sepei luwaru a'i au ani

^f 19:1 1 Ko 3:6 ^g 19:2 Ap 8:16 ^h 19:4 Mt 3:11 ⁱ 19:6 Ap 8:17; 10:44,46 ^j 19:11 Ap 14:3

^k 19:12 Ap 5:15

sasari fiyarisawi. Lowe Jisas lo iyape se sepei luwaru a'i ma'e apou eiye, "Jisas lo iyape se ane lai fene ma'e heneraire. Pol meni ape Jisas ne au te'lesiya." ¹⁴Skeva lo eimane ereti feni werese feni hesi a'i (7) aiawawe a'i iroteye. Skeva au heseyei meni owane pefine a'i ne.

¹⁵Sosu sepei luwaru a'i lowe ma'e itiya'u apou eiye, "Ane Jisas ne siye so'oruweiya. Ane meni Pol ne siye so'oruweiya. Ahowa, ane fene ne so'oru ta'ama. Fene eiwerai awere?"

¹⁶Sosu meni ape sepei luwaru a'i se, le lowe ma'e ai marepi ai atu tiyatiteye. Le a'i lai lowe werese ma'e ya'oreye. Sosu le tahe lowe lo aineye su, fisa'i henerai. Le lowe ma'e ya'oreye su, lowe wesi nowe ma'e atoweiye iteru henerai. Lowe ipari tahe werese towafi lowe lo ani erauwiywewe, liye pa'are tahe ariye a'i iteroti. ¹⁷Sosu a'i pe Juda lo lu taune werese, Grik lo lu taune werese, omo Efesus iroteye ape, peri ape ne wanuwe su, lowe werese hepene se su'ariye. Lowe atoweiye. Lowe Jisas ne au te'e wisereye nine'iteye.¹ ¹⁸Lu taune tamo, Jisas lo marepi umasiteye ape, wanuwe su, lowe yo seni luwaru a'i werese lo te'e areiyeyei ne fai. ¹⁹Sinariyei lu tamo Jisas lo marepi umasiteye ape, lowe sinariyei lo one tote ani erauwiywewe, yehe ma'e ani eresawi. Lu taune tomu ne'ese yehe ape siyeye. Tu naifa lowe sinariyei lo one tote ma'aru tomu ne'ese eteye. Ma'aru tau (50,000 aiawawe a'i). ²⁰Lu taune tomu ne'ese Owane Sitewi lo peri au te'e fiyariye. Lu taune tomu ne'ese peri ape wanuwe su, lowe Jisas lo marepi umasiteye.

²¹Me'iye su, Pol omo Jerusalem ma'e iyei ne toteye. Sosu omo Efesus arunatiyei ne toteye. Le pani Masedonia ma'e pani Akaia ma'e awera'iyenatiyei ne toteye. Sosu le apou te'eye, "Mo'o su, ane omo Jerusalem arunatirowa su, ane omo Rom ma'e irowa."^m ²²Sosu le lu hesi omo pani Masedonia ma'e eimawesawi. Lowesi lo iyape Timoti, Erastus. Pol a'i lai omo pani Esia ma'e nowe oso a'i iroteye.

Lu taune tamo omo Efesus sahe Pol ma'e au luwaruwewayi ne toteye.

²³Nowe eite se lu taune tamo Meni Owane Pefine a'i lo marepi ne au luwaruweteyen.ⁿ ²⁴Meni ta iyape Demitrius, etiri kapa se ta'aneteye. Le menitani god wawero ape, iyape Artemis, lo yo'orei wesi oso a'i tamo lese ta'aneteye. Meni ape ma'aru tomu ne'ese aniy. Lu tamo tere'le wiwayi aiawawe a'i ma'aru tomu ne'ese aniy. ²⁵Sosu le lu werese ape mo te'e ta'uwe aniy. Le lowe ma'e apou te'eye, "Lu tewi, peri ano wanure! Fene wiwayi, nomo lo ma'aru tomu ne'ese aniy ape, so'oruwe tepa'asiye. ²⁶Sosu meni ape Pol lu taune tomu ne'ese marepi tatai aniy. Lowe menitani Artemis lo marepi hi ani ararosawiyewe, Owane Sitewi lo marepi umasiteye. Le lu taune tomu ne'ese omo Efesus marepi

¹ **19:17** Ap 5:11 ^m **19:21** Ap 23:11; Ro 1:13 ⁿ **19:23** 2 Ko 1:8

tatai aniteye. Lu taune tomu ne'ese pani Esia aiawwe a'i ne. Meni ape apou eisiya, 'Fene god wawero a'i tamо ereti nomo lo se ta'aneyei su, etiri ape god wawero a'i arearesiya.' ²⁷Meni ape peri lo au te'esiya su, le lai wiyawи nomo lo au luwaruwesiya. Le iyape nomo lo au te'luwaruweyei. Le peri aiawwe a'i te'eyei su, menitani Artemis lo yo'orei wesi ne te'e naruwei. Menitani Artemis lo yo'orei wesi ne te'e naruwei su, le menitani Artemis au luwaruweyei. Lu taune werese lai menitani ape au te'e nine'inamisiya. Esia lo omo pani werese sahe lu taune werese le umasiteye. Lu taune werese omo omo werese sahe menitani Artemis umasinamiteye. Meni ape lai menitani Artemis lo kairefi hi ani araronamisiya."

²⁸Sosu a'i pe lowe peri ape wanuwe su, lowe ai marepi erasi toteteye. Lowe apou hareye, "Omo Efesus lo menitani Artemis wiyeme a'i ne."

²⁹Lu taune werese omo Efesus sahe peri lowe lo wanuwe su, lowe aiawwe a'i ai marepi erasi a'i toteteye. Lowe lu hesi iyape Gaius, sosu Aristarkus hene anite tawesiteye. Lowesi Pol pani Masedonia ma'e aiawwe a'i fai. Lowe lai lowesi witane a'i ta'uweyei wesi nepawe ma'e heneti. ³⁰Sosu Pol peri ape wanuwe su, le lowe ma'e te'e areiyeyei ne toteye. Ahowa, lu feni lo lai le einamiye. ³¹Lu owane tamо Pol lo kaiyemo mo aiawwe a'i, le ma'e peri ta te'esai. Le ta'uweyei wesi nepawe ape ma'e owe ape ire. ³²Lu taune werese ta'uwerai ape, lowe werese marepi hesiyei toteteye. Lu taune tamо marepi ta'i a'i uteye, sosu lu taune tere'e marepi tere'e uteye. Piyene nomo ta'uwerai aware? Nomo so'oru ta'ama. ³³Juda lo lu tamо meni Aleksander ponei sahe au teiteye. Lu tamо le ma'e peri erasi uteye, "Ne etiri eite ani fareraiyere." Sosu Aleksander sineye su, ereti tesи fareraiyeye, "Fene werese peri titanere!" ³⁴Ahowa, lowe meni ape Juda lo meni siye so'oruweye su, lowe ahi ta'i a'i apou uteye, "Omo Efesus lo menitani Artemis wiyeme pefine ne!" Lowe nowe hesi a'i aiawwe a'i peri ape uteteye.

³⁵Omo ape sahe meni ta lese siye meni ponei sahe sineteye su, lu taune werese ma'e peri lowe lo au titaneteye. Le apou te'eye, "Lu taune omo Efesus irosiya ape, lu taune werese omo omo werese sahe irosiya ape, omo Efesus eite menitani Artemis lo yo'orei wesi au noweinoweinamisiya. Lowe werese so'oruwe tene. Nomo ipari Artemis lo hepene au noweinoweisiya. Menitani Artemis lo tapiye wara'i a'i ape ni'arawe hi awei ma'e ito wiyeinerai su, nomo hepene lo au noweinoweinamiteye. ³⁶Serai peri ano eite wiyeme a'i ne. Serai fene lai eresene iore. Fene etiri luwaru a'i irorowata. ³⁷Fene lu hesi eite henetai. Lowesi yo'orei wesi lo etiri tamо ta'arei ta'ama. Lowesi menitani Artemis lo peri owe ape te'e narute. ³⁸Sosu meni ape Demitrius lu tere'e tamо lowesi ma'e ai marepi

[°] 19:29 Ap 20:4; 27:2; Kl 4:10; Fm 24

erasi a'i toteteye su, lowe fara'u awei lu owane eti siye meni ma'e heneti. Lu owane ape mo meni ape lo yo seni luwaru a'i ape ne eti fareraiyerowa. ³⁹Sosu fene peri tere'e irosiya su, fene omo ya'ariyei lu tamo ma'e au te'e fareraiyerowa. Fene meni ape lu owane ape mo ma'e henetaiyei su, yo seni wisere a'i ne. ⁴⁰Nomo yo seni luwaru a'i irowei su, Rom lo lu owane ape mo fene ma'e ai marepi erasi toterowa. Yo seni fene lo ape lo sitewi se ta'ama. Lu owane meni ape ane ma'e ei aniyei su, ane so'oru ta'ama." ⁴¹Meni lo peri te'e tepa'asiye su, le lu taune werese eimawe fiyarisawi.

Pol Masedonia sahe Jisas lo peri au te'e fiyariteye.

20 ¹Sosu a'i pe yo seni luwaru a'i po'utesawi su, Pol lai Jisas lo lu feni werese ei ta'uwe anije. Sosu le lowe ma'e peri kairefi a'i ta au te'eye su, le lowe ma'e eritenatiyewe, pani Masedonia ma'e fi. ²Sosu pani Masedonia tewi ma'e iteye su, le lu taune tomu ne'ese lo marepi peri au te'e kairefiyeteye. Le omo pani arunati su, pani Grik ma'e heneri. ³Saro ahe le yame hesi heti iroteye. Juda lo lu tamo Pol aine tera'eyei ne toteye su, Pol marepi hesi tere'e toteye. Le pani Siria wai se iyatutiyei ne toteye. Juda lo lu tamo le ma'e au luwaruwewayi ne toteye. Le wai ape arunatiyewe, yo se omo pani Masedonia si tame iteye. ⁴Pol pani ape arunati su, le meni Sopater, Pirus lo meni eime omo Beria ma'e fai ape, aiwawe a'i fi. Lu tamo tere'e iyape Aristarkus, Sekundus, lowesi omo Tesalonaika ma'e fai ape, Gaius omo Derbe, Timoti, lu hesi Tikikus, Trofimus, omo pani Esia ma'e fai ape, lowe werese Pol mase aiwawe a'i fi. ⁵Lu ape mo tu fi. Lowe omo Troas nomo ne ninaweteye. ⁶Ahowa, ta'uwe hereiyei erasi i tepa'asiye su,^p Nomo omo Filipai wai se iyatutiteye. Nomo wai se iyatu, iyatutiteye. Poweiye ereti feni werese (5) i tepa'asiye su, nomo omo Troas heneri. Lu werese ape tu fi ape, siyeye. Poweiye ereti feni werese feni hesi a'i (7) nomo lu feni ape mase saro ahe iroteye.

Pol lai meni Yutikus si tame ta'ané norohuwe sineye.

⁷Nowe amou neriwei su, nomo werese ta'uweraiyei ne ene ateye. Sosu Pol lu taune tomu ne'ese Owane Sitewi lo peri au te'eteeye. Nowe mo'o su, Pol iyei ne toteye. Pol peri au te'e te'eteeye. Pasi po au te'eteeye. ⁸Wesi tewi hire ma'e ape sahe nomo ta'uweyei ape, yehe erei tomu ne'ese iroteye. ⁹Meni yo'orei ta iyape Yutikus umaruwe yo sahe onuteye. Pol au te'eteeye su, meni ape nihe pere'eyeye. Sosu nihe orese a'i teriteye su, le hi awei sahe winetaiye. Sosu lu tamo wesi hi itori su, meni ape hene anije. Sosu meni temeniyeye. ¹⁰Sosu Pol itori su, meni ape hi ma'e lowe uporo ape'i onuwe. Ereti lo se ya'ore anije. Le apou ekiye, "Taweiru sawa! Marepi lo norohu a'i irosiya!" ¹¹Sosu Pol wesi tewi hire ma'e si tame wiye. Sosu

^p 20:6 Ta'uwe hereiyei ape ene ayei aiwawe a'i nau ta'a se etiri eite meiyei ta'ame.

lowe nau ta'ase ani topotowewe none ene aye. Sosu Pol Owane Sitewi lo peri nowe mitaiyeye au te'ete ye. Sosu le fi. ¹²Sosu lowe meni yo'orei ape norohu a'i wesi topo lo ma'e heneti. Lowe werese marepi wisereyeteye.

Pol omo Troas arunatiyewe, omo Miletus ma'e heneri.

¹³Sosu a'i pe nomo wai se iyatutiyewe, omo Asos heneri. Omo ape sahe nomo Pol wai papu hene wiraiyei ne toteye. Tu Pol peri aiwawe te'eye. Le tu yo se uweiteyei ne toteye. ¹⁴Le nomo omo Asos sahe siyeye su, nomo le wai papu hene ani asiye. Sosu nomo werese wai se iyatutiyewe, omo Mitilini ma'e iyatu heneri. ¹⁵Nowe mo'o su nomo wai se omo Mitilini arunatiyewe, kemere Kios heneri. Sosu nowe mo'o su, nomo kemere Kios arunatiyewe, sa'i iyatu toneriyewe, omo Samos heneri. Sosu omo Samos arunatiyewe, nowe mo'o su, omo Miletus ma'e iyatu henerai. ¹⁶Pol omo Efesus awera'iyenatiyei ne toteye. Le pani Esia sahe iroteyei wou ta'ama. Le omo Jerusalem ma'e witane a'i iyei ne toteye. Le nowe Pentikos lo ene ayei erasi omo Jerusalem ma'e witane a'i iyei ne toteye. Serai nomo omo Efesus awera'iyenatiyewe, omo Miletus ma'e fi.

Pol Krais lo lu taune ma'e au te'e eritesawi.

¹⁷Pol omo Miletus saro iroteye su, le peri ta omo Efesus ma'e ausawi. Le Jisas lo lu feni tamo, ya'ariyei lu owane tamo ei aniyē.^q ¹⁸Lowe henerai su, le lowe ma'e apou ekiye, "Fene etiri ape wanu so'oruweiya. Tu naifa ane omo pani Esia fai su, ane fene mase aiwawe nowe werese iroteye. Serai fene yo seni ano siye so'oruweiya."^r ¹⁹Ane Meni Owane Pefine nomo lo wiwayi ta'anē tohoteyewe, fene ne marepi erasi a'i tote ewitete ye. Ane fene mase aiwawe iroteye su, ane meni yahowa'i a'i irowe. Ahowa, Juda lo lu werese ane ma'e au luwaruweteye. Ane fofowei erasi teriteye. Lowe ane ma'e te'e naruwe. Lowe ane aine tera'eyei ne toteye. ²⁰Fene ape so'oruwe tene! Ane peri ano fene ma'e fareyare ta'ame. Ane lu taune werese Owane Sitewi lo peri au te'e fiyariye. Peri ano fene ma'e au te'e kairefiyete ye. Ane wesi ta'i ta'i a'i Owane Sitewi lo peri au te'e fiyariye. ²¹Ane kairefi a'i se Juda lo lu taune werese, Grik lo lu taune werese ma'e apou au te'ete ye, 'Fene werese yo seni luwaru a'i ne tote ani aresaiye awetote. Sosu Jisas Meni Owane nomo lo ma'e tote tawesi umasite.'

²²Sosu pereye Owane Sitewi lo Hepene Wara'i a'i ane ma'e apou ekiye, 'Ne omo Jerusalem ma'e ire!' Ane Owane Sitewi lo peri wanuwe su, ane omo Jerusalem ma'e iyei ne toteye. Piye etiri ta ane ma'e henerairowa aware? Ane so'oru ta'ama. ²³Ane etiri ape so'oruweiya. Omo werese ape mo ane iroteye ape, Owane Sitewi lo Hepene Wara'i a'i ane ma'e apou ekiye, 'Weiyai! Orese erasi a'i tamo ne ma'e henerairowa. Lu tamo ne kalabus

^q 20:17 Ap 18:21 ^r 20:18 Ap 18:19; 19:10

wesi ma'e henetirowa.^s ²⁴ Peri ano wanure! Marepi ano aiwawe totesiya. Marepi hepene ano yahowa'i a'i irosiya. Ane Owane Sitewi lo wiwayi ta'ane po'uterowa su, ane marepi erasi a'i tote wisereyerowa. Jisas lai ane ma'e wiwayi erasi lo auwe. Ane wiwayi ape ta'ane tepe'asiyei su, ane marepi wisere a'i teriterowa. Jisas lo wiwayi erasi ape aiwawe a'i ne. Ane lu taune werese Owane Sitewi lo peri heneruwe au te'e fiyarirowa. Owane Sitewi lai lu taune werese ma'e marepi hepene he'i wara'i a'i aurowa.^t

²⁵ Sosu ane fene werese ma'e Owane Sitewi lo marepi au te'e fiyariye. Ane fene mase iroteye. Pereye a'i etiri ape ane so'oruwe tene! Fene werese ane tame siyerowata. ²⁶ Serai ane fene ma'e kairefi a'i se au te'esiya. Lu taune tamo marepi hepene he'i a'i ani ta'ame su, etiri ano ta'ama. ²⁷ Ane fene werese ma'e Owane Sitewi lo marepi werese kairefi se au te'e fiyariye. ²⁸ Fene Krais lo lu feni werese au noweinoweite. Fene lai marepi fene lo tote kairefiyete. Owane Sitewi lo Hepene Wara'i a'i lai fene ma'e wiwayi lo ape auwe. Serai fene Owane Sitewi lu feni werese fa au noweinoweite. Le a'i lai lu feni lo Jisas lo fisal'i se si tame ete hene aniye.^u ²⁹ Ane fene arunatiyei su, lu luwaru a'i tamo fene luwaruwewayi ne aiyerowa, apou wou a'i you erawe ape lai fe yene ape tomu ererowa. Lowe marepi werese fene lo luwaruwewayi ne toterowa.^v ³⁰ Lu tamo fene mase irosiya ape, lowe fene ma'e peri wawero au te'erowa. Lowe Jisas lo lu feni lo marepi tatai aniyei ne totesiya. Sosu lu taune ne'ese peri lowe lo umasirowa. ³¹ Serai weiya! Marepi ano tote tawesite! Ane lai iyu menei hesi heta mi mi pasi pasi etiri ape ne fene ma'e au te'eteye. Ane marepi ano orese a'i teriteye.^w ³² Sosu a'i pe ane marepi fene lo Owane Sitewi ma'e ausiya. Fene Owane Sitewi lo peri werese tote tawesite. Le a'i lai fene ma'e marepi hepene he'i a'i auwe. Owane Sitewi lo peri ape fene ma'e au kairefiyeterowa. Fene Owane Sitewi lo lu feni henerai. Sosu aiwawe a'i fene marepi hepene he'i anirowa. ³³ Ane etiri tamo fene lo ne, ane fene mase iroteye su, ei tatai aniye. Ma'aru werese, ipari tahe werese fene lo ane aiwawe ei tatai aniye.^x ³⁴ Etiri ape fene so'oruwe tene! Ane lau mase iroteye su, ane wiwayi ta ereti topo ano se ta'aneteye. Ane ipari tahe luwaru iroteye su, ane wiwayi ta ta'aneteye. Ane lu feni ano ma'e etiri ape mo aiwawe a'i auwe.^y ³⁵ Etiri werese ane wiwayi ta'aneteye su, ane lu taune werese ma'e au atuatuteye. Fene wiwayi erasi a'i ta'ane tohoteteye su, fene lu taune, kairefi ta'ame ape mo, au pati ta'aneteye. Fene Jisas lo peri wanure! Le apou te'eye, 'Fene lu taune tere'e etiri ta auwei su, fene marepi erasi a'i tote wisereyerowa. Lu taune tere'e lai etiri ta fene ma'e auwei su, fene marepi oso a'i teriterowa.' ”

^s 20:23 Ap 9:16; 21:11 ^t 20:24 Ap 21:13; 2 Ti 4:7 ^u 20:28 1 Ti 4:16; 1 Pi 5:2-4

^v 20:29 Mt 7:15; Jo 10:12 ^w 20:31 1 Te 2:11 ^x 20:33 1 Ko 9:11-12; 1 Te 2:9

^y 20:34 Ap 18:3

³⁶Sosu Pol peri ape te'e tepa'asiye su, le lowe mase lowe uporo ape'i onuwewe, Owane Sitewi ma'e au te'e wisereyeteye. ³⁷Sosu lowe werese marepi erasi a'i ewiteye. Lu ewiteye erasi lowe iroteye. Sosu lowe le ma'e ereti towafi lowe lo se ya'ore wisereyeteye. Sosu le lowe ma'e erasi erite irowe. ³⁸Pol lowe ma'e apou te'leteye su, "Ane fene werese si tame siyerowata." Lowe lu ewite erasi irowe. Sosu lowe le mase aiwawe a'i wai ma'e wi atoweye.

Pol omo Jerusalem ma'e si tame fi.

21 ¹Sosu a'i pe nomo, ane one towe ape leseye ape aiwawe, lowe arunatiyewe, wai erasi se iyatutiteye. Nomo omo Kos sa'i feni ma'e iyatu toneri. Nowe mo'o su, nomo omo Kos arunatiyewe, omo Los heneri. Sosu omo Los arunati su, nomo omo Patara heneri. ²Sosu nomo wai erasi tere'e ta se omo Fonia ma'e fi. Nomo wai ape papu wi atowe. Sosu feni ma'e iyatuti. ³Sosu, nomo omo Patara arunati su, nomo kemere Saiprus siyeye. Nomo kemere ape eyate feni ma'e awera'iyenati. Kemere Saiprus arunati su, omo pani Siria toneri. Nomo wai se omo Tair ma'e iyatu furi. Etiri werese, wai ape sahe iroteye ape, omo Tair ma'e ani lotonatiyei ne toteye. ⁴Nomo Jisas lo lu feni tamo siyeye su, nomo poweiye ereti feni werese feni hesi a'i (7) saro ahe iroteye. Lowe Owane Sitewi lo Hepene Wara'i a'i se Pol ma'e apou eiye, "Ne omo Jerusalem ma'e owe ape ire."^z ⁵Sosu nomo iyei ne toteye su, nomo etiri werese nomo lo ta'uweyewe, sosu nomo lowe arunatiyewe fi. Nomo fi su, lu taune werese, eimane werese ape mo lowe nomo mase sa'i tewiye ma'e fi. Sosu sa'i tewiye sahe nomo werese lowe uporo ape'i onuwewe, Owane Sitewi ma'e au te'e wisereyeteye. ⁶Sosu nomo lowe werese ma'e eriteye su, nomo wai papu wi atowe. Nomo wai papu wi atowe su, lowe werese wesi towafi lowe ma'e lo si fi.

Meni Agabus, Pol ma'e peri wiyeme a'i ta au te'eye.

⁷Sosu nomo wai se omo Tair arunati su, nomo omo Tolemes iyatu furi. Wai ape furi su, nomo lu feni tamo eriteye. Sosu, nomo lowe mase poweiye ta'i saro ahe iroteye. ⁸Nowe mo'o su, nomo omo Tolemes arunati su, nomo omo Sisaria ma'e iyatu heneri. Nomo Filip lo wesi sahe aiwawe iroteye. Filip Owane Sitewi lo peri au te'e siye meni. Tu naifa lu taune tomu ne'ese Jisas lo peri umasiteye ape, lowe lu ereti feni werese feni hesi a'i (7) Jerusalem sahe ei ariariyeye. Filip meni ta'i aiwawe a'i ariariyeye. Wiyawi lowe lo ape ne, lowe lu taune ayei tamo noneteye.^a ⁹Meni ape eime taune wati'are hesiyo hesiyo iroteye. Taune ape mo, etiri nowe me'iye su henerairowa ape, au te'e areiyeteye. ¹⁰Powiye tomu

^z 21:4 Ap 20:23 ^a 21:8 Ap 6:5; 8:40

ne'ese nomo saro ahe iroteye su, meni ta Owane Sitewi lo peri au te'e siye meni, iyape Agabus, pani Judia ma'e arunatiyewe, omo Sisaria ma'e itorai.^b ¹¹Sosu le nomo ma'e henerai su, le Pol lo lire wafei aniy. Sosu le ereti lowe topo lo lire wafei sahe ti tawesiteye. Sosu le apou ekiye, "Owane Sitewi lo Hepene Wara'i a'i apou eisia, 'Juda lo lu tamo meni ape lire wafei eite ani asiteye ape, aiwawe a'i ti tawesirowa. Sosu lowe meni ape awei lo lu owane tere'e ma'e heneti.' "^c

¹²Sosu nomo peri ape wanuwe su, nomo werese Pol ma'e apou ekiye, "Ne omo Jerusalem ma'e owe ape yanere." ¹³Sosu Pol lowe ma'e itiya'u ekiye, "Fene piyene lu ewite irosiya awere? Piyene marepi ano afofoweye awere? Fene luwei sawa! Owane Sitewi lai ane ma'e apou au eirowa su, lowe ane ma'e ereti lowe wafei se ti tawesirowa. Wiyeme a'i ne ane omo Jerusalem sahe fara'u temeniyerowa. Omo ape sahe ane Meni Owane Jisas lo wiyawi, ane ta'anerowa ape, temeniyerowa su, etiri fara'u a'i ne."^d

¹⁴Sosu Pol lo marepi kairefi a'i teriteye su, lowe peri itiya'u te'e ta'ame. Sosu nomo werese apou te'eye, "Nomo Meni Owane Pefine ma'e apou ei toweriyei, marepi no aiwawe a'i nomo umasirowa."

Pol kalabus wesi omo pani Judia sahe iroteye su, lowe le etiye.

(Aposel 21:15–26:32)

Pol omo Jerusalem ma'e henerai.

¹⁵Nowe me'iye su, nomo etiri werese nomo lo ta'uwe su, nomo omo Sisaria arunatiyewe, omo Jerusalem ma'e yaneri. ¹⁶Sosu lu feni tamo, omo Sisaria ma'e fai ape, nomo mase aiwawe fi. Sosu lowe nomo Nason lo wesi ma'e heneti. Wesi ape sahe nomo saro iroteye. Meni ape kemere Saiprus ma'e henerai. Tu naifa le Jisas ne tote umasiteye.

Pol omo Jerusalem ma'e henerai.

¹⁷Nomo omo Jerusalem ma'e henerai su, Jisas lo lu feni nomo hene aniyei ne au te'e wisereyeye.

¹⁸Nowe mo'o su, Pol nomo werese aiwawe a'i meni Jems ma'e siyeyei ne fi. Lu feni nomo lo ya'ariyei lu tamo Jems mase aiwawe sewiyeye. ¹⁹Sosu Pol lowe werese eriteye su, le lowe werese ma'e Owane Sitewi lo wiyawi werese ne au te'eteye. Owane Sitewi lu tewi tere'e ma'e wiyawi erasi ta'aneteye. Lu taune tomu ne'ese Pol lo peri umasiteye. Lowe Jisas ne tote umasiteye.^e

^b 21:10 Ap 11:28 ^c 21:11 Ap 20:23; 21:33 ^d 21:13 Ap 20:24 ^e 21:19 Ap 15:12

Pol Owane Sitewi lo wesi tutawe ma'e fi.

²⁰Sosu a'i pe lowe Pol lo peri wanuwe su, lowe Owane Sitewi ma'e au te'e wisereyeye. Sosu lowe Pol ma'e apou eiye, "Kaiyemo Pol, ne etiri eite so'oruvesiya. Juda lo lu taune tomu ne'ese a'i Jisas lo peri tote umasiteye. Lu feni werese ape mo aiawae a'i Moses lo yo peri umasiteye.^f ²¹Sosu lowe peri no wanuwe. Ne Juda lo lu tamo Pani tere'e tere'e ma'e iroteye ape, apou au te'eteye, 'Fene werese Moses lo yo peri owe ape umasite.' Ne lowe werese ma'e apou au te'e atuatuteye, 'Fene mitaru werese tahe lowe lo owe ape toure. Fene Juda lo marepi werese nomo lo owe ape umasite.'

²²Nomo piye irowei aware? Juda lo lu taune, Jisas ne tote umasiteye ape, lowe werese, ne fai ape, wanurowa. ²³Sosu nomo lowe ma'e piye peri te'erowa aware? Nomo etiri ape, ne piye irorowa ape, ne ma'e au te'esiya. Lu hesiyo hesiyo saro ahe iroteye. Lowe Owane Sitewi ma'e peri te'e naneiyei ta a'i au te'e naneiyei.^g ²⁴Ne lu hesiyo hesiyo ape mase ire. Lowe Moses lo yo peri umasisiya ape, lowe yo seni aseyaro a'i irorowa. Ne lowe mase aiawae a'i yo seni aseyaro irote. Ne etiri Owane Sitewi ma'e au heseyei ape fara'u etere. Lowe yo seni aseyaro a'i tepa'asiye su, lowe fara'u mato towé werese au howere. Serai lu taune werese yo seni no siyeye su, lowe peri no, lowe wanuwe ape, peri wawero a'i siye so'oruwerowa. Ne lai Moses lo yo peri umasisiya.^h ²⁵Sosu lu tewi tere'e, Jisas umasiye ape, nomo one towé lowe ma'e lese ausawi. Nomo lo peri apou te'esiya, 'Sepei luwaru a'i lo ayei fene owe ape ene are. Fene fisai'i werese owe ape ene are. Fene fe lo'u, ereti se aine tera'eye ape, fisai'i henerai ta'lame ape, owe ape ene are. Fene tafa'e yo seni luwaru a'i owe ape irote.'ⁱ

²⁶Nowe mo'o su, Pol lu hesiyo hesiyo ape mo hene aniyé su, lowe yo seni werese aseyaro a'i irowe. Sosu yo seni aseyaro a'i tepa'asiye su, le Owane Sitewi lo wesi papu wiye. Le Owane Sitewi lo wesi wiyawi iro siye lu ma'e apou au te'eye, "Nowe yo seni aseyaro a'i iro tepa'asiyei su, nomo etiri ta Owane Sitewi ma'e nomo ta'i ta'i a'i au hese ereirowa."^j

Juda lo lu owane tamo Pol lo ereti anite tawesiye.

²⁷Nowe mi ereti feni werese feni hesi a'i (7) i tepa'asiye su, Juda lo lu tamo, omo pani Esia ma'e fai ape, lowe Pol Owane Sitewi lo wesi papu siyeteye. Lowe lu taune werese ne ai marepi erasi a'i au iroteye. Lowe Pol lo ereti se anite tawesiye su, lowe lu taune werese ma'e apou hareye, ²⁸"Juda lo lu taune werese nomo pati anire! Meni eite lu taune werese ma'e apou au te'e atuatusiya, 'Fene werese Juda lo marepi werese

^f 21:20 Ap 15:1,5 ^g 21:23 Ap 18:18 ^h 21:24 Nam 6:1-20 ⁱ 21:25 Ap 15:29

^j 21:26 1 Ko 9:20

arunatite. Fene Moses, lo yo peri owe ape umasite. Fene Owane Sitewi lo wesi ape owe wire.' Fene peri nomo lo wanute! Meni ape meni tewi tere'e ta Owane Sitewi lo wesi papu hene wiye. Yo seni ape amou tene! Le Owane Sitewi lo wesi tutawe unou a'i au iroteye." ²⁹Lowe meni ta, iyape Trofimus, Pol mase iro siyeteye. Serai lowe apou toteye, "Pol meni ape Owane Sitewi lo wesi tutawe papu hene wiye."^k

³⁰Lu taune werese omo Jerusalem sahe peri lowe lo wanuwe su, lowe werese itero ta'uwerai. Lowe Pol anite tawesiraiyewe, Owane Sitewi lo wesi nowe ma'e hene ani ni'ariye arosawi. Pereye a'i lowe Owane Sitewi lo wesi tutawe lo yo ti tawesiteye.

Rom lo ai lu tamo lai Pol ereti anite tawesiye.

³¹Lowe Pol aine tera'eyei ne toteye su, Rom lo ai atu siye lu lo meni owane ahi erasi wanuwe. Lu taune werese, omo Jerusalem sahe iroteye ape, Pol ma'e au luwaruweteye. ³²Pereye a'i meni owane ape lu erasi tamo witane a'i lowe ma'e itorai. Lu taune meni owane ape siyetai su, lowe Pol tame aine na ta'aime. ³³Sosu Meni Owane ape Pol ma'e itero anite tawesirai. Le ai atu siye lu tamo ma'e apou eiye, "Fene wafei erasi hesi se Pol ti tawesite." Lowe Pol wafei se ti tawesi tepa'asiye su, le lowe ma'e apou ei toweriye, "Meni eite eiwerai awere? Le piye yo seni irowe awere?" ³⁴Lu taune tamo peri ta'i a'i au te'eye, lu taune tere'e tamo peri tere'e tere'e au te'eye. Lu taune peri ahi erasi a'i te'eye su, meni owane ape peri sitewi lowe lo wanu eti ta'aime. Serai le ai atu siye lu tamo apou eiye, "Fene wesi nomo lo ma'e Pol hene meme'itire." ³⁵Sosu lowe Pol wesi lowe lo ma'e hene meme'itiye su, lu taune werese ai marepi erasi a'i toteye. Lowe le aine tera'eyei ne toteye. Sosu ai atu siye lu tamo le ereti werese se wesi papu hene meme'iti wiye. ³⁶Sosu lu taune werese apou hareyei erasi uteye, "Meni ape aine tera'ere! Meni ape aine tera'ere!"^l

Pol tote tawesiyei lo peri sitewi ne au te'eteeye.

³⁷Sosu a'i pe ai atu siye lu Pol wesi papu hene wiyei ne toteye su, Pol meni owane ma'e apou ei toweriye, "Ane ne ma'e peri ta ei toweriyei awere?" Sosu Meni Owane ape peri ta itiya'u ei toweriye, "Ne peri Grik te'esiya awere? ³⁸Ane ne ne apou toteye, Ne lai Isip lo meni eite tu naifa le lu owane ma'e ai atu tiyatiteye, sosu ai atu siye lu 4,000 pani ariye a'i hene meme'ititeye."^m

³⁹Sosu Pol itiya'u apou eiye. "Ane Juda lo meni wiyeme a'i ne. Ane omo Tarsus pani Silisia ma'e fai. Omo ano iyape se. Ane lu taune werese peri ta au te'eyei ne toteye. Ane ne ei towerisiya, fara'u awere?" ⁴⁰Sosu meni owane le ma'e apu eiye, "Fara'u ne peri no au te'ete eiye." Sosu Pol

^k 21:29 Ap 20:4 ^l 21:36 Lu 23:18 ^m 21:38 Ap 5:36-37

wesi tawati saro teiteye su, ereti lo tesu fuwe. Sosu lu taune werese peri titaneye su, Pol lowe ma'e peri Hibru se au te'eteye.

22 ¹“Kaiyemo mo ano, aite werese ano, ane peri no ne, itiya'u au te'eye ape, wanure!” ²Sosu lowe werese Pol peri Hibru se te'eye su, lowe peri titaneye. ³Sosu Pol apou te'eteye, “Ane Juda lo meni pefine a'i ne. Mai ano, omo Tarsus sahe omo pani Silisia iroteye ape, ane auteiye. Sosu ane meni eime oso a'i omo Jerusalem ma'e fi. Ane saro ahe iroteye su, meni ape, Gamaliel, lai ane ma'e Moses lo yo peri au te'e atuatu etiteye. Sosu ane lai ya'ariyei nomo lo marepi ape kairefi a'i umasiteye. Fene pereye aiwawe a'i.” ⁴Sosu ane lai lu taune werese, Jisas lo marepi umasiteye ape, au luwaruweteye. Lu tewi tamo ane lai aine tera'eye. Ane lai lu taune, eimane werese wafei se ti tawesiyewe, kalabus wesi ma'e heneti.⁵ Au heseyei lu owane pefine lu ta'uwe owane, ta'uweyei ape peri ano pefine a'i au te'eyei. Lowe one tote ta omo Damaskus lo lu owane tamo ma'e lese ausawi. Ane lai omo ape sahe one tote ape aiti. Ane lai lu taune werese, Jisas lo marepi tote umasiteye ape, omo Jerusalem ma'e henetaiyei ne toteye. Ane lowe werese kalabus wesi ma'e henetiyei ne toteye.

Pol lowe ma'e marepi hepene he'i a'i lo ne au te'eye.

(*Aposel 9:3-19; 26:12-18*)

⁶Poweiyе po se ane yo sahe iteye su, ane omo Damaskus atahе a'i heneri. Pereye a'i mi erasi a'i ni'arawe ma'e itorai. Ane ma'e tewi mitaiye fiyariye. ⁷Sosu ane awei sahe winetaiye su, ane peri ahi wanuwe. Peri ahi apou eiye, ‘Sol, Sol, ne ane ma'e piyene au luwaruwesiya awere?’ ⁸Sosu ane le ma'e itiya'u ei toweriye, ‘Owane, ne eiwerai awere?’ Sosu peri ahi itiya'u eiye, ‘Ane lai Jisas omo Nasaret ma'e fai. Ne lai ane luwaru a'i irosiya.’ ⁹Lu ape mo, ane aiwawe fi ape, mi erasi ape siyeye. Ahowa, lowe peri ahi wanu ta'ame. ¹⁰Sosu ane apou ei toweriye, ‘Meni Owane, ne ane eiwerou irowei ape au te'erowa.’ ¹¹Lu tamo ane mase itiye ape, lowe ereti ano anite tawesiyewe, omo Damaskus ma'e heneti. Mi erasi ape nihe ano niso'uwe.

¹²Ane omo Damaskus henerai su, meni ta'i iyape Ananaias ane ma'e sewiyeyei ne fai. Meni ape Moses lo yo peri umasi etiteye. Juda lo lu taune werese omo ape sahe meni ape ne wisereyeyei ne toteye. ¹³Le ane ma'e teirai apou eiye, ‘Kaiyemo, Sol, nihe no tame siye petanere.’ Sosu pereye a'i ane fara'u siyeye. Sosu ane le siyeye. ¹⁴Sosu le tame eiye, ‘Nomo ya'ariyei lo Owane Sitewi ne ariariyeteye. Ne lai Owane Sitewi lo

ⁿ 22:3 Ap 5:34 ^o 22:4 Ap 8:3

marepi wanu so'oruwerowa. Ne lai meni wisere a'i pefine lo siyerowa. Meni ape lai ahi se ne ma'e au te'e atuaturowa.¹⁵ Ne lai lu taune werese ma'e, etiri ne siyeteye ape, soso wanuteye ape, au te'e fiyarirowa.¹⁶ Ne owe ape ninawere! Ne Jisas lo marepi tote umasiyei su, ane ne fara'u sa'i au huwei. Ne Jisas lo marepi tote umasiyei su, le yo seni luwaru werese a'i no au ani sasari pamowerowa.'

Pol lu tewi tere'e ma'e au te'eyei ne eimawesawi.

¹⁷Sosu ane omo Jerusalem ma'e si tame fi. Ane Owane Sitewi lo wesi papu le ma'e au te'eteeye su, ane suwou hamehameyei siyeye.¹⁸ Suwou hamehameyei ape sahe owane pefine lai ane ma'e au te'eteeye. Le apou te'eye, ‘Ne omo Jerusalem witane a'i arunati. Ne peri ano au te'eyei su, lu taune werese wanu anirowata.’^p ¹⁹Ane le ma'e itiya'u ekiye, ‘Meni owane pefine, lu werese ape mo etiri ape wanu so'oruweye. Ane ta'uweye wesi werese ma'e lu feni werese lo, ane lowe kalabus wesi ma'e heneti. Ane lowe umasiteye su, ane tahe lo kairefi a'i ainanati.^q ²⁰Sosu lowe meni Stiven fene lo au te'e siye meni, tapiye se aine tera'eye, ane aine tera'eye ape ne, ane marepi wisereyeye. Ane ipari tahe werese lowe lo au noweinoweiteye.’^r ²¹Sosu Owane Sitewi Pefine a'i ane ma'e itiya'u ekiye, ‘Ne ire. Ane ne lu tewi tere'e ma'e omo eyeri ma'e eimawesawiyei.’^s

Pol Rom lo meni pefine a'i ne.

²²Lu taune werese Pol lo peri ape wanuwe su, lowe werese ai marepi erasi toteye. Lowe apou hare uteye, “Meni ape aine tera'ere! Meni ape aine tera'ere, Meni apou ape awei sahe irotorowata.”²³ Lowe werese ai marepi erasi a'i hare uteye su, lowe ipari tahe towafi lowe lo ani topoto fiyari ereye. Awei peperi ape hire ma'e ani ere aweye.²⁴ Sosu ai atu siye meni owane, Pol wesi papu hene wiye. Le ai atu siye lu tamo apou te'eye, “Fene meni eite wesi papu hene wiyewe, tahe lo sahe aine nare.” Fene tahe lo sahe aine na tepa'asiye su, fene le ma'e apou ei towerire, “Piyene lowe werese ne ma'e peri erasi hare uteye awere?”²⁵ Lowe Pol ereti lowe lo wafei se ti tawesiye su, Pol meni owane ma'e ei toweriye, “Ane Rom lo meni pefine a'i ne. Lowe ane eti se ta'amé. Peri ano wanu ta'amé. Fene lai yo peri fene lo apou te'esiya awere? Ne fara'u meni aiwawe a'i aineyei awere?”^t

²⁶Sosu ai lu meni owane pefine a'i ape peri lo wanuwe su, le ai atu siye meni owane ma'e siyeyei ne fi. Le apou te'eye, “Meni eite Rom lo meni ne. Ne a'i lai eiwerou irowei awere? Ne Rom lo meni aiwawe a'i aine narowata.”

^p 22:18 Ap 9:29-30 ^q 22:19 Ap 8:3; 26:9-11 ^r 22:20 Ap 8:1 ^s 22:21 Ap 9:15

^t 22:25 Ap 16:37

²⁷Sosu ai atu siye meni owane lai Pol ma'e ei toweriyei ne fai, “Ne ane lai ma'e eire! Ne Rom lo meni pefine a'i awere?” Sosu Pol itiya'u eiye, “Ei, aine Rom lo meni pefine tene.”

²⁸Sosu ai atu siye meni owane apou eiye, “Ane Rom lo meni henerai su, aine ma'aru tomu ne'ese ani eteye.” Ahowa, Pol itiya'u eiye, “Mai ano autieyi su, aine Rom lo meni pefine a'i henerai.”

²⁹Sosu lowe, te'e toweriyei ne fai ape, pereye a'i atoweiyeye si fi. Ai atu siye meni owane lai hepene se su'ariye. Le atoweiyeye iroteye. Le Pol Rom lo meni pefine a'i wafei se ti tawesiye ape, si atoweiyeye. Le Pol wafei se ti tawesiye su, le Rom lo yo peri arisiye. Le Pol lo tahe aine naye su, aiwawe a'i Rom lo yo peri arisiye.”

Pol lai ta'uweyei wesi sahe au te'e areiyeye.

³⁰Nowe mo'o su, ai atu siye meni owane peri sitewi wiyeme a'i wanu etiyei ne toteye. Sosu le ta'uweyei wesi tere'e owane werese ei ta'uwerai. Owane Sitewi lo wesi lu owane werese te'e ta'uwerai. Sosu le Pol ta'uweyei wesi ma'e lowe Pol heneti. Lu owane werese ponei sahe teiye.

23 ¹Sosu Pol ponei sahe teiteye su, le lowe ma'e au te'eye, “Kaiyemo mo ano, aine mi mi werese marepi wisere a'i tei iroteye. Ane yo seni luwaru a'i iro ta'am. Owane Sitewi lai etiri ape siye so'oruweiya.”^w ²Sosu au heseyei meni owane pefine a'i Ananaias, peri ape wanuwe su, le, lu tamo Pol ataque a'i teiye ape ma'e, apou te'eye, “Fene ahi lo sahe ainere.”^v ³Sosu Pol le ma'e te'e naruwe apou itiya'u eiye, “Ne marepi hesyei tote siye meni, Owane Sitewi lai ne aine tera'le temeniyerowa. Ne lai wesi me wou a'i ta'e towasisiya ape, tahe lo wisere a'i lo'u lo papa'u a'i irosiya. Ne ataque a'i winetairowa. Ne a'i lai aine Moses lo yo peri ne au hese eti areyesiya. Ahowa, ne aine ahi sahe aine naye su, ne a'i lai yo peri ape arisiye.”^x

⁴Sosu lu tamo, Pol ataque a'i teiye ape, lowe Pol ma'e eiye, “Piyene ne au heseyei meni owane tutawe ma'e te'e naruwe awere?”

⁵Sosu Pol itiya'u apou te'eye, “Kaiyemo mo ano, aine au heseyei meni owane tutawe so'oru ta'ama. Tu naifa, Owane Sitewi apou te'eye,

‘Fene werese lu owane werese fene lo ma'e owe ape te'e narute.’ Serai aine le ne so'oruweiya su, aine le ma'e peri ape te'e narurowata.”

Kis 22:28

⁶Sosu Pol lu Farisi, lu Sadyusi wesi ape papu siyeye su, le lowe ma'e uteye, “Kaiyemo mo werese, aine meni Farisi pefine a'i ne. Tai ano aiwawe a'i meni Farisi pefine a'i ne. Ane Owane Sitewi lai marepi hepene si tame ta'anorohuwe hene aniyei ne tote tawesiye. Fene aine etiri ape ne au hese etiye.”^x

^u 22:29 Ap 16:38 ^v 23:2 Jo 18:22-23 ^w 23:3 Mt 23:27 ^x 23:6 Ap 26:5

⁷Sosu Pol peri ape au te'eye su, lu taune werese ai marepi erasi a'i toteteye. Sadyusi lu werese lai, Farisi lu werese ma'e ai marepi erasi toteye. ⁸Sadyusi lu werese lowe marepi apou a'i toteye. Lu taune werese norohuwe si tame sinerowata. Lowe marepi tere'e apou toteye, "Owane Sitewi lo ipari wisere a'i, sosu ipari tere'e tere'e iro ta'ame." Ahowa, Farisi lu werese etiri werese ape mo tote tawesiye.^y ⁹Sosu lowe ai marepi erasi a'i tote tiyatiteye su, Farisi lu owane tamo ponei ma'e teiteyewe, lowe si tame norohuweyei ne peri kairefi a'i au te'eteye. Sosu lowe apou te'eye, "Meni ape yo seni luwaru a'i iro ta'ame. Ipari wisere a'i ta lai meni ape au te'eteye awere? Owane Sitewi lo ipari wisere a'i le ma'e au te'eteye awere? Nomo so'oru ta'ama."

¹⁰Sosu ai marepi erasi luwaru a'i henerai su, ai atu siye meni owane Pol wesi topo lo ma'e heneti. Lowe Pol aine tera'eyei ne toteye su, ane lowe ne atoweiyesiya.

¹¹Mo'o pasi su, Meni Owane Pefine a'i Pol ma'e atahe a'i teirai. Le Pol apou ekiye, "Ne tei kairefiyere. Ne atoweiyeh sawa! Ne ane ne omo Jerusalem sahe au te'e fiyarirowa su, ne ane ne omo Rom aiwawe a'i au te'e fiyarirowa."^z

Lu owane tamo Pol aine tera'eyei ne te'e naneiye.

¹²Nowe esi mo'o su, Juda lo lu tamo ta'uwerai. Lowe apou toteye, "Nomo werese ayei werese sa'i werese siyenamiye. Nomo Pol aine tera'eye su, nomo fara'u ayei ene arowa, sa'i tamo ene arowa." ¹³Lu hesi werese (40) aiwawe a'i toteye. ¹⁴Lowe au heseyei lu owane ma'e, ya'ariyei lu owane ma'e te'e siyenamiyei lo peri te'eyei ne fi. Lowe ma'e te'eye, "Nomo werese ayei werese siyenamiyei. Pol temeniyeyei su, nomo fara'u ayei tame ene ayei. ¹⁵Sosu a'i pe fene ta'uweyei ape, iyape Sanhitran, Pol ei anire. Fene ai lu meni owane ma'e apou te'ere, 'Nomo Pol lo etiri siye eti so'oruwerowa.' Fene le heneta. Fene owane ma'e apou te'eye, Ahowa, Pol aiyeyei su, nomo le aine tera'eyei."^a

¹⁶Ahowa, Pol lo eiwane peri lowe lo wanuwe su, le ai atu siye lu lo wesi papu wiye. Le Pol ma'e apou ekiye, "Lowe ne aine tera'eyei ne totesiya."

¹⁷Sosu Pol ai atu siye meni owane ta ei aniye. Le apou ekiye. "Ne meni eime ai atu siye meni owane ma'e henetire. Le peri ta ne ma'e au te'eyei ne fai." ¹⁸Sosu le eiwane meni erasi ma'e heneti. Ai atu siye meni owane ape apou ekiye, "Pol meni ape, nomo wafei se ti tawesiye ape, le meni eime eite ne ma'e eimawesawi. Meni eime ne ma'e peri ta au te'eyei ne fai."

¹⁹Sosu ai atu siye meni owane ereti lo aine aiya'l aniyewe, le tewi wesi sahe feni eire ma'e heneti. Sosu le apou ei toweriye, "Ne piye peri ta te'eyei ne fai awere?"

^y 23:8 Mt 22:23 ^z 23:11 Ap 27:24; 28:16,23 ^a 23:15 Ap 25:3

²⁰Meni eime ape apou eiye, “Juda lo lu tomu ne'ese apou te'e naneiye. Lowe apou toteye, ‘Nomo nowe mo'o su, Pol owane meni ma'e henetirowa.’ Lowe apou te'erowa, ‘Nomo Pol lo peri eti wanu so'oruweysi ne fai.’ ²¹Ne le lowe ma'e owe ape henetai. Lu tomu ne'ese, lu hesi tawerese aiwawe a'i (40) Pol aine tera'eyei ne toteye. Lowe ayei, sa'i werese siyenamiye. Pol aine tera'eyei su, lowe fara'u ayei, sa'i ene arowa. Lowe lo etiri ape ta'uwe naneiteye, ne peri lo ape aniyei su, lowe Pol, ai lu meni owane ma'e henetirowa su, soso lowe le aine tera'erowa.”

²²Sosu ai atu siye meni owane ape lai meni eime nowe ma'e eimawesawi. Le meni eime ape apou eiye, “Ne lu taune werese ma'e owe ape te'ere.”

Pol omo Sisaria ma'e heneti.

²³Sosu a'i pe ai atu siye meni owane tutawe lai lu owane hesi lo ei aniyei, “Fenesi ai atu siye lu tomu ne'ese ei ta'uwe naneire. Ai atu siye lu 200, lu tere'e 70, fe hos nihari tere'e erasi sahe onuwei ape, lu tere'e 200 ti aniteye ape, ei ta'uwe naneire. Nowe pasi a'i lowe werese omo Sisaria ma'e iyei. ²⁴Fenesi Pol ma'e fe hos hire fa onure. Fenesi le meni owane erasi iyape Feliks ma'e heneti. Lu tamo Pol owe ape aine tera'ere.” ²⁵Sosu le one towi ta apou leseye,

²⁶“Ane lai Klodius Lisias.

One towi eite meni owane Feliks ma'e ausawiyei. Ane ne se eritewa.

²⁷Juda lo lu tamo meni eite anite tawesiye. Lowe le aine tera'eyei ne toteye. Ahowa, ane lai ai atu siye lu werese ano aiwawe ereti lowe lo sahe ani erauwe. Ane Rom lo meni eite wanuwe.^b ²⁸Sosu ane lai meni ape lo peri eti wanuwei ne toteye. Ane le lu owane ta'uweyei ape ma'e heneti.^c ²⁹Sosu ane lowe ma'e peri eti ei toweriye su, lowe itiya'u apou te'eye, ‘Meni eite yo peri nomo lo arisiye. Meni eite yo seni luwaru a'i iro ta'ame.’ Serai ane aiwawe toteye, meni eite yo seni luwaru a'i iro ta'ame. Serai nomo meni eite aine tera'erowata. Ane le kalabus wesi ma'e henetirowata. ³⁰Sosu ane peri ape, lowe aine tera'eyei ne toteye ape ne, wanuwe su, pereye a'i ane le ne ma'e eimawesawi. Ane lu tere'e tamo ne ma'e eimawesawi. Lowe Pol ne peri ahi a'i ne ma'e au te'erowa. Peri ano tepa'asiye.”^d

³¹Sosu pasi po, ai atu siye lu tomu ne'ese a'i lowe Pol omo Antipatris ma'e heneti. ³²Nowe esi mo'o su, lu fe hos onuwe ape, lowe Pol omo Sisaria ma'e heneti. Ai atu siye lu werese wesi lowe lo ma'e si tame fi.

³³Lowe omo Sisaria ma'e heneri su, lowe one towi meni owane ma'e auwe. Sosu le ma'e Pol henetai. ³⁴Meni owane one towi ape siye te'eteye su, le Pol ma'e ei toweriye, “Omo pani no eiwerou irosiya awere?” Sosu

^b 23:27 Ap 21:30-33; 22:25-27 ^c 23:28 Ap 22:30 ^d 23:30 Ap 24:5-8

Pol le ma'e itiya'u apou eiye, "Omo pani ano Silisia." ³⁵Sosu meni owane apou eiye, "Fara'u, lu tere'e tamo, ne etiyei ape, heneraiyei su, ane peri no wanurowa." Sosu le Pol Herot lo wesi erasi ma'e, le tu iroteye ape, henetyewe, ai atu siye lu tamo le tei ninaweteye.

Juda lo lu lai Pol etiye.

24 ¹Nowe poweiye ereti feni werese i tepa'asiye su, au heseyei meni owane iyape Ananaias, ya'ariyei lu tamo, au te'e siye meni iyape Tertulus, lowe werese omo Sisaria ma'e itorai. Lowe awei meni owane tutawe ma'e Pol etiyei ne fai. ²Lowe Pol ei aniy su, meni Tertulus, meni owane tutawe Feliks ma'e Pol lo yo seni luwaru a'i apou au te'eye, "Feliks ne lai nowe tomu ne'ese wisere a'i irowe. Lu werese ai atu tiyatirowata. Ne lai peri fere lu taune werese ma'e au irowe. Ne lai etiri werese, wisere a'i ta'aneye. Kairefi no se ne lai etiri wisere a'i au ta'aneye. ³Lu taune werese omo omo werese sahe ne, owane pefine ma'e au te'e wisereyeye. ⁴Ane peri tam oso po'o a'i ne ma'e au te'eyei ne fai. Ne fara'u wanurowa awere? ⁵Meni eite luwaru a'i tene! Le Juda lo lu taune werese ma'e ai marepi erasi a'i iroteye. Omo omo werese sahe le ai marepi au iroteye. Le lai lu tewi tere'e lo meni owane tutawe. Lu tewi tere'e lo iyape Nasaret. Lowe werese Nasaret lo meni ta umasiteye. ^e ⁶Le etiri luwaru a'i Owane Sitewi lo wesi tutawe sahe irowei ne toteye. Yo peri nomo lo amouwesiya. {Serai nomo le ereti lo anite tawesiye. Nomo le yo peri nomo lo se etiyei ne toteye. ^f ⁷Ahowa, ai atu siye meni owane iyape Lisiyas, sosu ai atu siye lu tomu ne'ese aiwawe kairefi erasi se lowe le heneti. ⁸Sosu le nomo ma'e apou eiye, fene meni eite Feliks ma'e etiyei ne ire.} ^g Ne le ma'e siye etiyei su, ne lai peri ano wiyeme a'i wanu so'oruwerowa. Etiri eite nomo etiyei ne fai ape pefine a'i ne." ⁹Sosu Juda lo lu werese wanuwe su, lowe ahi ta'i aiwawe a'i au te'eye. Lowe apou te'eye, "Etiri werese ape mo pefine a'i tene!"

Pol meni owane Feliks ma'e au te'e areiyeye.

¹⁰Sosu awei meni owane ape Pol aine aiya'o aniy su, Pol apou itiya'u eiye, "Iyu menei tomu ne'ese omo pani eite sahe ne lai au heseyei siye meni pefine a'i ne. Serai ane ne ma'e itiya'u au te'e areiyerowa. Ane marepi erasi a'i wisereye nine'isiya. ¹¹Ne fara'u lu ape mo ma'e apou te'e towerire, 'Poweiy ereti feni hesi lowe hesi a'i i tepa'asiye su, ane lai omo Jerusalem ma'e Owane Sitewi ma'e au te'e wisereyeyei ne fi.' ¹²Lu tewi ape mo ane ma'e, ai peri

^e 24:5 Ap 17:6 ^f 24:6 Ap 21:28-30 ^g 24:8 Peri eite yaru {"sosu"} ponei sahe irosiya ape, peri eite piye meni lai leseye aware? Lu so'oru se tamo lowe so'oru ta'ama. Ya'ariyei one towi tomu tamo sahe peri eite iro te ta'am. One towi tere'e tamo sahe peri eite iroteye.

te'e tiyatiteye ape, au fu te'esiya. Lowe ane ma'e ai peri lu taune ma'e te'e tiyatiteye ape, siye ta'ame. Ane Owane Sitewi lo wesi tutawe wiye su, ane lu tamo ai peri te'e tiyati ta'ame. Ane lai ta'uweyei wesi papu lu taune ma'e yo seni luwaru a'i iro ta'ame. Pani tewi tere'e ma'e ane yo seni luwaru a'i iro ta'ame.¹³ Peri lowe lo ape ane au fu te'eye su, lowe peri sitewi lo ne ma'e au te'e atuaturowata.¹⁴ Ahowa, ane peri ta ne ma'e au te'esiya. Ane marepi tere'e umasisiya su, ane ya'ariyei nomo lo Owane Sitewi ma'e au te'e wisereyeye. Lowe marepi ape ne apou te'esiya, 'Marepi tere'e ape wawero a'i ne. Ane lai etiri werese, Moses lo yo peri irosiya ape, ane marepi ta'i tote tawesiteye. Ane Owane Sitewi lo au te'e siye lu werese lo peri tote tawesiteye.'¹⁵ Ane lai marepi ta'i lowe lo tote tawesisiya. Marepi nomo lo aiwawe a'i ne. Owane Sitewi lai lu taune werese wisere a'i, sosu lu taune werese luwaru a'i lowe werese si tame norohu hene anirowa.^h ¹⁶ Serai ane lai mi mi pasi pasi Owane Sitewi lo nihe se yo seni aseyaro a'i ironamiteye. Sosu aiwawe a'i ane lu taune werese lo nihe se yo seni aseyaro a'i ironamiteye.¹⁷ Sosu a'i pe ane omo Jerusalem arunati su, iyu menei tomu ne'ese, ane si tame aiye ta'ame. Nowe mo'o su ane si fai su, ane ma'aru tamo lu ariye a'i ma'e auwei ne aitai. Ane etiri tamo Owane Sitewi ma'e au heseyei ne aitai.¹⁸ Lowe ane Owane Sitewi lo wesi tutawe papu siyeye su, ane meni wara'l a'i ne. Ane meni amerame a'i. Lowe ane siyeye su, lu taune tomu ne'ese ane ma'e ta'uwerai. Ane yo seni luwaru a'i iro ta'ame.ⁱ ¹⁹ Ahowa, ane meni yahowa'l a'i ne. Lu tamo omo pani Esia ma'e fai ape, lowe ne ma'e fai ta'ame. Lowe ane ne ai peri au fu te'eye su, lowe ne ma'e ai peri ape au te'e areiyerowa.²⁰ Lu ape mo saro ahe teisiya ape, lowe ane ma'e ai peri yo seni luwaru a'i au fu te'eye su, lowe ne ma'e fara'u au te'e areiyerowa. Ane lu owane werese ta'uwerai ape ma'e, iroteye su, lowe ane yo seni luwaru a'i siyerowata.²¹ Peri ape lowe lo wiyeme a'i tene! Ane lowe ponei ma'e teiye su, ane peri ta'i kairefi a'i au te'e areiyeye. Ane apou te'eye, 'Lu taune werese temeniyeye su, Owane Sitewi lai lowe werese si tame ta'an norohuwe hene anirowa.' Ane peri ape kairefi a'i tote tawesisiya. Fene pereye marepi apo ape au hesere."^j

²² Sosu a'i pe Feliks le Jisas lo marepi oso po'o a'i wanu so'oruwe ape, lowe ma'e apou te'eye, "Peri ape tepa'asiye. Lu werese ire. Meni ape Lisias ai atu siye meni owane aiyerowa su, ane fara'u peri ape au te'e fareraiyerowa."^k ²³ Sosu le ai atu siye meni owane ta'i ma'e apou eiye, "Ne Pol kalabus wesi ma'e henetire. Ne le au noweinoweite. Pol lo kaiyemo mo werese fara'u etiri tamo aunarairowa."

Feliks lai Pol kalabus wesi papu fu aroweye.

²⁴ Nowe tomu ne'ese tepa'asye su, meni owane Feliks tani lo aiwawe fai. Tani lo iyape Drusila. Tani ape Juda lo menitani. Sosu le Pol ei aniyeye.

^h 24:15 Jo 5:28-29 ⁱ 24:18 Ap 21:12-28 ^j 24:21 Ap 23:6 ^k 24:22 Ap 23:26

Pol fai su, le Jisas Krais lo peri lowesi ma'e au te'e areiyeye. Lowe Jisas lo peri wanu etiye. ²⁵Sosu Pol yo seni aseyaro a'i, tahe lowesi lo, lowesi au noweinoweiteye ape, ne, au te'e areiyeye. Nowe ye'ewi se Owane Sitewi lai lu taune werese au hese ereirowa. Le etiri ape mo lowesi ma'e apou au te'e areiyeye. Feliks peri ape wanuwe su, le marepi erasi a'i atoweiyeye. Sosu le apou te'eye, "Fara'u peri te'e tepa'asire. Ne ire. Marepi ano toteyei su, ane ne si ei anirowa." ²⁶Le marepi tere'e a'i toteye. Le apou toteye, "Pol ane ma'e ma'aru tamo fa aure." Serai le nowe tomu ne'ese Pol ei aniyei ne te'e tiyatiteye.

²⁷Sosu a'i pe iyu menei hesi a'i i tepa'asiye su, Feliks omo ape arunatiyewe fi. Meni tere'e iyape Porsius Festus, le Feliks lo yaru wiwayi atati ta'aneteye. Ahowa, Feliks Juda lo lu werese ma'e marepi nine'iyei ne toteye. Serai le Pol kalabus wesi ma'e saro arunati.

Pol Rom lo meni owane tutawe, Sisar, yo seni lo au hese ereirowa.

25 ¹Sosu nowe hesi heta i tepa'asiye su, meni Festus omo Sisaria arunatiyewe, omo Jerusalem ma'e yaneri. ²Omo Jerusalem ma'e henerai su, au heseyei lu owane tamo, lu owane tere'e tamo le ma'e Pol etiyei ne fi.^l ³Lowe le ma'e apou te'eye, "Ne etiri wisere a'i nomo ma'e aure. Ne meni Pol omo Jerusalem ma'e si eimawesawi." Lowe apou toteye, "Pol aiyerowa su, nomo yo tewiye sahe tei fareyarerowa. Pol aiyeyei su, nomo le aine tera'erowa."^m ⁴Ahowa, Festus lowe ma'e itiya'u eiye, "Pol omo Sisaria kalabus wesi sahe saro irosiya. Nowe mo'o su ane omo ape ma'e si tame irowa. ⁵Fene lu Owane tamo ane mase itorirowa. Meni ape yo seni luwaru a'i iroteye su, fene le ma'e etirowa."

⁶Sosu Festus nowe poweiye ereti hesi werese (10) lowe mase iroteye su, le omo Sisaria ma'e si itori. Nowe mo'o su, le Pol te'e etiye. Sosu le apou eiye, "Fene meni Pol heneta." ⁷Sosu Pol henerai su, Juda lo lu tamo, omo Jerusalem ma'e itorai ape, le ataher a'i teirai. Lowe Pol ne yo seni luwaru a'i tomu ne'ese au fu te'eteeye. Lowe etiri ape mo sitewi au te'e ta'ame."ⁿ ⁸Sosu Pol itiya'u apou eiye, "Ahowa, ane yo seni luwaru a'i ta Juda lo yo werese ne iro ta'ame. Ane Owane Sitewi lo yo peri arisi ta'ame. Aiawae a'i ane Rom lo meni owane tutawe lo yo peri werese arisi ta'ame."

⁹Sosu Festus Juda lo lu werese pere'i siyeyei ne toteye. Le apou te'e toweriye, "Ne fara'u omo Jerusalem ma'e yaneyei awere? Ne fara'u ane ne ta'uweyei wesi ma'e tei irorowa awere? Serai lowe lo peri werese wanurowa awere?"

¹⁰Sosu Pol itiya'u apou eiye, "Ane lai Rom lo meni owane tutawe lo ta'uweyei wesi sahe teisiya. Lowe ane ma'e wesi ape sahe etiyei ne toteye. Fara'u, ane etiri luwaru werese a'i Juda lo lu taune werese ma'e

^l 25:2 Ap 24:1 ^m 25:3 Ap 23:15 ⁿ 25:7 Ap 24:5-6

iro ta'ame. Ne peri ano wiyeme a'i wanu so'oruwerowa! ¹¹Serai ane etiri luwaru a'i erasi ta irowe su, ne ane aine tera'eyei ne toteye. Ane fara'u temeniyerowa. Ahowa, Juda lo lu ape mo, peri lowe lo, ane au fu te'eye ape, wawero a'i su, ne lu tere'e tamo lowe ma'e ane henetirowata. Ane meni owane tutawe no, Sisar, yo seni ano au hese ereire."

¹²Sosu Festus lu owane tamo lo te'e tiyatiteye su, le si tame fai. Le Pol ma'e apou eiye, "Ne Rom lo meni owane tutawe ei aniye su, ne Rom lo owane tutawe ma'e fu ire."

Meni Festus lai meni owane tutawe, Agripa, Pol ne ei toweriye.

¹³Nowe poweiye tamo i tepa'asiye su, meni owane Agripa einei lo Bernaisi omo Sisaria ma'e henerai. Lowesi Festus ma'e au te'e wisereyeyei ne toteye. ¹⁴Lowesi nowe tomu ne'ese iroteye su, Festus lowesi ma'e Pol ne te'eye. Le apou te'eye, "Meni ta kalabus wesi sahe iroteye ape, meni owane Feliks le kalabus wesi sahe arunati.^o ¹⁵Ane omo Jerusalem ma'e fi su, au heseyei lu owane tamo, ya'ariyei tamo, ane ma'e au te'eyei ne fai. Lowe le aine tera'eyei ne te'eye. ¹⁶Ane lowe ma'e apou te'eye, 'Rom lo yo peri apou te'esiya. Nomo meni ta lu tere'e tamo ma'e yahowa'i henetirowata. Tu le lowe ma'e teirowawe, peri lowe lo wanuwei. Sosu le fara'u peri lowe lo itiya'u te'erowa.' ¹⁷Lowe saro ahe ane mase fai su, ane pereye a'i le etiyei ne ei ta'uwerai. Ane nowe mo'o su, ane meni ape ei aniye. ¹⁸Sosu lu ape mo ponei ma'e teiye su, lowe yo seni luwaru a'i au fu te'eye. Ane yo seni luwaru a'i ape mo wanuwe su, ane aiwawe a'i toteye, 'Meni ape yo seni luwaru erasi a'i iro ta'ame.' ¹⁹Ahowa, lowe peri tame au fu te'eye. Lowe meni ta'i, temeniyeye ape, iyape Jisas ne, te'e areiyeye. Meni ape ne, Pol apou eiye, 'Meni ape Jisas, temeniyeye su, Owane Sitewi lai le si tame ta'ane norohuwe hene aniye. Lowe Juda lo marepi aiwawe a'i au te'eteye.' ²⁰Ane peri lo sitewi siye etiyei ne toteye su, ane yo peri ape so'oru ta'ama. Serai ane le ma'e ei toweriye, 'Ne fara'u omo Jerusalem ma'e si tame irowa awere? Lowe lai yo seni no au hese etirowa.' ²¹Sosu Pol Rom lo meni owane tutawe, Sisar, ma'e ei aniye su, ane apou toteye. Le lai meni owane tutawe ape ma'e fu ire. Sosu ane le kalabus wesi sahe heneti. Wai ta'l omo Rom ma'e iyei su, ane le meni owane tutawe nomo lo ma'e eimawesawi.'

²²Sosu a'i pe meni owane Agripa, Festus ma'e ei toweriye, "Ane fara'u meni ape lo peri wanurowa awere?" Sosu le itiya'u eiye, "Ei, aperi su, ne peri ape fara'u wanurowa."

Pol Agripa ma'e au te'e areiyeye.

²³Nowe mo'o su, Agripa einei lo Bernaisi lowesi ipari tahe wisere a'i ani asiteye. Lowesi lu owane tomu ne'ese mase, awei lo lu owane tomu ne'ese

^o 25:14 Ap 24:27

mase, ai atu siye lu owane tamo ta'uweyei wesi papu wiye. Sosu lowe ta'uwe tepe'asiye su, Festus lai Pol ei aniyē. ²⁴Sosu Pol ta'uweyei wesi henerai su, Festus lowe ma'e apou te'eye, "Meni owane tutawe Agripa, lu owane werese nomo aiwawe irosiya ape, fene meni ape siye etire. Juda lo lu taune werese omo Jerusalem sahe omo Sisaria sahe ane ma'e apou eiye, 'Ne meni eite fu aine tera'ere.' ²⁵Ane Pol lo peri wanuwe su, ane yo seni lo le ne aine tera'eyei ne tote ta'ame. Sosu le Rom lo meni owane tutawe, Sisar, ei aniyē su, ane omo Rom ma'e eimawesawiyei ne toteye. ²⁶Ane Rom lo meni owane tutawe, Sisar ma'e one towē ta leseyei su, ane peri so'oru ta'ama. Serai ane fene ma'e Pol henetai. Anē meni Owane Agripa ma'e Pol henetai. Nomo werese peri lo wanu etiyē su, ane peri ta fara'u Rom lo meni owane tutawe, Sisar ma'e one towē lese ausawirowa. ²⁷Ane kalabus wesi meni ta, yo seni aseyaro a'i iroteye ape, Rom lo meni owane tutawe Sisar ma'e eimawesawirowata. Ane yo seni luwaru a'i, le irowe ape ne, one towē sahe leseyei."

Pol lai meni owane Agripa ma'e au te'e areiyeeye.

26 ¹Sosu a'i pe meni owane Agripa Pol ma'e eiye, "Ne fara'u nomo ma'e au te'e areiyere." Sosu Pol ponei sahe teiye su, ereti lo tesi fareraiyeye. Sosu le itiya'u te'eye, ²"Meni owane Agripa, ane ne ne au te'e wisereyesiya. Anē peri ano au te'e areiyeysi su, ne peri ano wiyeme a'i au hese ereiyē. Juda lo lu werese ane ma'e etiyē su, ne fara'u peri sitewi siye etiteyei. ³Ne Juda lo marepi werese wanu so'oruweiya. Aiawae a'i, ne Juda lo etiri werese siye so'oruweiya. Serai ane ne ne au te'e wisereyesiya. Anē peri te'e areiyeysi su, ne peri ano wanu etire.

⁴Juda lo lu taune werese lowe etiri werese ano siye so'oruweleye. Anē meni eime oso a'i iroteye su, lowe ane siye so'oruweleye. Anē lai omo pani ano iroteye ape, lowe ane siye so'oruweleye. Anē omo Jerusalem ma'e fi su, lowe marepi ano siye so'oruweleye. ⁵Lowe mi mi werese ane siye so'oruweleye. Lowe aiawae a'i toteyei su, lowe peri wiyeme a'i ape fara'u ne ma'e au te'e areiyerowa. Anē Farisi lo marepi werese umasi etiteye su, lowe fara'u ne ma'e au te'e areiyerowa.^p ⁶Tu naifa Owane Sitewi lai ya'ariyei nomo lo ma'e peri ta wiyeme a'i au te'eye. Anē lai marepi ape tote tawesi etisiya. Pereye lowe ane ma'e marepi ape etiyē ne toteye. ⁷Owane Sitewi lai peri wiyeme a'i ape au te'eye su, Israel lo lu tewi (12) lowe werese peri te'e naneiyē ape mo ne ninawesiya. Lowe Owane Sitewi ma'e wiyawī ta'aneteye su, lowe mi mi pasi pasi peri te'e naneiyē ape mo ne ninaweteye. Meni owane, marepi ape aiawae a'i ane tote tawesiya ape, lowe ane etiyē ne totesiya.^q ⁸Owane Sitewi lai kairefi erasi irosiya. Le lu tamo, temeniyeye ape, fara'u si tame ta'anē norohuwe hene anirowa. Juda lo lu tamo marepi ape tote tawesi ta'ame.

^p 26:5 Fl 3:5-6 ^q 26:7 Ap 23:6; 28:20

⁹Tu naifa ane lai apou toteye. Ane wiyawi ta ta'aneteye. Ane lu taune werese, Jisas Nasaret lo meni lo marepi umasiteye ape, ane lowe ma'e au luwaruwewe.^r ¹⁰Ane omo Jerusalem ma'e fai su, ane apou aiwawe irowe. Au heseyei lu Owane werese lo kairefi se, ane Jisas lo lu feni tomu ne'ese kalabus wesi ma'e heneti. Lowe lu feni ape tera'eyei ne toteye su, ane apou eiye, 'Ei, fene lowe aine tera'ere.' ¹¹Mi mi werese ane ta'uwewayi wesi werese sahe lu feni werese ma'e au luwaruwewe. Ane lowe Owane Sitewi ne te'e naruteye ape, au fu te'eye. Ane ai erasi lowe ne toteteye su, ane omo pani tere'e ma'e fiyewe, lowe kalabus wesi ma'e hene aniyi.

Pol Agripa ma'e au te'eye.

(Aposel 9:3-19; 22:6-16)

¹²Ane omo Damaskus ma'e lowe hene aniyei ne toteye. Ane yaneye su, ane au heseyei meni owane lo kairefi se lowe hene aniyei ne toteye. ¹³Powekiye po se ane lu tamo mase yo sahe iteye. Pereye a'i ane mi erasi, ni'arawe ma'e itorai ape, siyeye. Mitaiyeyei ape erasi a'i ne, powekiye lo mi oso a'i ne. Nomo werese napetu tawesiye. ¹⁴Nomo werese awei sahe winetaiteye. Sosu ane peri ahi ta uteye ape, wanuwe. Peri ahi ape, peri ano se iyape Hibru apou uteye, 'Sol, Sol! Piyene ane ma'e au luwaruwesiya awere? Ne lai apou te'e areiyesiya su, ne topo ne au luwaruwesiya.'¹⁵ Sosu ane itiya'u eiye, 'Meni owane ne eiwerai awere?' Sosu meni owane itiya'u apou eiye, 'Ane lai Jisas ne. Ne lai ane ma'e au luwaruwewe. ¹⁶Sosu ne sine teire. Ane ne ariariyeye. Ne lai wiyawi ano ta'anerowa. Ne lai etiri werese, ne siyeye ape, au te'e fiyarite. Etiri werese, ane ne au atuaturopa ape, ne lu taune werese ma'e au te'e fiyariropa. ¹⁷Lu tewi no ne ma'e au luwaruweyei su, ane ne pati henetiropa. Lu tewi tere'e ne ma'e au luwaruweyei su, ane ne aiwawe a'i au pati ferafereiropa. ¹⁸Ane lai ne lu taune tomu ne'ese ma'e au te'e fiyariyei ne eimawesawiropa. Lowe peri ano, ne au te'e fiyariyei ape, wanuwe su, lowe yo seni luwaru a'i towafi lowe lo aresaiye atati arunatiropa. Lowe Owane Sitewi ma'e si tame atati toterowa. Pereye lowe pasi wou a'i iroteye. Lowe peri ano umasiropa su, lowe mi a'i wou a'i tei irotorowa. Lowe sepei Satan lo kairefi fa atati arunatiropa su, lowe Owane Sitewi ne umasiropa. Lowe ane umasiropa su, Owane Sitewi lai yo seni luwaru a'i lowe lo au ani sasari pamowerowa su, Owane Sitewi lu taune werese lo aiwawe omo hire ma'e hene ani wiropa.^s

Pol lai meni owane Agripa ma'e wiyawi lo ne au te'eye.

¹⁹Serai ane ne ma'e, meni owane Agripa, au te'esiya, Owane Sitewi lai ane ma'e au suwou hamehameyei siyeye su, ane suwou hamehameyei

^r 26:9 Ap 8:3 ^s 26:18 Ais 42:16; Ef 2:2; Kl 1:13

ape umasiteye. ²⁰Tu ane lai lu taune, omo Damaskus iroteye ape, au te'e fiyariye. Sosu omo Damaskus arunati su, ane lu taune ma'e omo Jerusalem sahe au te'eyei ne fi. Aiawae a'i ane omo pani Judia ma'e lu taune werese ma'e au te'e fiyariye. Mo'o ane lu tewi tere'e werese ma'e au te'e fiyariye. Ane Owane Sitewi lo peri lowe werese ma'e au te'e fiyariye. Lowe yo seni luwaru a'i lowe lo fa ani aweto arunatiyewe, Owane Sitewi ne umasite. Lowe yo seni luwaru a'i ani aresaiye arunatiyi su, lu taune werese wiyawi lowe lo wisere a'i siyeye. ²¹Ane Owane Sitewi lo peri Owane Sitewi lo wesi tutawe sahe au te'e fiyariye su, Juda lo lu tamo ane anite tawesiyewe, ane aine tera'eyei ne toteye. ²²Mi mi pasi pasi Owane Sitewi lai ane au pati ferafereiteye. Serai ane lu taune owane werese lu taune yahowa'i a'i ma'e Owane Sitewi lo peri au te'e areiyesiya. Peri ano Owane Sitewi lo au te'e siye lu werese lo peri aiawae a'i au te'esiya. ²³Lowe Moses aiawae apou au te'e areiyeteye, Owane Sitewi 'Meni Owane Sitewi lai ariariye ape, fofowei erasi wiyeme a'i teriterowa. Mo'o su, lu tamo le ma'e aine tera'erowa. Aine tera'erowa su, Owane Sitewi lai le si tame ta'ane norohuwe hene anirowa. Le meni tutawe Owane Sitewi lai si tame ta'ane norohuwe hene anirowa. Le awei hi ma'e itorai su, le marepi hepene he'i a'i lu taune werese lo ma'e, lu tewi tere'e ma'e au te'eyei ne itorairowa.' ²⁴^t

Agripa lai Jisas ne tote tawesiyei ne ataheyeye.

²⁴Sosu meni owane Festus Pol ma'e peri erasi a'i uteye, "Pol, ne meremereye a'i ne. Marepi erasi no, ne ma'e meremereye a'i irowe."

²⁵Sosu Pol itiya'u apou eiye, "Owane meni Festus, Ahowa! Ane meremereye ta'ama. Peri ano farere wiyeme a'i ne. ²⁶Meni owane ape peri ano wanu so'oruweсиya. Ane fara'u le ma'e au te'e te'erowa. Le etiri werese, ane au te'esiya ape, siye so'oruweтиye. Ane lai etiri werese fareyareye se ta'ama. ²⁷Meni owane Agripa, ne Owane Sitewi lo au te'e siye lu werese lo marepi tote tawesiya awere? Ane ne marepi ape tote tawesiye ape, so'oruwe тene!"

²⁸Sosu Agripa Pol ma'e itiya'u eiye, "Nowe oso a'i su, ne apou toteye, ne ane marepi he'i a'i ape tatai anirowa awere?"

²⁹Sosu Pol itiya'u eiye, "Nowe oso a'i su, nowe pite a'i, ane Owane Sitewi ma'e ne au te'e towerisiya. Fene werese ane mase irosiya ape, ahawa, fene wafei se owe ape ti tawesinamirowa. Ne, lu taune werese aiawae, peri ano wanuwe ape, Owane Sitewi lai fene werese ma'e marepi hepene he'i a'i aurowa."

³⁰Sosu meni owane ape, Festus menitani Bernaisi, lu owane tere'e aiawae a'i sine teiteye. ³¹⁻³²Lowe werese nowe ma'e heneye. Sosu lowe

^t 26:23 Lu 24:44-47; 1 Ko 15:20

apou te'e tiyatiteye, "Meni ape yo seni luwaru a'i iro ta'ame. Nomo le aine tera'erowata. Nomo kalabus wesi ma'e henetirowata." Sosu Agripa, Festus ma'e apou ekiye, "Meni ape Rom lo meni owane tutawe, Sisar ma'e ei ani ta'ame su, nomo le nowe ma'e ani arosawirowa. Ahowa, nomo le meni owane tutawe ape Sisar, ma'e eimawesawirowa."

Pol omo Rom ma'e wai se iyatuti.

(*Aposel 27:1–28:31*)

Lowe Pol omo Rom ma'e eimawesawi.

27 ¹Meni owane lo peri te'e naneiyei tepa'asiye. Pol Pani Itali ma'e iyei ne toteysi su, le kalabus wesi lu tere'e tamo aiwawe ai atu siye meni owane ma'e iyape Julius heneti. Meni ape ai atu siye lu tomu ne'ese iyape Rom meni owane pefine lo ai atu siye lu, au noweineweiteye. Ane Pol lo lu feni aiwawe iyei. ²Sosu nomo wai ape papu omo Adramitium ma'e fai ape, aro atowe. Wai ape omo tamo pani Esia ma'e iyatutiyei ne toteye. Nomo wai se omo Sisaria arunatiyewe, sa'i erasi ape ma'e iyatu toneye. Meni ta'l i yape Aristarkus nomo aiwawe fi. Le omo Tesalonaika pani Masedonia ma'e fai.^u ³Nowe mo'o su, nomo omo Saidon ma'e iyatu furi. Meni Julius Pol ma'e au noweineweiteye. Le Pol ma'e apou ekiye, "Ne fara'u kaiyemo no werese siyeri. Lowe fara'u au arowa."^v ⁴Sosu nomo omo Saidon arunati su, fiyaru erasi a'i heneraiyewe, wai nomo lo kemere Saiprus feni wisere a'l ma'e iyatuti. ⁵Sosu nomo kemere Saiprus arunatiyewe fi. Sa'i erasi omo Silisia, omo Pamfilia ataher a'i iyatu toneri. Sosu nomo omo Maira pani Lisia sahe wai iyatu furi. ⁶Ai atu siye meni owane Aleksandria lo wai tere'e siyeye. Le nomo wai ape se hene arunari. Wai ape pani Itali ma'e iyatutiyei ne toteye.

⁷Omo Maira arunati su, nomo momotei a'i iyatutiteye. Nowe poweiye tomu ne'ese momotei a'i fi. Fiyaru erasi henerai su, nomo omo Nidus kairefi se henerai. Sosu nomo senitewi ma'e furi ta'ame su, nomo kemere Krit feni ma'e iyatu toneri. Omo Salmone awera'iynatiyewe fi. ⁸Nomo sa'i tewiye kairefi se iyatutiteye, nomo iyatuti su, nomo sa'i ape iyape Ya'orei Wisere a'i ma'e furi. Sa'i Ya'orei Wisere a'i ape omo Lasea ataher a'i irosiya.

⁹Sosu a'i pe nomo nowe poweiye tomu ne'ese saro ahe iroteye. Nowe tahe pa'are sa'i au huwe ape, i tepa'asiye su, fiyaru erasi a'i ataher a'i henerai.^x Sa'i ei erasi aiwawe ataher a'i henerai. Wai ta sa'i iyatu toneri su, fiyaru, sa'i ei wai ani awetu awetorowa. Sosu Pol lowe ma'e peri kairefi

^u 27:2 Ap 19:29 ^v 27:9 Juda lo marepi apou a'i totesiya. Nowe ape sahe Juda lo lu taune werese yo seni luwaru a'i towafi lowe lo sa'i au hu sasari pamoweye.

se apou te'eye,¹⁰ “Lu werese Wanure! Nomo sa'i toneriyei su, fiyaru, sa'i ei erasi wai eite ani awetu awetorowa. Wai ani awetorowa su, etiri werese sa'i papu itorowa. Nomo aiwawe a'i sa'i papu itorowa. Serai nomo awei pani sahe sato ahe onure.”¹¹ Ahowa, ai atu siye meni owane Pol lo peri umasi ta'ama. Le wai lo meni owane marepi topo lo wanu umasiteye.¹² Nowe fiyaru erasi se, sa'i ya'orei ape wai senitewi ma'e furai ta'ame. Wai furowa su, sa'i ei wai ani awetorowa, serai lu tomu ne'ese sa'i ya'orei ape arunatiyei ne toteye. Lowe omo Finiks ma'e iyei ne toteye. Omo ape sahe nowe fiyaru erasi se saro iroteye. Omo ape sahe Kemere Krit sahe sa'i ya'orei wisere a'i ape fiyaru ne saro ahe fareyarerowa.

Fiyaru sa'i ei erasi a'i henerai.

¹³ Sosu fiyaru oso a'i henerai su, lowe apou toteye, “Fiyaru wisere a'i. Nomo omo Finiks ma'e iyei.” Sosu lowe sa'i erasi iyatu toneye. Lowe Krit lo sa'i tewi atahe a'i ma'e iyatutti.¹⁴ Oso a'i su, fiyaru ape henerai. Fiyaru erasi Kemere Krit sahe soro ma'e oweirai.¹⁵ Fiyaru erasi ape wai nomo lo ani terutorowe su, nomo wai ape iyatutti noweinowei ta'ame. Wai ape fetaneyeti.¹⁶ Nomo kemere oso a'i iyape Kauda fetaneyetiteye su, nomo wai oso a'i kairefi anite ti tawesiye.¹⁷ Sosu lu werese wai oso a'i ape ani ti tawesi tepa'asiye su, lowe wai erasi ape wafei se ti atati tawesiye. Fiyaru erasi ape lai wai ape aine tapereseyei ne ataheyeye. Wai ape wafei ti tawesi tepa'asiye su, lowe wai eneri tapiye omo pani Afrika sahe aine tapereseyei ne tote atoweiyeye. Lowe wai lo ipari tahe hi ani ararowe su, fiyaru wai ape ani fetaneyeti.¹⁸ Fiyaru erasi wai nomo lo ani aineraiteye. Nowe mo'o su, lowe etiri werese wai sahe ani asiye ape, sa'i ma'e fu arowe. Serai wai erasi ape wiyeme a'i fetaneyetiteye.¹⁹ Nowe hesi heta i tepa'asiye su, lowe wai lo etiri werese, wafei aiwawe sa'i ma'e ani fu arowe.²⁰ Nowe tomu ne'ese powekiye, eiwariyemi werese siye ta'ame. Fiyaru erasi nomo werese ani arosawi. Nomo werese apou toteye, “Nomo werese sa'i papu atenise itorowa.”

²¹ Nowe tomu ne'ese lowe ene a ta'ame su, Pol ponei teiye apou te'eye, “Lu werese wanure! Fene peri ano wanu umasiye su, nomo fara'u iroteye. Nomo Kemere Krit saro teiteye su, etiri werese nomo lo fu aro ta'ame. Nomo werese wiyeme a'i iroteye.”²² Ahowa, fene werese marepi fene lo kairefi a'i totore. Lu werese nomo lo sa'i papu atenise ito ta'ame. Wai ape lai sa'i papu itorowa.²³ Liyewe pasi, Owane Sitewi, ane umasiye ape, ane wiyawu lo au ta'aneteyeye ape, Owane Sitewi lo ipari wisere a'i ane ma'e atahe a'i teirai.²⁴ Le apou eiye, “Pol, atoweiyeye sawa! Ne Rom lo meni owane tutawe, Sisar ma'e teiri. Sisar peri no wanurowa. Owane Sitewi lai ne lu werese aiwawe irosiya ape, le peri no ape wanuteye. Lu werese sa'i atenise temeniye ta'ame.”^w²⁵ Serai fene werese kairefi a'i irore. Fene

^w 27:24 Ap 23:11

atoweiye sawa! Ane Owane Sitewi lo marepi tote tawesisiya. Etiri werese Owane Sitewi lai ane au te'leteye su, wiyeme a'i henerairowa. ²⁶Ahowa, nomo kemere oso a'i tewiye sahe wai werese ani furowa.^x

²⁷Sosu a'i pe pasi ereti feni werese lowe hesiyo hesiyo i tepa'asiye su, fiyaru erasi nomo Sa'i Adria fetaneyeti. Pasi po, wai lo lu tewi tamо awei pani ta atahe a'i iyei ne toteye. ²⁸Sosu lowe wafei tapiye se sal'i yaru siyeyei ne ani fu arowe. Sal'i yaru (40 mita aiwawe a'i). Nowe oso a'i, lowe wafei tapiye se si tame ani fu arowe. Sal'i yaru (30 mita aiwawe a'i). ²⁹Lowe werese atoweiye irowe. Sosu lowe tapiye erasi hesiyo hesiyo wafei se ti tawesiye ape, lowe sal'i ma'e ani fu arowe. Sosu lowe god tere'e towafi lowe lo nowe mitaiyeyei ne te'eye. ³⁰Wai lo lu tewi tamо wai arunatiyei ne toteye su, sosu lowe wai oso sal'i papu ani fu arowe. Lowe peri apou areare te'eye, "Nomo wai pihatu ma'e wafei tapiye se sal'i papu ani fu arorowa." Lowe lai wai erasi ape arunatiyei ne toteye. ³¹Sosu a'i pe Pol ai atu siye meni owane ma'e apou ekiye, "Lu eite mo wai erasi arunatiyei su, nomo werese temeniyerowa. Lowe werese wai sato pei irote." ³²Ai atu siye lu werese peri eite wanuwe su, lowe wai lo wafei mene'e se aine touwe. Sosu wai oso a'i sal'i papu itori.

³³Nowe mitaiyeye su, Pol ponei sahe teiye le apou te'eye, "Fene werese nowe tomu ne'ese ene a ta'ame. Serai ane fene ma'e au te'e areiyesiya. ³⁴Fene werese ayei tamо ene are. Fene ene a ta'ame su, fene werese luwaru irorowa. Fene kairefi a'i irote. Fene werese wisere a'i teitorowa." ³⁵Sosu Pol peri tepa'asiye su, le lowe ponei a'i nau ta'ase ani topotowe, Owane Sitewi ma'e au te'e wisereyeye. Sosu le nau ta'ase tewi pa tewi ene ateye. ³⁶Sosu lowe werese kairefi he'i aniyе su, lowe nau ta'ase ene ateye. ³⁷Lu werese, wai papu iroteye ape (276 aiwawe a'i ne). ³⁸Lowe werese ene a tepa'asiye su, lowe kewi so sal'i papu ani fu arowe. Lowe kewi so fu arowe su, wai orese ta'ame, fetane a'i fetaneyeye.

Wai erasi ape aine tapereseye.

³⁹Esi su, lowe awei pani ta siyeye. Ahowa, lowe awei pani ape so'oru ta'ama. Eiwerou ma'e irosiya awere? Sosu lowe sal'i ya'orei eneri wisere a'i ta siyeye su, lowe wai sal'i tewiye furiyei ne toteye. ⁴⁰Sosu lowe wafei tapiye se aine tou arowe. Lowe wai si iyatu siye wafei aine touwe. Sosu lu tamо ipari tahe hire ani aine ape'i ereye. Sosu eneri ma'e furiyei ne toteye. ⁴¹Ahowa wai eneri ta aine tawesiye. Wai pihatu he'e tawesiye. Wai si sal'i ei erasi se aine taperese fiyari ereye.

⁴²Ai atu siye lu werese kalabus lu werese aine tera'eyei ne toteye. Lowe apou toteye, kalabus lu werese sal'i feirowa su, lowe werese itero fiyarisawi. ⁴³Ai atu siye meni owane Pol noweinoweiyei ne toteye. Sosu

^x 27:26 Ap 28:1

le lowe ma'e apou eiye, "Ahowa, fene lu werese owe ape aine tera'ere." Sosu le apou eiye, "Lu werese fara'u sa'i itorire. Eneri sahe feiri. ⁴⁴ Lu tamo feirowata ape fara'u metei tewi a'i ereti se ani fetane feiteye. Sosu lu werese eneri ma'e fei ani teiri."

Pol kemere Malta ma'e iroteye.

28 ¹Nomo werese sa'i tewiye ma'e furi. Lu tamo kemere lo iyape Malta au te'eye. ²Lu taune, kemere ape sahe iroteye ape, nomo ma'e wisere a'i au pati ta'aneteye. Lowe yehe arineye su, lowe nomo ne au wisereyeteye. Sa'i naretei a'i erasi itoteye su, lowe nomo yehe atah se apou ei aniyey. ^y ³Sosu Pol lowahi yehe ta'uwe arineye su, le lowahi ape mo yehe ani leiye. Sosu haru aimesi lai lowahi yehe hire tepa'asiye auweiy. Sosu Pol ereti sahe tomuwe. ⁴Sosu lu werese, omo ape sahe iroteye ape, haru eite siyeye su, lowe te'e tiyatiye. Lowe apou eiye, "Sawi amou! Meni eite aine tera'e siye meni. Sa'i ei erasi le aine tera'e ta'ame su, sepei owane yo seni luwaru a'i itiya'u irowei ape, le haru aimesi aine tera'erowa." ⁵Sosu Pol haru ape yehe papu fu arosawi. Haru ape Pol tomuwe su, le temeniye ta'ame. ^z ⁶Lu taune werese ereti lo meiyei ne toteye. Sosu lowe Pol temeniye winetaiei ne toteye. Ahowa, lowe nowe ta se ninaweteye su, lowe marepi towafi lowe lo apou tote awetowe. "Pol temeniye ta'ame su, serai meni eite god tere'e ne."^a

⁷Kemere ape sahe meni owane ta lo awei pani atah a'i iroteye. Meni owane lo iyape Publius. Le, nomo fai ape, wanuwe su, le nomo werese ma'e au isafiye noweinoweiteye. Nowe hesi heta i tepa'asiye su, le nomo au isafiye noweinoweiteye. ⁸Meni ape lo tai u erasi se wara sahe howeiteye. Meni ape tahe umeri se, li sa'i, u se howeiteye. Sosu Pol le ma'e fi su, ereti topo lo hire isawe hetesiye. Sosu le Owane Sitewi ma'e au te'eye. Sosu peri ape au te'e tepa'asiye su, tahe lo au fara'uweye. Li sa'i po'uteye. ⁹Sosu lu taune tomu ne'e se ape, wanuwe su, lowe Pol ma'e fai. Sosu le lowe werese au ta'ane fara'uweye. ¹⁰Sosu lu taune werese, kemere sahe iroteye ape, etiri tomu ne'e se nomo ma'e auwe. Sosu nomo wai se iyei ne toteye su, lowe etiri ayei tomu ne'e se nomo ma'e auwe.

Pol omo Rom henerai.

¹¹Sosu a'i pe yame hesi heta nomo kemere ape sahe iroteye. Sosu meni Aleksandria lo wai ta'i kemere ape sahe tu henerai ape, fiyaru sa'i ei ninawe po'uteye. Fiyaru, sa'i ei tepa'asiye su, lowe omo Rom ma'e iyatutiyei ne toteye. Lowe god tere'e hesi lo hepene pihatuh sahe leseye. Lowesi lo iyape Kasta, Polaks. ¹²Sosu nomo Kemere Malta arunati su, sa'i erasi iyatu toneri. Nomo omo Sirakyus ma'e henerai. Nomo poweiye hesi

^y 28:2 2 Ko 11:27 ^z 28:5 Mk 16:18 ^a 28:6 Ap 14:11

heta saro iroteye. ¹³Sosu poweiye hesi heta i tepa'asiye su, nomo Sirakyus arunati. Sosu omo Regium ma'e henerai. Nowe mo'o su, fiyaru ta fau ma'e fai ape, henerai. Sosu nomo Regium arunatiywé, omo Puteoli ma'e nowe mo'o se henerai. ¹⁴Nomo omo Puteoli henerai su, nomo wai ape arunati. Lu feni tamo wesi towafi lowe lo sahe nomo ei aniyé. Nomo poweiye ereti feni werese feni hesi a'lí (7) tei iroteye. Nomo lowe arunati su, nomo yo sahe omo Rom ma'e iteye. ¹⁵Nomo yo sahe iteye su, lu feni nomo lo, nomo fai ape, wanuwe su, lowe nomo ma'e ta'uwerai. Lu taune tamo omo Apius lo nepawe amerame a'lí ma'e fai. Lu tamo tere'e omo tere'e howeiyei lo wesi hesi heta iroteye ape, ma'e fai. Lowe nomo ma'e ta'uwerai. Pol lowe werese siye ta'uwerai su, le Owane Sitewi ma'e au te'e wisereyeye. Le marepi lo kairefi a'lí irowe. ¹⁶Nomo omo Rom henerai su, lu owane tamo apou te'eye, "Ne fara'u wesi no howeiri. Ane kalabus wesi ma'e heneti ta'ame. Ai atu siye meni ta'i ne aiwawe a'lí iyei. Le ne au ninawe noweinoweiteyei."

Pol Owane Sitewi lo peri omo Rom sahe au te'e fiyariteye.

¹⁷Nowe hesi heta i tepa'asiye su, Pol Juda lo lu owane tamo ei ta'uwe aniyé. Lowe ta'uwerai su, lowe ma'e apou te'eye, "Kaiyemo mo, ane lu tewi nomo lo ma'e yo seni luwaru a'lí ta iro ta'ame ne. Aiwawe ane ya'ariyei yo peri nomo lo arisi ta'ame. Ahowa, Juda lo lu owane tamo ane anite ti tawesiyei. Lowe ane Rom lo meni owane ma'e heneti. ¹⁸Rom lo lu owane ape mo peri ano wanuwe su, lowe ane arosaiyei ne toteye. Lowe apou te'eye, 'Pol yo seni luwaru a'lí ta iro ta'ame. Serai nomo le aine tera'e ta'ame.' Ahowa, Juda lo lu owane tamo ane aine tera'eyei ne toteye.^b ¹⁹Juda lo lu owane apou hareye, 'Ahowa! Ne meni ape owe ape arosawi. Ne le aine tera'ere.' Serai ane Rom lo meni owane tutawe, Sisar ei aniyé. Ane Juda lo lu taune werese ma'e orese a'lí irowei ne tote ta'ame.^c ²⁰Serai ane fene te'e ta'uwerai. Ane fene peri ta te'eyei ne toteye. Owane Sitewi lo peri te'e naneiyeyi, nomo Israel lu taune werese ninawesiya ape, ane meni ape ne au te'lesiya. Lowe marepi ano ape ane lu taune werese ma'e au te'eteye ape, ne wafei se ti tawesiteye."^d

²¹Sosu lowe itiya'u te'eye, "Nomo one towé ta lowe fai ape ma'e, lese ausai ta'ame. Lu tere'e tamo, Jerusalem ma'e fai ape, lowe ne ne yo seni luwaru a'lí au te'erai ta'ame. ²²Ahowa, nomo peri no wanuwei ne totesiya. Lu taune tomu ne'ese, omo omo werese iroteye ape, Jisas ne au te'e naruteye."^e

²³Sosu a'lí pe lowe poweiye ta se Pol lowesi ma'e ta'uweraiyei ne ariariyeye. Poweiye ape henerai su, lu taune tomu ne'ese Pol lo wesi ma'e ta'uwerai. Sosu Pol esi, neriwei a'lí Owane Sitewi lo peri au te'e

^b 28:18 Ap 26:31 ^c 28:19 Ap 25:11 ^d 28:20 Ap 26:6-7 ^e 28:22 Ap 24:14

areiyeteye. Le Jisas ne Moses lo yo peri sahe au te'eteye. Le Owane Sitewi lo au te'e siye lu werese lo one towé lowe ma'e Jisas ne au te'e atuatuteye.

²⁴ Lu taune tamo Pol lo peri wanuwe su, lowe Jisas lo yo umasiteye. Lu taune tere'e tamo wanu umasi ta'ame. ²⁵ Lu taune tere'e tamo marepi tere'e tere'e toteteye. Sosu Pol peri ta lowe ma'e te'e, "Owane Sitewi lo Hepene Wara'i a'i ya'ariyei nomo lo ma'e Owane Sitewi lo au te'e siye meni, Aisaia, ahi lo se peri wiyeme a'i apou au te'eye,

²⁶⁻²⁷ 'Ne lu taune ape ma'e peri wiyeme a'i au te'ere. Fene werese peri ape wanurowa su, ahowa, fene peri eti sitewi wanu so'oruwerowata.

Fene siyerowa su, etiri werese fene siye so'oruwerowata. Lu tewi ape lo marepi kairefi a'i henerai. Lowe apaniye lo aine tawesiye su, serai lowe Owane Sitewi lo peri wanu ta'ame. Lowe nihe lowe lo niso'uwe tawesiye su, lowe etiri werese siye ta'ame. Lowe nihe lowe lo petaneyei su, apaniye lowe lo tosowi su, marepi lowe lo wanu so'oruwerowa su, lowe marepi towafi lowe lo ani awetorowa su, ane fara'u marepi hepene he'i aurowa.'

Ais 6:9-10

²⁸ Juda lo lu taune, fene peri ano wanu etire. Owane Sitewi lai lu taune Moses lo yo peri umasi ta'ame ape, lowe ma'e yo seni luwaru a'i towafi lowe lo au ani sasari pamoweye. Lowe werese Owane Sitewi ne tote tawesiyei su, le lowe ma'e marepi hepene he'i a'i aurowa. Lu taune tewi tere'e ape mo peri lo wanu etirowa. Peri ape Aisaia lai lu taune werese ma'e au te'eye. Lu taune wesi arunati." ²⁹ {Pol peri ape te'e tepa'siye su, Juda lo lu tamo ai marepi erasi te'e tiyati toteteye. Lowe wesi ape arunatiywefi.}^f

³⁰ Sosu a'i pe Pol iyu menei hesi wesi lo, le eteye ape, sahe iroteye. Lu taune le ma'e aiyeteye ape, le lai lowe ne au te'e wisereyeteye. ³¹ Sosu le Owane Sitewi lo marepi kairefi a'i se lu taune tomu ne'ese ma'e, le sahe sewiye aiyeteye ape, au te'e areiyeteye. Sosu le Meni Owane Jisas Krais lo peri lu taune ma'e au te'e atuatuteye. Ane Luk one towé eite lese tepa'asiye. Papera.

^f **28:29** Peri eite yaru {"sosu"} "ponei sahe irosiya ape, peri eite piye meni lai leseye awere? Lu so'oru se tamo lowe so'oru ta'ama. Ya'ariyei one towé tomu tamo sahe peri eite iro te ta'ame. One towé tere'e tamo sahe peri eite iroteye.